

দাখিল

EXCLUSIVE

প্রশ্নপত্র ম্যাড্যাক্স ও মডেল টেস্ট

পরীক্ষা ২০২৭

উত্তরমালা

বিষয় : বাংলা দ্বিতীয় পত্র



বাংলা দ্বিতীয় পত্র : রচনামূলক প্রশ্নের উত্তরমালা

১. অনুচ্ছেদ রচনা

০১ আন্তর্জাতিক মাতৃভাষা দিবস

অথবা, একুশে ফেব্রুয়ারি

একুশে ফেব্রুয়ারি আমাদের জাতীয় ইতিহাসে একটি স্মরণীয় দিন। এ দিনটি ‘আন্তর্জাতিক মাতৃভাষা দিবস’রূপে স্বীকৃতি লাভ করেছে। এটি আমাদের গর্বের বিষয়, কারণ বাঙালিরা ছাড়া পৃথিবীর অন্য কোনো জাতি ভাষার জন্য সংগ্রাম করে শাহাদতবরণ করেনি। এ দিনকে ‘আন্তর্জাতিক মাতৃভাষা দিবস’ হিসেবে স্বীকৃতি দিয়ে ইউনেস্কো আমাদের জাতীয় ইতিহাসে এক নতুন অধ্যায়ের সূচনা করেছে এবং আমাদের জন্য এটি এক বিরাট অর্জন। সারা বিশ্বে এ দিনকে ‘আন্তর্জাতিক মাতৃভাষা দিবস’ হিসেবে স্বীকৃতিদানের জন্য ইউনেস্কোর সাধারণ সম্মেলনে প্রথম প্রস্তাব উত্থাপন করে কানাডিয়ান একটি সংস্থা। তখন তা প্রত্যাখ্যাত হয়, কারণ কিছু পশ্চিমা দেশ এতে আপত্তি জানায়। এ প্রস্তাবই গণপ্রজাতন্ত্রী বাংলাদেশ সরকারের শিক্ষামন্ত্রী ১৯৯৯ সালের ১৭ই নভেম্বর ইউনেস্কোর ৩০তম সাধারণ সম্মেলনে পুনরায় উত্থাপন করেন। কিছু দীর্ঘসূত্রিতার পর ইউনেস্কোর সাধারণ সম্মেলনে তা সর্বসম্মতিক্রমে গৃহীত হয়। সিদ্ধান্ত হয়, প্রতিবছর ২১শে ফেব্রুয়ারি ইউনেস্কোর ১৮৮টি সদস্য দেশে ও ইউনেস্কোর সদর দপ্তরে ‘আন্তর্জাতিক মাতৃভাষা দিবস’ হিসেবে দিনটি উদ্‌যাপিত হবে। ইউনেস্কো কর্তৃক একুশে ফেব্রুয়ারিকে ‘আন্তর্জাতিক মাতৃভাষা দিবস’ হিসেবে স্বীকৃতিদান সারা পৃথিবীতে আমাদের সম্মান বৃদ্ধি করেছে এবং আমরা মাতৃভাষা বাংলাকে সম্মানিত করতে সক্ষম হয়েছি।

০২ বিশ্ববিদ্যালয়

উচ্চশিক্ষা ও গবেষণার কেন্দ্র হিসেবে প্রতিষ্ঠিত বহু বিদ্যাচর্চার প্রতিষ্ঠানকে বলে বিশ্ববিদ্যালয়। বিশ্ববিদ্যালয়ে একদিকে যেমন জ্ঞান বিতরণ করা হয়, অন্যদিকে তেমন নতুন জ্ঞানসৃষ্টির উদ্যোগ গ্রহণ করা হয়। বিশ্ববিদ্যালয়ের অনার্স ও মাস্টার্স শ্রেণিগুলোতে জ্ঞান বিতরণ করা হয় এবং যারা নতুন জ্ঞান সৃষ্টি করেন তাঁদের এমফিল ও পিএইচডি ডিগ্রি প্রদান করা হয়। যারা জ্ঞান বিতরণের সঙ্গে জড়িত তাঁরা অধ্যাপক নামে এবং যারা জ্ঞান সৃষ্টির সঙ্গে জড়িত তাঁরা গবেষক নামে পরিচিত। বিশ্ববিদ্যালয়ের বিদ্যাশাখাগুলোকে সাধারণত মানবিক, সমাজতত্ত্ব, বিজ্ঞান, বাণিজ্য, কৃষি, আইন, চারুকলা, প্রযুক্তি, চিকিৎসা প্রভৃতি শৃঙ্খলা বা অনুষদে বিভক্ত করা হয়ে থাকে। প্রাচীনকালে উপমহাদেশে একটি আবাসিক বিশ্ববিদ্যালয় গড়ে উঠেছিল যার নাম নালন্দা বিশ্ববিদ্যালয়। এর বর্তমান ভৌগোলিক অবস্থান বাংলাদেশের সীমানার অদূরে। পৃথিবীর প্রাচীনতম যে বিশ্ববিদ্যালয়টি এখনো চালু আছে তার নাম আল কারাওয়াইন বিশ্ববিদ্যালয়। এটি মরক্কোর ফেজ শহরে অবস্থিত। বাংলাদেশে প্রতিষ্ঠিত প্রথম বিশ্ববিদ্যালয় ঢাকা বিশ্ববিদ্যালয়। ১৯২১ সালে এটি প্রতিষ্ঠিত হয়। বাংলাদেশে এখন বিশ্ববিদ্যালয়ের সংখ্যা দেড় শতাধিক। এগুলো বিভিন্ন শ্রেণি-নামে পরিচিত। যেমন— স্বায়ত্তশাসিত, সরকারি, বেসরকারি, বিজ্ঞান ও প্রযুক্তি, কৃষি, প্রকৌশল, মেডিক্যাল, বিশেষায়িত, কেন্দ্রীয়, আন্তর্জাতিক ইত্যাদি। জ্ঞানচর্চার মধ্য দিয়ে বিশ্ববিদ্যালয়সমূহ বিশ্বকে কল্যাণমূলক ভবিষ্যতের দিকে এগিয়ে নিয়ে যায়।

০৩ বইমেলা

আজকাল বাংলাদেশে বইমেলা ক্রমশই জনপ্রিয় হয়ে উঠছে। শহিদ দিবস ছাড়াও বিশেষ উৎসব উপলক্ষে বিভিন্ন শহরে বইমেলা অনুষ্ঠিত হচ্ছে। ভাষা আন্দোলনের স্মৃতি রক্ষার্থে বাংলা একাডেমির অনুষ্ঠান থেকে এর যাত্রা শুরু। বইমেলাতে অধিকাংশ প্রকাশকই বইয়ের দোকান দেয়। বাইরের বই আমদানিকারকরাও স্টল দিয়ে থাকে। ইসলামিক ফাউন্ডেশন এবং বাংলা একাডেমি নিজ নিজ স্টল নিয়ে বসে। বইমেলাতে বিপুলসংখ্যক আকর্ষণীয় ও সুসজ্জিত বইয়ের দোকান দেখা যায়। একুশের বইমেলাতে আকর্ষণীয় কমিশনে বই কিনতে পারা যায়। এভাবেই বইমেলা সাধারণ লোকের বই পড়ার প্রতি আগ্রহ বাড়িয়ে তোলে। বই ছাড়াও রবীন্দ্র সংগীত, নজরুল সংগীত, লোকসংগীত ও আবৃত্তির ক্যাসেট এখানে বিক্রয়ের জন্য প্রদর্শন করা হয়। মেলা উপলক্ষে আলোচনা ও সাংস্কৃতিক অনুষ্ঠানেরও আয়োজন করা হয়। একুশের বইমেলায় কোনো একটি কোনোয় হালকা খাবারের দোকানও থাকে। বইমেলা একটি মহৎ উদ্যোগ এবং এটি সাফল্যের দাবিদার। সারাদেশে বইমেলায় জনপ্রিয়তা ক্রমশ বৃদ্ধির পাশাপাশি বইয়ের পাঠকসংখ্যাও বৃদ্ধি পাচ্ছে।

০৪ জাদুঘর

জাদুঘর বলতে এমন স্থাপনা বা প্রতিষ্ঠানকে বোঝায় যেখানে সভ্যতা ও সংস্কৃতির গুরুত্বপূর্ণ পুরাকীর্তি সংরক্ষণ করা হয়। অতীতকালের গুরুত্বপূর্ণ পুরাকীর্তি ভবিষ্যৎ প্রজন্মের নিকট তুলে ধরার মধ্য দিয়ে ভবিষ্যৎ প্রজন্মকে ইতিহাস-ঐতিহ্য সম্পর্কে সচেতন করাই জাদুঘর প্রতিষ্ঠার মূল উদ্দেশ্য। প্রাচীন মিশরের আলেকজান্দ্রিয়ায় পৃথিবীর প্রথম জাদুঘর স্থাপিত হয়েছিল। বর্তমান বিশ্বের বিখ্যাত জাদুঘরগুলোর মধ্যে ফ্রান্সের ল্যুভর ও গিমে মিউজিয়াম, ব্রিটেনের ব্রিটিশ মিউজিয়াম, ইতালির উপিজি মিউজিয়াম, রাশিয়ার হার্মিটেজ মিউজিয়াম উল্লেখযোগ্য। ঢাকার শাহবাগে বাংলাদেশের সবচেয়ে বড়ো জাদুঘর অবস্থিত। এর নাম বাংলাদেশ জাতীয় জাদুঘর। সুদূর অতীত থেকে নিকট অতীত পর্যন্ত বাংলাদেশের ইতিহাস ও ঐতিহ্যের গুরুত্বপূর্ণ প্রায় সব ধরনের পুরাকীর্তি এখানে সংরক্ষিত আছে। বাংলাদেশে আরও কয়েকটি উল্লেখযোগ্য জাদুঘরের মধ্যে রয়েছে রাজশাহী বিশ্ববিদ্যালয়ের বরেন্দ্র গবেষণা জাদুঘর, চট্টগ্রামে জাতিতাত্ত্বিক জাদুঘর, ঢাকায় মুক্তিযুদ্ধ জাদুঘর, সোনারগাঁয়ে বাংলাদেশ লোকশিল্প জাদুঘর ইত্যাদি। জাদুঘরের পুরাকীর্তিসমূহ নিয়মিত প্রদর্শনের ব্যবস্থা থাকে। যে জাতির ঐতিহ্য যত সমৃদ্ধ, সে জাতির জাদুঘরও তত সমৃদ্ধ।

০৫ স্বাধীনতা দিবস

ছাব্বিশশে মার্চ বাংলাদেশের স্বাধীনতা দিবস। ১৯৭০ সালে পাকিস্তানের জাতীয় পরিষদ নির্বাচনে আওয়ামী লীগ নিরঙ্কুশ বিজয় লাভ করলেও ক্ষমতা হস্তান্তরের ব্যাপারে সামরিক সরকার যড়যন্ত্র শুরু করে। ওই সামরিক সরকার নিয়ন্ত্রিত হতো পশ্চিম পাকিস্তানিদের দ্বারা এবং পশ্চিম পাকিস্তানিদের স্বার্থে। ক্ষমতাসীনরা নির্বাচিত জনপ্রতিনিধিদের হাতে ক্ষমতা হস্তান্তর না করে পঁচিশে মার্চ মধ্যরাতে বাঙালিদের ওপর গণহত্যা শুরু করে। ১৯৪৭ সাল থেকে চব্বিশ বছর ধরে পশ্চিম পাকিস্তানের শাসক শ্রেণি পূর্ব বাংলার ওপর যে নিপীড়ন ও শোষণ চালিয়েছে, নয় মাসের রক্তক্ষয়ী মুক্তিযুদ্ধে তার অবসান ঘটে। ১৯৭১ সালের ১৬ই ডিসেম্বর বাংলাদেশ শত্রুমুক্ত হয়, তাই এই দিন

হলো বাংলাদেশের বিজয় দিবস। অন্যদিকে ১৯৭১ সালের ২৬শে মার্চ থেকেই এ দেশের মানুষ স্বাধীন, কেননা ওই তারিখেই স্বাধীনতার জন্য শুরু হয়েছিল মুক্তিযুদ্ধ। তাই স্বাধীনতা দিবস আমাদের জাতীয় জীবনে অত্যন্ত তাৎপর্যপূর্ণ একটি দিন।

০৬ জাতীয় পতাকা

জাতীয় পতাকা একটি দেশের স্বাধীনতা ও সার্বভৌমত্বের প্রতীক। পৃথিবীর প্রতিটি দেশের আলাদা জাতীয় পতাকা রয়েছে। সাধারণত এক খণ্ড কাপড় দিয়ে জাতীয় পতাকা তৈরি করা হয়। এর আকার সুনির্দিষ্ট। আয়তাকার পতাকাই বেশি। যে দড়ের সঙ্গে পতাকাটি বেঁধে টাঙানো হয়, সেই দড়কে বলে পতাকা-দড়। সরকারি অফিস-আদালত ও শিক্ষাপ্রতিষ্ঠানে নিয়মিতভাবে জাতীয় পতাকা উত্তোলন করা হয়। এছাড়া জাতীয় দিবসগুলোতে দেশের সর্বত্র জাতীয় পতাকা শোভা পায়। আন্তর্জাতিক খেলাধুলার সময়ে কোনো দেশের খেলায়াড়দের সমর্থন করার সময়ে সমর্থকেরা সেই দেশের পতাকা উড়িয়ে থাকে। জাতীয় শোক দিবসে এবং সরকারি ঘোষণা অনুযায়ী কোনো শোক পালন করার সময়ে জাতীয় পতাকাকে অর্ধনমিত করা হয়। অর্থাৎ পতাকা-দড়ের ওপর দিয়ে পতাকার প্রস্থের সমান অংশ বাদ দিয়ে পতাকাটি টাঙানো হয়। বাংলাদেশের জাতীয় পতাকার দৈর্ঘ্য-প্রস্থের অনুপাত ১০ : ৬। এর পাঁচটি পরিমাপ রয়েছে; যথা- ১০ ফুট : ৬ ফুট, ৫ ফুট : ৩ ফুট, ২.৫ ফুট : ১.৫ ফুট, ১৫ ইঞ্চি : ৯ ইঞ্চি এবং ১০ ইঞ্চি : ৬ ইঞ্চি। ‘প্রজাতন্ত্রের জাতীয় পতাকা হচ্ছে সবুজ ক্ষেত্রের ওপর স্থাপিত রক্তবর্ণের একটি ভরাট বৃত্ত।’ বাংলাদেশের জাতীয় পতাকার সবুজ রং সবুজ প্রকৃতি ও তারুণ্যকে নির্দেশ করে এবং উদীয়মান সূর্যের মতো এর লাল বৃত্ত বাংলাদেশের মুক্তিযুদ্ধে আত্মোৎসর্গকারীদের নির্দেশ করে।

০৭ জাতীয় সংগীত

রাষ্ট্রীয়ভাবে স্বীকৃত এক বা একাধিক দেশপ্রেমমূলক গানকে জাতীয় সংগীত হিসেবে বিবেচনা করা হয়। রাষ্ট্রের গুরুত্বপূর্ণ কর্মসূচির সূচনায় বা জাতীয় দিবসসমূহ পালনের সময়ে বিভিন্ন সরকারি অনুষ্ঠানে জাতীয় সংগীত পরিবেশন করা হয়। শিক্ষাপ্রতিষ্ঠানসমূহে প্রতিদিন সকালের সমাবেশে জাতীয় পতাকা উত্তোলনের পাশাপাশি জাতীয় সংগীত গাওয়া হয়। জাতীয় সংগীত পরিবেশনের সময় সমবেত সকলকে উঠে দাঁড়াতে হয়। এটা দেশের প্রতি শ্রদ্ধা জানানোর সামিল। আন্তর্জাতিক ক্রীড়া প্রতিযোগিতায় খেলা শুরুর আগেও প্রতিযোগীরা নিজ নিজ দেশের পতাকা নিয়ে জাতীয় সংগীত পরিবেশন করে। বাংলাদেশের জাতীয় সংগীতের প্রথম লাইন; ‘আমার সোনার বাংলা আমি তোমায় ভালোবাসি।’ বাউল গানের সুরে গানটি রচনা করেছেন বিশুব্র রবীন্দ্রনাথ ঠাকুর। ১৯৭২ সালের ১৩ই জানুয়ারি স্বাধীন বাংলাদেশের মন্ত্রিসভার প্রথম বৈঠকে গানটিকে জাতীয় সংগীতের মর্যাদা দেওয়া হয়। গানটির কথায় বাংলাদেশ এবং বাংলা ভাষার প্রতি গভীর ভালোবাসা প্রতিফলিত হয়েছে। জাতীয় সংগীত দেশের মানুষকে নিজ দেশের প্রতি শ্রদ্ধাবোধ ও দায়বদ্ধ হতে শেখায়।

০৮ কম্পিউটার

আধুনিক বিজ্ঞানের এক বিস্ময়কর অবদান কম্পিউটার। ১৮১২ সালে ব্রিটিশ গণিতবিদ চার্লস ব্যাবেজ প্রথম আধুনিক ক্যালকুলেটরের মূলনীতি পরিকল্পনা করেন। তিনিই আধুনিক কম্পিউটারের জনক। ১৯৪৪ সালে হার্ভার্ড বিশ্ববিদ্যালয় ও আই.বি.এম কোম্পানির যৌথ উদ্যোগে ইলেকট্রো-মেকানিক্যাল কম্পিউটার তৈরি হয়। ১৯৫৭ সালের পর ব্যাপক হারে কম্পিউটারের ব্যবহার শুরু হয় এবং ১৯৭১ সালের পর থেকে কম্পিউটার জগতে বৈপ্লবিক পরিবর্তন সাধিত হতে থাকে। এটি এমন একটি ইলেকট্রনিক যন্ত্র যা অগণিত ডাটা বা উপাত্ত গ্রহণ করে

স্বয়ংক্রিয়ভাবে বিশ্লেষণের মাধ্যমে অতি দ্রুতগতিতে সিদ্ধান্ত গ্রহণ করতে পারে। কম্পিউটার তথ্য গ্রহণ, তথ্য নির্দেশ এবং সংরক্ষণ করে অতি অল্প সময়ের মধ্যে অগণিত জটিল সমস্যার সমাধান নির্দেশ করতে পারে। আভিধানিক অর্থে কম্পিউটার এক ধরনের গণক যন্ত্র হলেও এখন আর কেবল গণনার মধ্যে সীমাবদ্ধ নয়। এর কর্মক্ষেত্র বিচিত্রধর্মী। তথ্যাদির বিশ্লেষণে, তুলনা করায় আর সিদ্ধান্ত প্রদানে এর ক্ষমতা বিস্ময়কর। বাংলাদেশে কম্পিউটার এসেছে আশির দশকে। বিদেশি কোম্পানির মাধ্যমে আগমন ঘটলেও বর্তমানে তা ব্যাপকভাবে সম্প্রসারিত হয়ে বহু অফিসে, কলকারখানায় স্থান করে নিয়েছে। মুদ্রণশিল্পে কম্পিউটার অভাবনীয় অবদান রাখছে। কম্পিউটার গণনাকারী যন্ত্র হলেও বর্তমানে তা অনেক গুরুত্বপূর্ণ কাজের উপযোগী হয়ে উঠেছে।

০৯ মোবাইল ফোন

মোবাইল ফোন হচ্ছে আধুনিক যোগাযোগ প্রযুক্তির এক অন্যতম সংস্করণ। মোবাইল শব্দটির দ্বারা যা বোঝা যায় এটা ঠিক তাই, অর্থাৎ সুবিধাজনক ও সহজেই বহনযোগ্য। এটা একটা ছোটো টেলিফোন সেট যা হাতে অথবা পকেটে বহন করা যায়। মানুষের কথা বলার কার্যকর দূরত্ব মাত্র কয়েক গজ। কিন্তু মোবাইল ফোনের সাহায্যে সে তার কথা বলার পরিধি শত শত মাইলে বৃদ্ধি করেছে। এটা আশ্চর্যের বিষয় যে, একজন লোক রাস্তায় হেঁটে চলার সময় অথবা যানবাহনে যাতায়াতের সময় শত শত মাইল দূরের বন্ধু বা আত্মীয়স্বজনদের সাথে কথা বলছে। এর দ্বারা একজন লোক বিপণি কেন্দ্রে কেনাকাটা করতে থাকা অবস্থায় তার বাড়ি থেকে অথবা দূরবর্তী কোনো স্থান থেকে মূল্যবান কোনো তথ্য পাচ্ছে। কিংবা একজন লোক দূরবর্তী স্থানে ভ্রমণরত অবস্থায় তার বন্ধুদের সাথে অথবা বাড়িতে আত্মীয়দের সাথে কথা বলছে। আর এ সবই হচ্ছে নামমাত্র খরচে। রাজনীতিবিদ, চিত্রশিল্পী, চিকিৎসক, ব্যবসায়ী ও পদস্থ কর্মকর্তাদের মতো গুরুত্বপূর্ণ ব্যক্তিদের জন্য মোবাইল ফোন খুবই দরকারি। কিন্তু বিজ্ঞানের অন্য সব অবদানের মতো এটা পুরাপুরি আশীর্বাদ নয়। মোবাইল ফোন একটি প্রয়োজনীয় যন্ত্র এবং এটা ভালো ও মন্দ উভয় প্রকার লোকই ব্যবহার করতে পারে। পুলিশ বিভাগ এটি ব্যবহার করতে পারে আইন-শৃঙ্খলা রক্ষার্থে ও অপরাধী ধরতে। আর অপরাধীরা এটি অপরাধ করার জন্য ব্যবহার করতে পারে। যা হোক, আধুনিক জীবনরীতিতে মোবাইল ফোন একটি অপরিহার্য সংযোজন।

১০ জন্মদিনের সন্ধ্যা

প্রত্যেক মানুষের কাছে প্রিয় তার জন্মদিন। এই দিনের সন্ধ্যায় তার প্রিয়জনেরা যদি আয়োজন করে জন্মদিনের অনুষ্ঠান, তাহলে এর চেয়ে আনন্দের আর কী থাকে! জন্মদিনের সন্ধ্যায় ঘরকে বেলুন, ফুল ও অন্যান্য উপকরণ দিয়ে সাজানো হয়। তাছাড়া রঙিন আলোর ঝলকানি সৃষ্টি করা হয়। জন্মদিনের সন্ধ্যায় আমন্ত্রিতরা যখন একে একে হাজির হয়, শুভেচ্ছা জানায়, স্মারক হিসেবে কিছু না কিছু উপহার হাতে তুলে দেয়, তখন তা মনকে খুশিতে ভরিয়ে দেয়। এক পর্যায়ে ফুঁ দিয়ে মোমবাতি নিভিয়ে কেক কাটা হয়। জন্মদিনের গান আর করতালিতে মুখরিত হয়ে ওঠে ঘর। সকলের চোখেমুখে বয়ে যায় আনন্দের বন্যা। অধিকাংশ ক্ষেত্রে কেক কাটার পরে থাকে নৈশভোজ। নৈশভোজে থাকে ভালো ভালো খাবারের ব্যবস্থা। সবার জন্মদিনের সন্ধ্যা যে এমন আনন্দের সঙ্গে কাটে, তা নয়। যাদের প্রিয়জনেরা সচ্ছল নয়, তাদের জন্মদিনের সন্ধ্যা হয়তো কোনোরকম আয়োজন ছাড়াই শেষ হয়। তবে আয়োজন হোক বা না হোক, জন্মদিনের সন্ধ্যা মানে জীবন থেকে একটা বছর হারিয়ে যাওয়া আর নতুন একটা বছরের জন্য প্রস্তুত হওয়া।

২. চিঠিপত্র

০১

২রা সেপ্টেম্বর, ২০২...

মতিঝিল, ঢাকা।

শ্রদ্ধেয় মা,

আমার সালাম নিয়ে। আশা করি ভালো আছ।

আমি নিরাপদে ছাত্রাবাসে পৌঁছেছি। যদিও আসার পথে বাড়ির কথা ভেবে আমার মনে খারাপ লাগছিল। প্রতিবারই বাড়ি থেকে আসার সময়ে আমার এ রকম হয়। এসেই জানতে পারলাম আগামী ১০ই নভেম্বর থেকে আমাদের প্রাক-নির্বাচনি পরীক্ষা শুরু হবে। তাই পড়াশোনা নিয়ে খুব ব্যস্ত হয়ে পড়েছি। আমার জন্য দোয়া করো। ছুটিতে বাড়ি গিয়ে লেখাপড়ায় খানিকটা ছেদ পড়েছিল। তাই এখন বেশি পরিশ্রম করে লেখাপড়ার সাময়িক ক্ষতি পুষিয়ে নিচ্ছি। বাংলা, ইংরেজি, গণিতসহ সকল বিষয়েই ভালো প্রস্তুতি হয়েছে। মা, আমি তোমাকে আমার জীবনের লক্ষ্যের কথা জানিয়েছি। আমি সেই লক্ষ্য পূরণে যথাসাধ্য চেষ্টা করব, তোমাদের মুখ উজ্জ্বল করার চেষ্টা করব। আসার সময়ে মেহরাবকে কিছুটা অসুস্থ দেখে এসেছি। এখন ও কেমন আছে, জানিয়ে। বাবাকে শরীরের প্রতি যত্ন নিতে বলো। আমার জন্য চিন্তা করো না। আমি এখন ভালো আছি। ইতি

তোমার স্নেহের

মাহের

ডাকটিকিট

প্রেরক

মাহের আবদুল্লাহ

২৪ আরামবাগ

মতিঝিল,

ঢাকা-১০০০।

প্রাপক

ফারজানা রাহমান

প্রযত্নে : আবদুল্লাহ আল মামুন

গ্রাম : কামরানির চর, ডাকঘর : পাঁচগাঁও

উপজেলা : আড়াইহাজার, জেলা : নারায়ণগঞ্জ

০২

২৩শে নভেম্বর, ২০২...

তেজগাঁও, ঢাকা।

স্নেহের মাসুমা,

আমার দোয়া নিয়ে। আশা করি আল্লাহর রহমতে ভালো আছ।

গত চিঠিতে তোমার প্রাক-নির্বাচনি পরীক্ষার ফলাফল জেনেছি। প্রায় সবগুলো বিষয়ে ভালো করেছ। গণিতে খানিকটা কম নম্বর পেয়েছ। এতে ঘাবড়ে যাওয়ার কিছু নেই। গণিতের কোন বিষয়গুলো বুঝতে এখনও সমস্যা হচ্ছে, তা আগে শনাক্ত করো। প্রয়োজনে তোমার ক্লাসের গণিত শিক্ষকের সহযোগিতা নাও। মুখস্থ না করে বুঝে পড়ার চেষ্টা করো। সামনে তোমার নির্বাচনি পরীক্ষা এবং এসএসসি পরীক্ষারও খুব বেশি দেরি নেই। তাই এই সময়টা খুব ভালোভাবে কাজে লাগাতে হবে। জীবনে প্রতিটি মুহূর্তকে ইতিবাচকভাবে কাজে লাগাতে হবে। পরীক্ষা শিক্ষাজীবনের একটি অংশ। তাই পরীক্ষাকে ভয় পাওয়ার কিছু নেই। এই সময়ে কীভাবে সুস্থ থেকে নিয়মানুযায়ী পড়াশোনা করা যায়, সেদিকে খেয়াল রেখো। বেশি রাত জেগো না, যথাসময়ে খাবার খেয়ো। আমরা বাসার সবাই ভালো আছি। ইতি

তোমার বাবা

ইবরাহীম

ই-মেইলে পাঠানোর জন্য ঠিকানা ও বিষয় :

প্রেরক : ibrahim@gmail.com

প্রতি : masud@gmail.com

বিষয় : উপদেশ

০৩

২২শে ফেব্রুয়ারি, ২০২...

মিরাজার, সিলেট।

জনাব আহমদ সাদিক,

আমার শুভেচ্ছা ও শ্রদ্ধা গ্রহণ করুন। আমি আপনার পূর্বপরিচিত নই। আমি আপনার বইয়ের একজন পাঠক। এবারের একুশের বইমেলায় প্রকাশিত আপনার 'বাংলাদেশের প্রান্তিক-উৎসব' বইটি আমি পড়েছি। বইটি বইমেলা থেকেই সংগ্রহ করেছি। প্রত্যাশা ছিল আপনার সঙ্গে দেখা হবে, আপনার স্বাক্ষর-সংবলিত বইটি পাব। কিন্তু সেদিন আপনি স্টলে আসেননি। আমাকেও পরদিন সিলেটে ফিরতে হয়েছে।

সম্প্রতি 'বাংলাদেশের প্রান্তিক-উৎসব' বইটি পড়ে আমি খুব উপকৃত হয়েছি। মূলধারার উৎসবের পাশাপাশি বাংলাদেশের প্রান্তিক অঞ্চলে যে কত উৎসব আছে, তা আপনার বই পড়ার আগে জানতে পারিনি। আপনি একজন নিষ্ঠাবান গবেষক হিসেবে অনেক আগে থেকেই পরিচিত। এই বই রচনায় আপনার সেই যোগ্যতার যথাযথ প্রতিফলন ঘটেছে। আমি বেশি খুশি হয়েছি এই জন্য যে, সিলেট অঞ্চলের মণিপুরি, খাসিয়া ও চা-শ্রমিকদের উৎসবের কথা আপনার বইয়ে বিস্তারিতভাবে উল্লেখ করেছেন। বইটির ভাষা ও অধ্যায়-বিভাজন আমার কাছে আকর্ষণীয় মনে হয়েছে। ৩১২ পৃষ্ঠার বইটি আমি দুই দিনে পড়ে শেষ করেছি।

আপনার সঙ্গে দেখা করার প্রত্যাশা রইল। যদি কখনও সিলেটে আসেন, আমাকে জানালে ও আমাদের বাসায় আতিথ্য গ্রহণ করলে খুশি হব। আপনার জন্য শুভ কামনা। ইতি

আতিকুল ইসলাম

০৪ রবীন্দ্র জয়ন্তী ১৪৩...

সুধী,

আগামী ২৫শে বৈশাখ, ১৪৩..., শনিবার ৮ই মে, ২০২... সকাল ১০টায় রবীন্দ্রনাথ ঠাকুরের ১৬২তম জন্মবার্ষিকী উপলক্ষ্যে জামালপুর জিলা স্কুলের সাংস্কৃতিক পরিষদের উদ্যোগে স্কুল-মিলনায়তনে একটি আলোচনা সভা ও সাংস্কৃতিক অনুষ্ঠানের আয়োজন করা হয়েছে। অনুষ্ঠানে প্রধান অতিথি হিসেবে উপস্থিত থাকতে সদয় সম্মতি জ্ঞাপন করেছেন, জামালপুর জেলার মাননীয় জেলা প্রশাসক জনাব 'ক'। 'রবীন্দ্রনাথের শিক্ষাদর্শন' বিষয়ে মূল প্রবন্ধ উপস্থাপন করবেন সরকারি বিনোদ বিহারী কলেজের সহযোগী অধ্যাপক জনাব 'খ'। অনুষ্ঠানে সভাপতিত্ব করবেন স্কুলের প্রধান শিক্ষক জনাব ফয়সাল আহমদ।

অনুষ্ঠানে আপনার উপস্থিতি আন্তরিকভাবে কামনা করি।

মো: মুশফিক

সাংস্কৃতিক সম্পাদক

জামালপুর জিলা স্কুল ছাত্রসংসদ

অনুষ্ঠানসূচি :

- ১০:০০ : অতিথিদের আসন গ্রহণ
- ১০:০৫ : 'রবীন্দ্রনাথের শিক্ষাদর্শন' শীর্ষক প্রবন্ধ পাঠ
- ১০:৩০ : প্রধান অতিথির ভাষণ
- ১০:৪৫ : সভাপতির ভাষণ
- ১১:০০ : সাংস্কৃতিক অনুষ্ঠান : ইসলামি সংগীত ও আবৃত্তি
- ০১:৩০ : নাটক 'চিরকুমার সভা'
- ০২:০৫ : অনুষ্ঠানের সমাপ্তি

০৫ সুধী,

আগামী ১৯শে মার্চ, ২০২... শুব্রবার বিকাল ৪টা ৩০ মিনিটে কুমিল্লা টাউন হল মিলনায়তনে অধ্যাপক-গবেষক নূরুল আলমের ৭৫তম জন্মবার্ষিকী উপলক্ষ্যে একটি নাগরিক সংবর্ধনার আয়োজন করা

হয়েছে। অনুষ্ঠানে প্রধান অতিথির আসন অলংকৃত করবেন ঢাকা বিশ্ববিদ্যালয়ের ইতিহাস বিভাগের অধ্যাপক শফিকুল ইসলাম। বিশেষ অতিথি হিসেবে উপস্থিত থাকবেন কুমিল্লা বিশ্ববিদ্যালয়ের বাংলা বিভাগের অধ্যাপক আকতার হোসেন। অনুষ্ঠানে সভাপতিত্ব করবেন কথাসাহিত্যিক নোমান রায়হান।

অনুষ্ঠানে আপনার সর্বান্ধব উপস্থিতি কামনা করছি।

শামীম খান

আহ্বায়ক

নূরুল আলম সংবর্ধনা পরিষদ

অনুষ্ঠানসূচি :

- ৪:৩০ : অতিথিদের আসন গ্রহণ
৪:৩৫ : সূচনা সংগীত
৪:৫০ : স্বাগত বক্তব্য
৫:০০ : সংবর্ধনা গ্রন্থের মোড়ক উন্মোচন
৫:১০ : ক্রেস্ট প্রদান
৫:১৫ : বিশেষ অতিথিদের শুভেচ্ছা বক্তব্য
৫:৪৫ : প্রধান অতিথির বক্তব্য
৫:৫৫ : অধ্যাপক নূরুল আলমের প্রতিক্রিয়া
৬:১০ : সভাপতির বক্তব্য
৬:৩০ : সমাপ্তি ঘোষণা

০৬ ৩রা জুন, ২০২...

সম্পাদক,

দৈনিক সমকাল,

১৩৬ তেজগাঁও শিল্প এলাকা, ঢাকা।

বিষয় : 'চিঠিপত্র' কলামে প্রকাশের জন্য পত্র।

মহোদয়,

আপনার বহুল প্রচারিত দৈনিকে সংযুক্ত পত্রটি প্রকাশ করার জন্য বিনীত অনুরোধ জানাই।

বিনীত

মো: সামি

জুলগাঁও, শ্রীবর্দী, শেরপুর।

জুলগাঁও স্বাস্থ্যকেন্দ্রের দিকে নজর দিন

শেরপুর জেলার শ্রীবর্দী উপজেলার জুলগাঁও একটি সীমান্তবর্তী গ্রাম। দুই দশক আগে কমিউনিটি স্বাস্থ্য প্রকল্পের আওতায় পাহাড়-টিলা-বন পরিবেষ্টিত দুর্গম এ অঞ্চলের সাধারণ মানুষের চিকিৎসাসেবা দেওয়ার জন্য স্বাস্থ্যকেন্দ্রটি প্রতিষ্ঠা করা হয়। আশেপাশের ছয়টি গ্রামের দশ হাজার মানুষ এই স্বাস্থ্যকেন্দ্র থেকে চিকিৎসা গ্রহণ করে। কিন্তু গত কয়েক বছর ধরে এখানকার চিকিৎসাব্যবস্থা সম্পূর্ণ ভেঙে পড়েছে। স্বাস্থ্যকেন্দ্রের জন্য অন্তত পাঁচ জন চিকিৎসক থাকার কথা, আছেন তিন জন; তাঁরাও নিয়মিত আসেন না। ভবনটিও সংস্কারের অভাবে জরাজীর্ণ হয়ে পড়েছে। নিয়মিত ওষুধের সরবরাহ নেই। সাধারণ মানুষ যথাযথ চিকিৎসা না পেয়েই ফিরে যাচ্ছে। ধনাঢ্য ব্যক্তিরা হয়তো জেলাশহরে বা ঢাকায় গিয়ে চিকিৎসাসেবা গ্রহণ করতে পারে। কিন্তু দরিদ্র জনগোষ্ঠীকে স্বাস্থ্যসেবা পেতে ভোগান্তির শিকার হতে হচ্ছে।

এলাকাবাসীর দাবি, এই করুণ অবস্থা থেকে স্বাস্থ্যকেন্দ্রটিকে রক্ষা করা হোক। স্বাস্থ্যসেবা মানুষের মৌলিক অধিকার। যথাযথ কর্তৃপক্ষ অবিলম্বে জুলগাঁও স্বাস্থ্যকেন্দ্রটির নিয়মিত চিকিৎসাসেবা নিশ্চিত করতে প্রয়োজনীয় ব্যবস্থা গ্রহণ করবেন বলে জুলগাঁও গ্রামের সাধারণ মানুষ প্রত্যাশা করে।

মো: সামি

জুলগাঁও, শেরপুর।

০৭ ২রা জুলাই, ২০২...

বরাবর

সম্পাদক,

দৈনিক প্রথম আলো,

২০-২১ কারওয়ান বাজার, ঢাকা ১২১৫।

বিষয় : চিঠিপত্র কলামে নিচের সংবাদটি প্রকাশের আবেদন।

জনাব,

বহুল প্রচারিত 'দৈনিক প্রথম আলো' পত্রিকায় নিম্নলিখিত পত্রটি চিঠিপত্র কলামে প্রকাশ করে বাধিত করবেন।

নিবেদক

ফয়সাল আহমেদ

সড়ক দুর্ঘটনার প্রতিকার চাই

সড়ক দুর্ঘটনা আজকাল আমাদের দেশে নৈমিত্তিক ব্যাপার হয়ে দাঁড়িয়েছে। প্রতিদিন খবরের কাগজ খুললেই চোখে পড়ে মর্মান্তিক সড়ক দুর্ঘটনার মতো ভয়াবহ খবর। অথচ আমরা একটু সতর্ক হলেই দুর্ঘটনার মতো অস্বাভাবিক মৃত্যুকে এড়াতে পারি। আমাদের দেশে দুর্ঘটনাগুলো সাধারণত কয়েকটি কারণে হয়ে থাকে। উদাহরণস্বরূপ, এক শ্রেণির অসৎ মালিক লোভের মোহে ত্রুটিপূর্ণ যানবাহন রাস্তায় নামিয়ে টাকা আয়ের চেষ্টা চালাচ্ছে। তারা অদক্ষ ড্রাইভারদের হাতে চাবি তুলে দিচ্ছে। ড্রাইভারদের প্রতিযোগিতামূলক মন মানসিকতা এবং অনেক সময় অতিরিক্ত আয়ের লোভে ধারণক্ষমতার চেয়ে বেশি যাত্রী বহনও দুর্ঘটনার কারণ হয়ে দাঁড়ায়। এছাড়া জনসাধারণের রাস্তা পারাপারে অসতর্কতা ও অজ্ঞতাও দুর্ঘটনার আর একটি কারণ। আমরা যদি এ বিষয়গুলোর দিকে একটু নজর দিই তাহলে দুর্ঘটনা অনেকাংশে রোধ করা সম্ভব। দুর্ঘটনা রোধকল্পে আরও কিছু প্রয়োজনীয় ব্যবস্থা নিলে দুর্ঘটনা কমে যাবে। যেমন- উপযুক্ত প্রশিক্ষণের মাধ্যমে ড্রাইভিং লাইসেন্স প্রদান, রাস্তাঘাট সংস্কার, প্রশস্তকরণ, নতুন নতুন ওভারব্রিজ তৈরি করা, অতিরিক্ত যাত্রী পরিবহণ রোধকরণ এবং ট্র্যাফিক সিগন্যাল ব্যবস্থার উন্নয়ন। এর পাশাপাশি পরিবহণের সাথে সরকারের সংশ্লিষ্ট ব্যক্তিবর্গের কেউ পরিবহণ আইন অমান্য করলে তাদের বিরুদ্ধে শাস্তিমূলক ব্যবস্থা নিতে হবে। দুর্ঘটনা সম্পর্কে এমন মানসিকতা গড়ে তুলতে হবে যে, দুর্ঘটনা আসলে দৈব কোনো কিছু নয়। একটু সতর্ক থাকলেই তা রোধ করা সম্ভব।

মোটকথা, পথচারী থেকে শুরু করে যাত্রী, ড্রাইভার, গাড়ির মালিক সবাই সচেতন থাকলে সড়ক দুর্ঘটনা অনেকাংশ রোধ করা সম্ভব হবে।

নিবেদক

ফয়সাল আহমেদ

সরকারি আলিয়া মাদরাসা, সিলেট।

০৮ ১৫ই মার্চ, ২০২...

বরাবর

জেলা প্রশাসক, পিরোজপুর।

বিষয় : পাঠাগার স্থাপনের জন্য আর্থিক সাহায্যের আবেদন।

জনাব,

বিনীত নিবেদন এই যে, আমরা পিরোজপুর জেলার অন্তর্গত 'ক' থানার অধীনে শ্রীপুর গ্রামের নিবাসী। এ গ্রামের লোকসংখ্যা প্রায় ছয় হাজার। গ্রামে শিক্ষিতের হার দ্রুত বৃদ্ধি পাচ্ছে। এখানে একটি বড়ো গ্রাম্য বাজার ও নানা ছোটো শিল্প কারখানা, মাদরাসা, একটি ক্লাবঘর ও অন্যান্য প্রতিষ্ঠান আছে। কিন্তু পরিতাপের বিষয়, জ্ঞানপিপাসু ছেলেমেয়েদের জ্ঞানপিপাসা মেটানোর জন্য কোনো পাঠাগার নেই। ফলে শিল্প-সাহিত্য সম্পর্কে প্রভূত জ্ঞানার্জন করা সম্ভব হচ্ছে না। গ্রামে উঠতি বয়সি যুবক ছেলেরা নানা রকম আড্ডাবাজিতে সময় নষ্ট

করছে। এতে কারও কারও বিপথগামী হওয়ার সম্ভাবনাও আছে। তাই গ্রামে একটি সাধারণ পাঠাগার স্থাপন করা একান্ত প্রয়োজন হয়ে পড়েছে। ইতঃপূর্বে এ ব্যাপারে কয়েকবার আবেদন করেও কোনোপ্রকার সাড়া পাওয়া যায়নি।

এমতাবস্থায়, মহোদয়ের কাছে বিনীত অনুরোধ যে, এই গ্রামে একটি পাঠাগার স্থাপনের জন্য কমপক্ষে পঞ্চাশ হাজার টাকা আর্থিক অনুদান প্রদান করে বাধিত করবেন।

বিনীত

হাসানুর রহমান

শ্রীপুর গ্রামবাসীর পক্ষে।

০৯ ২৫শে মার্চ, ২০২...

বরাবর

অধ্যক্ষ,

‘ক’ কামিল মাদরাসা, ঢাকা।

বিষয় : সহকারী শিক্ষক পদে নিয়োগের নিমিত্ত আবেদন।

জনাব,

যথাবিহিত সম্মানপূর্বক নিবেদন এই যে, গত ২০শে মার্চ, ২০২... তারিখে ‘দৈনিক নয়াদিগন্ত’ পত্রিকায় প্রকাশিত নিয়োগ বিজ্ঞপ্তির মাধ্যমে জানতে পারলাম যে, ‘ক’ কামিল মাদরাসায় অনতিবিলম্বে একজন সহকারী শিক্ষক/প্রভাষক নিয়োগ প্রদান করা হবে। উল্লিখিত পদের জন্য একজন আগ্রহী প্রার্থী হিসেবে আমার জীবনবৃত্তান্তের একটি বিবরণী আপনার সহৃদয় বিবেচনার জন্য প্রদত্ত হলো :

- ১। নাম : গোলাম জাকারিয়া
- ২। পিতার নাম : জালাল আহমদ
- ৩। মাতার নাম : নূরজাহান বেগম
- ৪। স্থায়ী ঠিকানা : উত্তর আলামপুর, পো : সিলেটীয়া বাজার, থানা : দাগনভূঞা, জেলা : ফেনী।
- ৫। বর্তমান ঠিকানা : পুরাতন পুলিশ কোয়ার্টার, ফেনী।
- ৬। জন্মতারিখ : পয়লা জানুয়ারি, ১৯৯৪।
- ৭। জাতীয়তা : বাংলাদেশি
- ৮। বৈবাহিক অবস্থা : বিবাহিত
- ৯। ধর্ম : ইসলাম
- ১০। শিক্ষাগত যোগ্যতা :

পরীক্ষার নাম	পাসের সাল	ফলাফল	গ্রুপ/বিভাগ	বোর্ড/বিশ্ববিদ্যালয়
দাখিল	২০১১	প্রথম	মানবিক	মাদরাসা বোর্ড
আলিম	২০১৩	দ্বিতীয়	মানবিক	মাদরাসা বোর্ড
বিএ (অনার্স)	২০১৭	দ্বিতীয়	বাংলা	জাতীয় বিশ্ববিদ্যালয়
এমএ	২০১৮	দ্বিতীয়	বাংলা	জাতীয় বিশ্ববিদ্যালয়

- ১১। অভিজ্ঞতা : বাদশাহ ফাহাদ কলেজে প্রভাষক (বাংলা) পদে চাকরি করেছি দুই বছর এবং বর্তমানে মেহেদীপুর সরকারি প্রাথমিক বিদ্যালয়ে ‘সহকারী শিক্ষক’ পদে কর্মরত আছি।

অতএব, বিনীত প্রার্থনা উপর্যুক্ত তথ্যের নিরিখে ও প্রতিযোগিতামূলক পরীক্ষার মাধ্যমে আমার মেধা ও দক্ষতা যাচাইপূর্বক উক্ত পদে নিয়োগদানের ব্যবস্থা করতে আপনার একান্ত মর্জি হয়।

নিবেদক

আপনার বিশ্বস্ত

গোলাম জাকারিয়া

সংযুক্তি :

- ১। সকল শিক্ষাগত যোগ্যতার সনদপত্রের সত্যায়িত অনুলিপি।
- ২। সদ্য তোলা তিন কপি পাসপোর্ট সাইজের সত্যায়িত ছবি।
- ৩। নাগরিকত্ব সনদের সত্যায়িত অনুলিপি।

১০ ২রা ফেব্রুয়ারি, ২০২...

তানভীর লাইব্রেরি, চান্দ্রা।

বরাবর

ম্যানেজার,

পাবলিকেশন্স,

১৪ প্যারিদাস রোড, ঢাকা।

বিষয় : ভিপিযোগে বই পাঠানোর অনুরোধ।

জনাব,

সবিনয় নিবেদন, পত্র পাওয়ার সাথে সাথে আপনাদের সদ্য প্রকাশিত নিম্নলিখিত বইগুলো অনুগ্রহ করে ভিপিযোগে পাঠিয়ে বাধিত করবেন। বইগুলো পৌছানো মাত্র আমি মূল্য পরিশোধপূর্বক ভিপি ছাড়িয়ে নেব ইনশাআল্লাহ।

আপনার বিশ্বস্ত-

মোঃ আল আমিন

বইয়ের তালিকা

বইয়ের নাম	লেখক	বই সংখ্যা
১. দাখিল আরবি ব্যাকরণ	অধ্যক্ষ মুহা. শাহজাহান	৫টি
২. দাখিল স্টাডি সিরিজ	সম্পাদনা পর্যদ	১ সেট
৩. দাখিল শব্দশৈলী	বাংলা মেজবাউল হাসান	২টি
ভাষার ব্যাকরণ ও নির্মিত		

ডাকটিকিট	
প্রেরক	প্রাপক
মোঃ আল আমিন	ম্যানেজার
তানভীর লাইব্রেরি, চান্দ্রা,	পাবলিকেশন্স
ফরিদগঞ্জ, চাঁদপুর	১৪ প্যারিদাস রোড, ঢাকা-১১০০

১১

কাপাসিয়া, গাজীপুর।

১০ই জুন, ২০২...

প্রিয় আরিফ,

পত্রের শুরুতে আমার শুভেচ্ছা ও ভালোবাসা নিও। আশা করি মহান আল্লাহর রহমতে বাড়ির সবাইকে নিয়ে ভালো আছ। মহান আল্লাহর করুণায় আমরাও ভালো আছি। পরীক্ষার পর ছুটি কাটাচ্ছি স্বচ্ছন্দে ও সানন্দে।

আমার দাখিল পরীক্ষা শেষ হয়েছে। আল্লাহর রহমতে পরীক্ষা খুব ভালো হয়েছে। আমার একান্ত বিশ্বাস, রেজাল্ট খুবই ভালো হবে ইনশা আল্লাহ। আমার দৃঢ় প্রত্যাশা, A+ নিয়ে আমি পাস করতে পারব, বাকি আল্লাহর ইচ্ছা।

পরীক্ষা-পরবর্তী প্রায় দুই মাস সময় পাচ্ছি। আমি এ দীর্ঘ সময়টার সর্বোচ্চ সদ্ব্যবহার করব বলে পরিকল্পনা নিয়েছি। পড়াশোনার মাধ্যমে আমি এ সময়টা কাটাতে চাই। আমি ইংরেজি গ্রামার ও আরবি সাহিত্যসহ ইসলামি সাহিত্যে গভীর জ্ঞান অর্জনের লক্ষ্যে পড়াশোনা চালিয়ে যাব। একই সাথে বর্তমান বিশ্বের সর্বাধুনিক প্রযুক্তি কম্পিউটারের কয়েকটা প্রোগ্রাম শিখতে চাই। তাই এই দুই মাস আমি ঢাকায় ভাইয়ার বাসায় অবস্থান করব স্থির করেছি।

পরীক্ষার রেজাল্ট প্রকাশের পর আমি ঢাকার বড়ো একটা মাদরাসায় ভর্তি হব বলে পরিকল্পনা নিয়েছি। আলিম শ্রেণিতে আরও ভালো রেজাল্ট করে বিশ্ববিদ্যালয়ে ভালো একটা বিষয়ে ভর্তি হব— এটাই আমার স্বপ্ন। তাই আমাকে ইংরেজি, বাংলা ও আরবি সাহিত্যে সর্বোচ্চ ব্যুৎপত্তি অর্জন করতে হবে। এ লক্ষ্য অর্জনে আমি দৃঢ় পদক্ষেপে অগ্রসর হতে চাই। তুমি আমার জন্য দোয়া করো। গ্রীষ্মের ছুটিতে আমাদের বাড়িতে বেড়াতে এসো, দাওয়াত রইল। তোমার আব্বা-আম্মাসহ বাসার সবাইকে শ্রেণিমতো সালাম, শুভেচ্ছা ও স্নেহশিষি জানিয়ে এখানেই শেষ করছি। ইতি

তোমার একান্ত শ্রুতাধী
আবদুর রহমান

১২

সূত্রাপুর, ঢাকা।

৫ই আগস্ট, ২০২...

প্রিয় হাবিব,

আমার ভালোবাসা নিও। গত সপ্তাহে তোমার চিঠি পেয়ে জানতে পারলাম যে, তুমি দাখিল পরীক্ষায় A+ পেয়ে কৃতিত্বের সাথে পাস করেছ। তোমার এ চিঠি পেয়ে আমি কী যে আনন্দিত হয়েছি তা ভাষায় প্রকাশ করতে পারব না। তোমার এই অসাধারণ ফলাফলের সংবাদ পেয়ে আমাদের পরিবারের সবাই খুশি হয়ে তোমার প্রশংসা করেছে। আমিও এজন্য তোমাকে জানাই আমার আন্তরিক অভিনন্দন। তোমার ফলাফল ভালো হবে— এ ধারণা আমার ছিল। তুমি তোমার পরিশ্রম ও মেধার যথার্থ স্বীকৃতি পেয়েছ বলে আমার বিশ্বাস। তবে মনে রেখ, এখানেই তোমার শেষ নয়। তোমার জীবনের অনেক পথ এখনও বাকি। তাই আমি কামনা করি, জীবনের অবশিষ্ট ধাপগুলোতেও তুমি এমনিভাবে সাফল্য অর্জন করবে। মনে রাখবে, তোমার কাছে এদেশ ও জাতির অনেক প্রত্যাশা। আশা করি, দেশবাসীর প্রত্যাশা পূরণে তুমি সমর্থ হবে। আমি আগামী মাসে বাড়ি আসব ইনশা আল্লাহ।

সবশেষে তোমার বাবা-মা, ভাইবোন ও বন্ধুমহল সবার কাছে শ্রেণিমতো সালাম ও স্নেহ জানিয়ে আজকের মতো এখানেই রাখছি। ইতি

তোমারই
খোরশেদ

১৩

১০৯, তামীরুল মিল্লাত মাদরাসা হোস্টেল, ঢাকা

২রা মার্চ, ২০২...

শ্রদ্ধেয় আব্বাজান,

আসসালামু আলাইকুম ওয়া রাহমাতুল্লাহ। আশা করি মহান আল্লাহর সীমাহীন কৃপায় বাড়ির সবাই ভালো আছেন। আপনার দোয়ার বরকতে ও আল্লাহ তায়ালার রহমতে আমিও ভালো আছি।

পর সংবাদ, আমাদের দাখিল পরীক্ষা আগামী ১লা মে শুরু হবে। আমার পরীক্ষার প্রস্তুতি এখন চূড়ান্ত পর্যায়ে। আল্লাহর রহমতে আমার প্রস্তুতি খুবই ভালো। কাজকিত রেজাল্ট প্রাপ্তির লক্ষ্যে আমি ব্যক্তিগতভাবে সব বিষয়ে হ্যাণ্ড নোট প্রস্তুত করেছি এবং সম্ভাব্য সব প্রশ্নের উত্তর যথাযথ আয়ত্তে এনেছি। বীজগণিতে আমি কিছুটা দুর্বল ছিলাম। আলহামদুলিল্লাহ, গত মাসের শেষাবধি প্রাইভেট টিউটরের মাধ্যমে বীজগণিতও আয়ত্তে আনতে সক্ষম হয়েছি। এ মুহুর্তে পরীক্ষার অপেক্ষায় আছি। আমার একান্ত বিশ্বাস, আমি জিপিএ ৫.০০ পেয়ে দাখিল পরীক্ষায় উত্তীর্ণ হব ইনশাআল্লাহ।

আমার জন্য নামাযান্তে আল্লাহর দরবারে বিশেষভাবে দোয়া করবেন। আম্মাকে আমার জন্য দোয়া করতে বলবেন। আম্মাসহ বাড়ির সবার প্রতি সালাম জানিয়ে আজকের মতো এখানেই ইতি টানছি। মাআসসালাম

আপনার স্নেহধন্য
মোহাম্মদ সাইফুল্লাহ

১৪ ১০ই আগস্ট, ২০২...

বরাবর

অধ্যক্ষ,

কলতাপাড়া ফাযিল (ডিগ্রি) মাদরাসা, সোনারগাঁ, নারায়ণগঞ্জ।

বিষয় : মাদরাসার ভেতরে ক্যান্টিন স্থাপনের জন্য আবেদন।

মহাত্মন,

সবিনয় নিবেদন এই যে, আমরা প্রায় পাঁচশ ছাত্র আপনার মাদরাসায় অধ্যয়ন করছি। আমাদের অনেকের বাড়ি দূরে হওয়ায় টিফিনের সময় বাড়ি গিয়ে খাবার খেয়ে ক্লাস করা সম্ভব হয় না। তাছাড়া মাদরাসার কাছে কোনো ভালো রেস্টুরেন্ট না থাকায় টিফিন পিরিয়ডে ছাত্ররা যত্রতত্র নাস্তা করে থাকে। এতে টাকাও যেমন বেশি খরচ হয় তেমনি নেংরা পরিবেশে খাবার গ্রহণ করার ফলে ছাত্রদের স্বাস্থ্যেরও ক্ষতি হয়ে থাকে। তাই, মাদরাসা প্রাঙ্গণে কর্তৃপক্ষের তত্ত্বাবধানে একটি ক্যান্টিন স্থাপন করলে ছাত্রদের এ দুর্ভোগ লাঘব হতে পারে। তাতে ছাত্রদের অর্থের যেমন সাশ্রয় হবে তেমনি স্বাস্থ্যেরও কোনো ক্ষতি হবে না।

অতএব, মহোদয়ের কাছে বিনীত নিবেদন, অনুগ্রহপূর্বক মাদরাসা প্রাঙ্গণে একটি ক্যান্টিন স্থাপন করে মাদরাসার ছাত্রদের জন্য স্বাস্থ্যসম্মত খাবারের সুযোগ সৃষ্টি করে বাধিত করবেন।

বিনীত নিবেদক

কলতাপাড়া ফাযিল (ডিগ্রি) মাদরাসার শিক্ষার্থীদের পক্ষে

মোঃ মারুফ আলম

১৫ ৫ই এপ্রিল, ২০২...

মাননীয়

অধ্যক্ষ,

সিলোনিয়া ফাযিল মাদরাসা, ফেনী।

বিষয় : তিন দিনের ছুটির জন্য আবেদন।

জনাব,

যথাবিহিত সম্মান প্রদর্শনপূর্বক নিবেদন এই যে, আগামী ১০ই এপ্রিল আমার বড়ো বোনের শুভ বিবাহ অনুষ্ঠান সুসম্পন্ন হবে। উক্ত অনুষ্ঠানের কাজে আমাকে ৯ই এপ্রিল হতে ১১ই এপ্রিল পর্যন্ত বাড়িতে অবস্থান করতে হবে। তাই উক্ত তিন দিন আমার পক্ষে মাদরাসায় উপস্থিত থাকা সম্ভব হবে না।

অতএব, ভুজুর সমীপে একান্ত আরজ, আমাকে উল্লিখিত তিন দিনের ছুটি মঞ্জুর করে আপনার চির কৃতজ্ঞতাপাশে আবদ্ধ করবেন।

নিবেদক

আপনার একান্ত অনুগত ছাত্র

সালেহ আহমদ

দাখিল নবম শ্রেণি, ক্রমিক নং-১

১৬ ২১শে ডিসেম্বর, ২০২...

বরাবর

অধ্যক্ষ,

মহাখালী দারুল উলুম হোসাইনিয়া কামিল মাদরাসা, ঢাকা।

বিষয় : ছাড়পত্রের জন্য আবেদন।

জনাব,

বিনীত নিবেদন এই যে, আমি আপনার মাদরাসার একজন নবম শ্রেণির ছাত্র। বিগত দু'বছর ধরে আমি এই মাদরাসায় অধ্যয়ন করছি। আমার আব্বা একজন সরকারি চাকরিজীবী। বর্তমানে তাঁকে টাকা থেকে সিলেটে বদলি করা হয়েছে। কাজেই পরিবারের সবার সঙ্গে আমাকেও সিলেটে অবস্থান করে পড়াশোনা করতে হবে।

অতএব, সবিনয় প্রার্থনা এই যে, আমাকে আপনার মাদরাসা পরিত্যাগের একখানা ছাড়পত্র প্রদান করে বাধিত করতে আপনার মর্জি হয়।

বিনীত

আপনার একান্ত অনুগত ছাত্র

আমিনুল ইসলাম

দাখিল নবম শ্রেণি, রোল-৫

১০০

বাংলা দ্বিতীয় পত্র

৩. সংবাদ প্রতিবেদন

০১ বালুটিলা উচ্চ বিদ্যালয়ে নবীনবরণ অনুষ্ঠিত

নিজস্ব প্রতিবেদক, বান্দরবান, ২৯শে জানুয়ারি, ২০২২... : বান্দরবান জেলার থানচি উপজেলার বালুটিলা উচ্চ বিদ্যালয় প্রাঙ্গণে গত ১৫ই জানুয়ারি, ২০২২... রবিবার বিদ্যালয়ের নবীন শিক্ষার্থীদের জন্য নবীনবরণ অনুষ্ঠিত হয়।

সকাল ৮টায় কিরাত পরিবেশনের মধ্য দিয়ে অনুষ্ঠান শুরু হয়। এই অনুষ্ঠানের শূভ উদ্বোধন করেন বিশিষ্ট শিক্ষাবিদ অধ্যক্ষ আনোয়ার হোসেন। এরপর স্থানীয় ‘ক’ মাদরাসার বরণ্য তিনজন শিক্ষককে সম্মাননা প্রদান করেন প্রাক্তন শিক্ষার্থীরা। তারপর শুরু হয় স্মৃতিচারণ অনুষ্ঠান। ছাত্রছাত্রীরা একে একে বালুটিলা স্কুল সংক্রান্ত তাদের জীবনের নানা ঘটনার স্মৃতিচারণ করতে থাকে।

অনুষ্ঠানে প্রধান অতিথি হিসেবে উপস্থিত ছিলেন বালুটিলা ইউনিয়ন পরিষদ চেয়ারম্যান ও বিদ্যালয় পরিচালনা কমিটির সভাপতি জনাব আরিফুল হক। তিনি বলেন, এই এলাকার ছাত্রছাত্রীদের শিক্ষিত করে তোলার জন্য বিদ্যালয়টি গুরুত্বপূর্ণ ভূমিকা পালন করে যাচ্ছে। নবীন শিক্ষার্থীদের তিনি মনোযোগ দিয়ে পড়াশোনা করার আহ্বান জানান।

বালুটিলা উচ্চ বিদ্যালয়ের প্রধান শিক্ষক অজয় ত্রিপুরা এই নবীনবরণ অনুষ্ঠানে সভাপতিত্ব করেন। অনুষ্ঠানে অন্যান্যের মধ্যে বক্তৃতা করেন বিশিষ্ট সমাজকর্মী মিজানুর রহমান, বালুটিলা প্রাথমিক বিদ্যালয়ের প্রধান শিক্ষক মুহিতুল আলম প্রমুখ। অনুষ্ঠানে অনেক শিক্ষক, অভিভাবক ও শিক্ষার্থী উপস্থিত ছিলেন। শিক্ষার্থীদের এক মনোজ্ঞ সাংস্কৃতিক অনুষ্ঠান পরিবেশনার মধ্য দিয়ে এ দিনের সাড়স্বর আয়োজন সমাপ্ত হয়।

[[বি. দ্র : প্রতিবেদন শেষে প্রয়োজনীয় ক্ষেত্রে ডাকটিকিট সংবলিত খাম ও ঠিকানা ব্যবহার অপরিহার্য।]]

০২ সড়কের দুরবস্থা

থানা প্রতিনিধি, আশুগঞ্জ, ১৮ই জুলাই, ২০২২... : ব্রাহ্মণবাড়িয়ার আশুগঞ্জ-আড়াইসিধা-তালশহর আঞ্চলিক সড়কটি দীর্ঘদিন সংস্কার না হওয়ায় বেশকিছু স্থানে বড়ো বড়ো গর্তের সৃষ্টি হয়েছে এবং চলাচলের অযোগ্য হয়ে পড়েছে। কিন্তু বিকল্প সড়ক না থাকায় চরম ভোগান্তি সত্ত্বেও উপজেলার পাঁচ ইউনিয়নের লক্ষাধিক ব্যক্তিকে এ সড়কেই চলাচল করতে হচ্ছে। সড়ক সংস্কারে ব্রাহ্মণবাড়িয়ার এলজিইডি গাফিলতি করছে বলে অভিযোগ ভুক্তভোগীদের।

স্থানীয় সূত্র জানায়, আশুগঞ্জ-আড়াইসিধা-তালশহর আঞ্চলিক সড়কটির দৈর্ঘ্য প্রায় ৮ কিলোমিটার। উপজেলার দক্ষিণ এলাকায় পাঁচটি ইউনিয়নের লক্ষাধিক জনগোষ্ঠীর আশুগঞ্জ বন্দর, উপজেলা পরিষদ, উপজেলা স্বাস্থ্য কমপ্লেক্সসহ জেলা সদরে যোগাযোগের একমাত্র সড়ক এটি। তাছাড়া আশুগঞ্জ সদর ও দুর্গাপুর ইউনিয়নবাসীরও উপজেলা পরিষদ ও স্বাস্থ্য কমপ্লেক্সে যোগাযোগের মাধ্যম এটি। সড়কের উভয় পাশে কমপক্ষে লক্ষাধিক চাতাল থাকায় এগুলোর মালপত্রও এ সড়ক দিয়ে পরিবহণ করতে হয়। দীর্ঘদিন সংস্কার না হওয়ায় সড়কটির আলমনগর, আড়াইসিধা (শেখবাড়ির সামনে) ভবানীপুর এলাকার বেশ কয়েকটি স্থানের ইট-সুরকি উঠে গিয়ে বড়ো বড়ো গর্তের সৃষ্টি হয়েছে। এতে সামান্য বৃষ্টিতেই গর্তে হাঁটুপানি জমে চলাচলের অযোগ্য হয়ে পড়ে।

স্থানীয় মাদরাসার একজন শিক্ষার্থী বলেন, সড়কের এ বেহাল অবস্থার মধ্যেই যাতায়াত করতে হচ্ছে। শূকনা মৌসুমে ধূলাবালিতে এবং বর্ষায় জলকাদায় নাকাল হতে হচ্ছে পথচারীদের। অনেক সময় রিকশা-সিএনজিচালিত অটোরিকশা উল্টে পড়ে আহত হচ্ছে অনেক যাত্রী ও শিক্ষার্থী।

এদিকে রাস্তা সংস্কারে ব্রাহ্মণবাড়িয়া এলজিইডি নির্বাহী প্রকৌশলীর কার্যালয় দরপত্র আহ্বানসহ অন্যসব আনুষ্ঠানিকতা শেষ করেছে। পাঁচ কোটি ২৭ লাখ টাকা মূল্যে সড়কটি সংস্কারের কার্যাদেশ পায় একটি ঠিকাদারি প্রতিষ্ঠান। চুক্তি অনুযায়ী চলতি বছরের ২৩শে জুন সড়কটির সংস্কার কাজ শুরু করে মার্চ, ২০২২...-এর মধ্যে শেষ করার কথা। অথচ এখনও সংস্কার কাজ শুরুরই হয়নি। এটিকে এলজিইডি বিভাগের উদাসীনতা বলে এলাকাবাসী উল্লেখ করেন। তবে ব্রাহ্মণবাড়িয়া এলজিইডি কর্তৃপক্ষের দাবি বর্ষাকালে বৃষ্টির মধ্যে সংস্কার কাজ করা হলে তা স্থায়ী হয় না। তাই কিছুদিন দেরি হচ্ছে। তবে আবহাওয়া একটু শুষ্ক হলেই কাজ শুরু করা হবে।

০৩ পরিবেশগত ভারসাম্য রক্ষার জন্য চাই বৃক্ষরোপণ

নিজস্ব প্রতিবেদক, ঢাকা : বৃক্ষ মানুষের পরম বন্ধু। বিপুল মানুষের পদভারে কম্পিত এ সুজলা-সুফলা পৃথিবী প্রতিদিন বৃক্ষশূন্য হচ্ছে। অবাধ ও নির্বিচারে চলছে বৃক্ষনিধন। ফলে প্রাণীর জীবনধারণের নিয়ামক অক্সিজেনের সরবরাহ হ্রাস পাচ্ছে প্রবলভাবে। জীবনের জন্য, জীবিকার জন্য বৃক্ষের প্রয়োজনীয়তা অনস্বীকার্য। রবীন্দ্রনাথ ঠাকুর বৃক্ষের গুরুত্ব উপলব্ধি করে বলেছেন, আমরা যেমন স্নান করি এবং শূভ্র বস্ত্র পরিধান করি তেমনি বাড়ির চারপাশে যত্নপূর্বক একটি বাগান করে রাখা ভদ্রপ্রথার একটি অবশ্য কর্তব্যের অঙ্গ হওয়া উচিত।

একটি দেশের মোট ভূভাগের ২৫ ভাগ বনভূমি থাকা উচিত। কিন্তু বাংলাদেশের বনভূমির পরিমাণ মোট ভূভাগের মাত্র ১৯.৮৯ ভাগ। সুতরাং বাংলাদেশে বনভূমির পরিমাণ নিতান্তই কম। এ অবস্থার আশু পরিবর্তন আবশ্যিক। তাই অধিক হারে বৃক্ষরোপণের জন্য গণসচেতনতা সৃষ্টির বিকল্প নেই। জাতীয় গণমাধ্যমগুলো এ ব্যাপারে প্রশংসনীয় ভূমিকা রাখতে পারে। স্কুল, কলেজ, মাদরাসা, বিশ্ববিদ্যালয়ের শিক্ষার্থীদেরও এ মহতী উদ্যোগে অংশীদার করতে পারলে ভালো ফল পাওয়া যাবে বলে আমার বিশ্বাস।

পরিশেষে এ কথা বলা প্রাসঙ্গিক, বৃক্ষরোপণের মতো একটি গুরুত্বপূর্ণ বিষয়কে অগ্রাধিকারের ভিত্তিতে বিবেচনায় এনে জাতীয়ভাবে মাসব্যাপী কর্মসূচি গ্রহণ এখন সময়ের দাবি।

প্রতিবেদকের নাম ও ঠিকানা : মোঃ আবদুল করিম, গবেষণা সহকারী, বন ও পরিবেশ অধিদপ্তর, ঢাকা।

প্রতিবেদনের শিরোনাম : পরিবেশগত ভারসাম্য রক্ষার জন্য চাই বৃক্ষরোপণ

প্রতিবেদন তৈরির সময় : বিকাল ৫টা

তারিখ : ২১শে মে, ২০২২...

০৪ চারুকলায় সুন্দর হাতের লেখা প্রতিযোগিতা

ঢাকা বিশ্ববিদ্যালয় প্রতিবেদক, ঢাকা, ২২শে ফেব্রুয়ারি, ২০২২... : আন্তর্জাতিক মাতৃভাষা দিবস উপলক্ষ্যে ঢাকা বিশ্ববিদ্যালয়ের চারুকলা অনুষদের উদ্যোগে সুন্দর হাতের লেখা প্রতিযোগিতার আয়োজন করা হয়। রাজধানী ঢাকার বিভিন্ন স্কুল-কলেজ ও মাদরাসার প্রায় ৩৫০ জন শিক্ষার্থী এই আয়োজনে অংশগ্রহণ করে। সকাল নয়টায় অনুষদ

প্রাজ্ঞাণের বকুলতলায় প্রতিযোগিতা শুরু হয়। নির্দিষ্ট রচনা থেকে লেখার জন্য শিক্ষার্থীদের এক ঘণ্টা সময় দেওয়া হয়। দুটি বিভাগে ছিল এ আয়োজন; যেমন- বাংলা ও ইংরেজি। শুধু শিক্ষার্থী নয়, সকলেরই হাতের লেখা সুন্দর ও স্পষ্ট হওয়া উচিত। বাংলা ও ইংরেজি উভয় ভাষাতেই হাতের লেখা প্রতিযোগিতা হয়। কার লেখা ভালো হয় সেটাই দেখার বিষয়। যারা বাংলায় রচনা লিখেছেন তাদের কারও কারও লেখা ভালো হয়েছে। আবার অনেকের খারাপও হয়েছে। অপর বিভাগের কয়েকজন ইংরেজিতে রচনা লিখেছে। এদের মধ্যেও অনেকের হাতের লেখা সুন্দর হয়েছে। বিচারকদের এমন মন্তব্যের প্রেক্ষিতে প্রতিযোগিতা সুসম্পন্ন হয়। যার প্রেক্ষিতে বিকালে ছিল পুরস্কার বিতরণ ও সাংস্কৃতিক অনুষ্ঠান। হাতের লেখা সুন্দর হওয়ার প্রেক্ষিতে প্রতি বিভাগে তিন জন করে মোট ছয় জনকে পুরস্কৃত করা হয়। বিচারক হিসেবে ছিলেন চারুকলা অনুষদের শিক্ষক অধ্যাপক আবদুল আলিম, ড. আয়শা সুলতানা ও ড. আফজাল হোসেন। জয়নুল আবেদিন মিলনায়তনে প্রধান অতিথি হিসেবে উপস্থিত থেকে বিজয়ীদের মধ্যে পুরস্কার বিতরণ করেন সংস্কৃতিকর্মী জনাব ফজলুল হক। এরপর চারুকলা অনুষদের শিক্ষার্থীদের পরিবেশনায় সাংস্কৃতিক পর্ব উপভোগ করেন উপস্থিত দর্শক ও অতিথিবৃন্দ।

০৫ দ্রব্যমূল্যের উর্ধ্বগতি : জনজীবন বিপর্যস

নিজস্ব প্রতিবেদক, ঢাকা : সম্প্রতি যে বিষয়টি আমাদের ভাবিত করছে তা হচ্ছে দ্রব্যমূল্যের উর্ধ্বগতি। এ অস্বাভাবিক ও আকস্মিক মূল্যবৃদ্ধির ফলে জনসাধারণের ক্রয়ক্ষমতা হ্রাস পেয়েছে। ফলে দৈনন্দিন জীবনে নেমে এসেছে অপ্রত্যাশিত দুর্ভোগ। এর নেপথ্যের কারণ অনুসন্ধান করেছেন অর্থনীতিবিদগণ ও বিশেষজ্ঞ কমিটি। একজন বিশেষজ্ঞের মতে, এ আকস্মিক মূল্যবৃদ্ধির কারণ একাধিক। প্রথমত, মুনাফালোভী মজুতদাররা প্রায়ই মুনাফা অর্জনের মানসিকতায় দ্রব্যের দাম বাড়িয়ে দেয়। দ্বিতীয়ত, বহির্বিদেশে খাদ্যদ্রব্যের সংকট ও মূল্যের উর্ধ্বগতি। তৃতীয়ত, সরকারি কর্মচারীদের মহার্ঘ ভাতা বৃদ্ধি। দেশের একটি ক্ষুদ্রতম অংশ এরূপ ভাতা পেলেও অসুবিধার দায়ভার বহন করে সমাজের বৃহত্তম অংশ। এমনকি চাকরিজীবীদের মধ্যেও কেউ কেউ এই পরিস্থিতির শিকার হয়েছে। লক্ষণীয় ব্যাপার এই যে, সরকার কর্তৃক মহার্ঘ ভাতা ঘোষণার পরক্ষণেই অজ্ঞাত কারণে নিত্যপ্রয়োজনীয় দ্রব্যের মূল্য বৃদ্ধি পেতে থাকে। তাই অনতিবিলম্বে এ অনাকাঙ্ক্ষিত মূল্যবৃদ্ধি প্রতিরোধকল্পে যথাযোগ্য ব্যবস্থা গ্রহণ একান্ত আবশ্যিক।

মূল্যবৃদ্ধি এ দেশে একটি অনিবার্য সমস্যা হয়ে দাঁড়িয়েছে। পৃথিবীর অন্যান্য দেশে মূল্য বৃদ্ধিজনিত এমন নাজুক পরিস্থিতি সৃষ্টির ঘটনা বিরল। অনেক দেশেই এমনটি ঘটলে বিক্ষোভ দানা বাঁধে, সরকারকে জবাবদিহিতা করতে হয়। কিন্তু এ দেশের সরলপ্রাণ মানুষ এরূপ কোনো ঘটনা নিয়ে বেশি মাতামাতি পছন্দ করে না। দ্রব্যমূল্যের উর্ধ্বগতি তারা এ দেশের জাতীয় সমস্যা বলে ধরে নিয়েছে এবং তাদের ধারণা, এ বিষয়ে সরকারের কোনো দায় নেই। এ পরিস্থিতিতে সাধারণ মানুষের দুর্ভোগ হলেও দুর্নীতিবাজ কর্মচারী ও মুনাফাখোর ব্যবসায়ীদের পোয়াবারো। এছাড়াও আন্তর্জাতিক বাজারে আমাদের টাকার অবমূল্যায়ন হচ্ছে বারবার। আমাদের উৎপাদিত নিম্নমানের পণ্য বিশ্ববাজারে প্রতিযোগিতায় টিকতে পারছে না। এসব ঘটনায় কেউ কেউ নিজের ফায়দা লুটে নিচ্ছে। দেশের বৃহত্তর জনগোষ্ঠীকে এমন অমানবিক সমস্যায় পীড়িত করে যারা নিজেদের সুখ-সম্পদ আহরণের চেষ্টায় মত্ত, তারা দেশের শত্রু, জনগণের শত্রু। এসব অসৎ ও দুর্নীতিবাজ লোকদের উৎখাত এখন সময়ের দাবি। এ বিষয়ে সরকারি, বেসরকারি অভিজ্ঞ মহলের দৃষ্টিদান অপরিহার্য।

০৬ সড়ক দুর্ঘটনা প্রসঙ্গ / নিরাপদ সড়ক চাই

নিজস্ব সংবাদদাতা : সড়ক দুর্ঘটনা বর্তমানে একটি নৈমিত্তিক ব্যাপার। প্রতিদিনই সংবাদ মাধ্যমে আমরা সড়ক দুর্ঘটনার খবর পেয়ে থাকি। প্রতিটি দুর্ঘটনা আমাদের মনে কষ্টের রেখাপাত টানে। মর্মান্তিক এসব দুর্ঘটনার শিকার হচ্ছে বিভিন্ন বয়সের ও পেশার মানুষ। এ সকল দুর্ঘটনার ফলে আমরা হারাচ্ছি আমাদের প্রিয়জন, কাছের মানুষ, মেধাবী বন্ধুদের। বর্তমানে সড়ক দুর্ঘটনা এতটাই বৃদ্ধি পেয়েছে যে, রাস্তায় বেরুলেই সকলের মনে একটা ভীতি কাজ করে। অনেকে এটাও ভেবে থাকেন, বাসা থেকে বের হয়েছেন, সুস্থভাবে ফিরতে পারবেন কি না তার কোনো নিশ্চয়তা নেই। এতকিছুর পরও সড়ক দুর্ঘটনা প্রতিরোধে সংশ্লিষ্ট কর্তৃপক্ষের তেমন কোনো মাথাব্যথা নেই বললেই চলে। তাছাড়া দুর্ঘটনার জন্য দায়ী চালকদের যথাযথ শাস্তির ব্যবস্থা প্রায় নেই। সড়ক দুর্ঘটনার ফলে সবচেয়ে বড়ো যে ক্ষতি হচ্ছে তা হলো মানবসম্পদের অপচয়। এ ক্ষতি অপূরণীয়। তদুপরি রয়েছে অর্থনৈতিক ক্ষয়ক্ষতি।

সড়ক দুর্ঘটনার মূল কারণ চালকদের বেপরোয়া গাড়ি চালানো, যানবাহনের যান্ত্রিক ত্রুটি, রাস্তাঘাটের দুরবস্থা। এছাড়া যথাযথ প্রশিক্ষণ ছাড়াই গাড়ি চালানো, ধারণক্ষমতার অতিরিক্ত যাত্রী বহন করা, গাড়ি চালানোর সময় মোবাইল ফোনে কথা বলা ইত্যাদি সড়ক দুর্ঘটনার মূল কারণ।

দুর্ঘটনারোধে সুপারিশসমূহ

১. চালকদের যথাযথ কারিগরি প্রশিক্ষণ ও নৈতিক শিক্ষা দেওয়া।
২. উপযুক্ত প্রশিক্ষণপ্রাপ্ত চালক ব্যতীত অন্য কাউকে লাইসেন্স প্রদান না করা।
৩. রাস্তার প্রশস্ততা বৃদ্ধি এবং প্রতিনিয়ত সংস্কারের দিকে নজর রাখা।
৪. রাস্তায় চলাচলের সময় পথচারীদের এবং গাড়ি চালানোর সময় ড্রাইভারের অন্যমনস্ক না হওয়া।
৫. গণমাধ্যমে প্রচারের মাধ্যমে সকলকে প্রতিনিয়ত সচেতন করা।
৬. প্রতিটি দুর্ঘটনার যথাযথ তদন্ত সাপেক্ষে দায়ী ব্যক্তিকে দৃষ্ট শাস্তির আওতায় আনা।

উল্লেখ্য, আমাদের দেশের সড়কগুলোতে স্বাভাবিক চলাচল নিরাপদ নয়। সুস্থ অবস্থায় বাড়ি ফেরা নিয়ে পরিবারের সকলের উৎকণ্ঠার শেষ নেই। দেশব্যাপী সড়ক দুর্ঘটনার হার বেড়ে যাওয়ায় রাষ্ট্র ও সাধারণ জনগণের টনক নড়েছে। তাই পথচারী হতে চালক সকলের কথা বিবেচনায় রেখে পাস হয়েছে নিরাপদ সড়ক পরিবহণ আইন ২০১৮। এ আইনে সড়কের বিশৃঙ্খলা সৃষ্টিকারীদের জন্য করা হয়েছে কঠোর জরিমানার ব্যবস্থা। এক্ষেত্রে ড্রাইভারদের যেমন সচেতন হতে হবে তেমনি হতে হবে পথচারীদেরও। ফুটওভার ব্রিজ, জেরব্রকসিং ব্যবহার করার ক্ষেত্রে সচেতন হতে হবে। সামান্য সচেতনতা, পূর্বপ্রস্তুতি ও প্রতিরোধ পারে দুর্ঘটনার হাত থেকে আমাদের বাঁচাতে। উত্তরপক্ষের প্রচেষ্টাই পারে নিরাপদ সড়ক তৈরি করতে। দেশের সুখ ও টেকসই উন্নয়নের পূর্বশর্ত হলো সাশ্রয়ী ও নিরাপদ যোগাযোগ ব্যবস্থা। সেজন্য জাতীয় স্বার্থেই সড়ক নিরাপত্তা বিষয়ে সংশ্লিষ্ট সবার মনোযোগী হওয়া উচিত। আর সেটি হলে আমাদের নিরাপদ সড়কের দাবি সার্থক হবে।

প্রতিবেদকের নাম ও ঠিকানা : আলমগীর হোসাইন, ঢাকা।
 প্রতিবেদনের শিরোনাম : সড়ক দুর্ঘটনা প্রসঙ্গ/নিরাপদ সড়ক চাই
 প্রতিবেদন তৈরির সময় : সকাল ১১টা
 তারিখ : ৫ই জুলাই, ২০২...

০৭ 'ক' আলিয়া মাদরাসার গ্রন্থাগারটির সংস্কার প্রয়োজন

নিজস্ব প্রতিবেদক : নোয়াখালী জেলার 'ক' আলিয়া মাদরাসাটি একটি ঐতিহ্যবাহী মাদরাসা। প্রতিষ্ঠার পর থেকে এ পর্যন্ত সুনামের সাথে শিক্ষা কার্যক্রম পরিচালনা করে বেশ কয়েকবার শ্রেষ্ঠ প্রতিষ্ঠানের মর্যাদা লাভ করেছে। এ পর্যন্ত এ মাদরাসা অনেক কৃতি ছাত্রের জন্ম দিয়েছে, যারা সরকারি-বেসরকারি উচ্চ পদে আসীন আছেন। কিন্তু মাদরাসার গ্রন্থাগারটি জরিপ করে দেখা যায়, এটি নানা অনিয়ম ও অবহেলার মধ্য দিয়ে পরিচালিত হচ্ছে, যা শিক্ষা কার্যক্রমকে বাধাগ্রস্ত করছে। যে সকল সমস্যা গ্রন্থাগারে রয়েছে তা নিম্নরূপ-

১. মাদরাসা প্রতিষ্ঠার কিছুদিন পর গ্রন্থাগারটি প্রতিষ্ঠিত হয়। তবে এতদিনেও গ্রন্থাগারটির আশানুরূপ সমৃদ্ধি সাধিত হয়নি। মাদরাসার ছাত্রছাত্রীর সংখ্যা আগের চেয়ে অনেক বৃদ্ধি পেয়েছে এবং মাদরাসার আর্থিক অবস্থাও অনেক ভালো। কিন্তু গ্রন্থাগারটির তেমন কোনো উন্নতি হয়নি।
২. মাদরাসার গ্রন্থাগারে বর্তমানে বইয়ের সংখ্যা ১৫,৯২০টি। চাহিদার তুলনায় এ সংখ্যা অপ্রতুল।
৩. গ্রন্থাগারে রেফারেন্সমূলক বইয়ের সংখ্যা খুবই কম। ফলে শিক্ষার্থী এবং শিক্ষকগণ অনেক তথ্য উদ্ঘাটনের সুযোগ থেকে বঞ্চিত হচ্ছেন।
৪. প্রশিক্ষণপ্রাপ্ত কোনো গ্রন্থাগারিক না থাকায় গ্রন্থাগারটি সুষ্ঠুভাবে পরিচালিত হচ্ছে না। পুস্তকের রক্ষণাবেক্ষণে তেমন কোনো সচেতনতা নেই। ছাত্র-শিক্ষকদের মধ্যে বই ইস্যু করার ব্যাপারেও কোনো নির্দিষ্ট পদ্ধতি অনুসরণ করা হচ্ছে না।
৫. গ্রন্থাগার ভবনটি মেরামত ও সম্প্রসারণ করা প্রয়োজন। মাদরাসার যে কক্ষটি গ্রন্থাগার হিসেবে ব্যবহৃত হচ্ছে তা অনেক পুরানো। তাছাড়া যে আলমিরা ও র্যাকগুলোতে বই রক্ষিত আছে সেগুলোর অবস্থাও শোচনীয়।
সুতরাং গ্রন্থাগারটির সংস্কার অত্যন্ত জরুরি। এ বিষয়ে তাই কয়েকটি সুপারিশ পেশ করছি :
ক. গ্রন্থাগার ভবনটি মেরামত ও সম্প্রসারণ করা হোক এবং একে সুন্দরভাবে সাজানো হোক।
খ. প্রশিক্ষণপ্রাপ্ত একজন গ্রন্থাগারিক নিয়োগ করা অত্যন্ত জরুরি।
গ. নির্ভরযোগ্য প্রকাশকদের ক্যাটালগ অনুযায়ী জরুরিভিত্তিতে প্রয়োজনীয় সংখ্যক বই কেনা হোক।
ঘ. বইপত্র সঠিকভাবে ইস্যু করা দরকার এবং এ প্রেক্ষিতে পুস্তক আদান-প্রদানের জন্য একটি সুনির্দিষ্ট নীতিমালা প্রণয়ন করা দরকার।
ঙ. শিক্ষার্থীরা যাতে বই পড়ে সে বিষয়ে তাদেরকে উদ্বুদ্ধ করা দরকার।
চ. গ্রন্থাগারটির উন্নতির জন্য স্বতন্ত্র তহবিল গড়ে তোলা আবশ্যিক এবং এর জন্য শিক্ষার্থীদের কাছ থেকে বার্ষিক চাঁদা নেওয়া যেতে পারে।

প্রতিবেদকের নাম ও ঠিকানা : মোঃ মুজাহিদুল ইসলাম, নোয়াখালী।
প্রতিবেদনের শিরোনাম : 'ক' আলিয়া মাদরাসার গ্রন্থাগারটির সংস্কার প্রয়োজন
প্রতিবেদন তৈরির সময় : সকাল ১০টা
তারিখ : ১০ই ফেব্রুয়ারি, ২০২...

৪. সারাংশ বা সারমর্ম

সারাংশ

০১ সারাংশ : জনসংখ্যার অধিক বৃদ্ধি দেশের উন্নতির অন্তরায়। এতে সমাজ ও পারিবারিক জীবনে নানা সমস্যার সৃষ্টি হয়। জনসংখ্যা বৃদ্ধির ফলে মানুষ শিক্ষার মতো সামাজিক অধিকার পায় না। ফলে দেশের বিপুল জনশক্তির অপচয় ঘটে।

০২ সারাংশ : বিদ্যার চেয়ে বড়ো সম্পদ আর নেই। তবে তার চেয়েও বড়ো সম্পদ চরিত্র। চরিত্রহীন মানুষ যত বড়ো বিদ্বান হোক না কেন, সে পশুর চেয়েও অধম। তার কাছ থেকে দূরে থাকাই উচিত।

০৩ সারাংশ : সমাজ একটি সামবায়িক সংগঠন। সমাজ গঠনের উদ্দেশ্য মহৎ হলেও এখানে ভালো-মন্দ উভয় শ্রেণির মানুষেরই উপস্থিতি থাকে। অহংকারী ও স্বার্থপর মানুষ সমাজে কোনো ইতিবাচক ভূমিকা রাখতে পারে না বরং অগ্রযাত্রায় প্রতিবন্ধকতা তৈরি করে।

০৪ সারাংশ : অতিরিক্ত মাতৃস্নেহ সন্তানের জন্য মজলজনক নাও হতে পারে। অধিক স্নেহে সন্তানের মধ্যে স্বনির্ভরতা আসে না; সে অসহায় হয়ে পড়ে। অল্প মাতৃস্নেহ দুর্বলতাকে প্রশ্রয় দেয়।

০৫ সারাংশ : ভালো কাজ করার অভ্যাস করলে পরিণামে চরিত্র ভালো হয়। সত্যবাদিতাকে আয়ত্ত করতে হলে রীতিমতো অভ্যাস প্রয়োজন। পরিশেষে তা আয়ত্ত করে মিথ্যা বলার চেষ্টা করলেও বলা যাবে না। এটা কেবল অভ্যাসের ফলেই সম্ভব।

০৬ সারাংশ : মানুষের প্রকৃত মূল্য তার চরিত্রে। চরিত্র দিয়ে সে সকলকে জয় করে। পৃথিবীর সকল পুরুষই তার জ্বলন্ত দৃষ্টান্ত। চরিত্র মানে শুধু নৈতিকতা নয়। চরিত্র মানে বিনয়, জ্ঞান, সত্যবাদিতা, সরলতা, আতিথেয়তা ও স্বাধীনপ্রিয়তা।

০৭ সারাংশ : নানা ক্ষেত্রে বিজ্ঞানের অভাবনীয় উন্নতির পেছনে রয়েছে অগণিত মানুষের ছোটো ছোটো কর্ম-প্রচেষ্টা। যুগ যুগ ধরে নাম না-জানা অজস্র মানুষের নিরন্তর পরিশ্রম ও আবিষ্কারে এবং বিজ্ঞান ও সভ্যতার অসামান্য অবদানে সমৃদ্ধ হয়েছি আমরা। এমনি করে ছোটো ছোটো অনেক অবদানে ঘটছে জ্ঞানরাজ্যের বিপুল সমৃদ্ধি।

০৮ সারাংশ : অপব্রূপ মহিমা নিয়ে বসন্তকালে প্রকৃতি আত্মপ্রকাশ করে, ঠিক তখনই কোকিল প্রকৃতিকে মুখর করে তোলে। সুসময়েও তেমনি হাজার বন্ধুর দেখা মেলে; কিন্তু দুর্দিনে তারা কেউ কারো নয়।

অথবা, সারমর্ম

০১ সারমর্ম : সময়ের কাজ সঠিক সময়ে করতে হয়। সময়মতো কাজ না করলে তাতে কোনো লাভও হয় না। যে সময় চলে যায় তা ফিরে আসে না। কাজেই যথাসময়ে সব কাজ সম্পাদন করা উচিত। নইলে পরে অনুশোচনা করতে হয়।

০২ সারমর্ম : স্বর্গ ও নরক কেবল সুদূর পরলোকের ব্যাপার নয়। অন্যকে ভালোবাসলে, নিজেকে বিলিয়ে দিলে স্বর্গসুখ অনুভব করা

যায়। আর রিপূর তাড়নায় কুপথে পা বাড়ালেই নরক-অনলে জ্বলতে হয়। এ পৃথিবীর কুঁড়েঘরই স্বর্গ, যেখানে প্রেম-প্রীতির বাঁধনে মানুষ পরস্পরে মিলিত হয়।

০৩ সারমর্ম : এ পৃথিবীর সকল পুরাতন জঞ্জাল আর জীর্ণতা দূর করে নতুনের আগমনের অতিথিকে স্থান করে দিতে হবে। তাদের জন্য বিশৃঙ্খল বাসযোগ্য করে দিতে হবে। অতীতের সকল ব্যর্থতা ও ধ্বংসস্তুপের ওপর গড়তে হবে অনাগত সুন্দর দিনগুলো।

০৪ সারমর্ম : শ্রমজীবী মানুষের কঠোর শ্রমে ও অপরিসীম ত্যাগে গড়ে উঠেছে মানবসভ্যতা। এদিক থেকে শ্রমজীবীরাই সত্যিকারের মহৎ মানুষ। কিন্তু সমাজজীবনে এরা বঞ্চিত, শোষিত ও উপেক্ষিত। এখন দিন এসেছে। শ্রমজীবী মানুষেরাই একদিন নবজাগরণের মধ্য দিয়ে বিশ্বে পালাবদলের সূচনা করবে।

০৫ সারমর্ম : যে-কোনো পরিশ্রমের মাঝে গৌরব নিহিত থাকে। দুঃখ-কষ্ট, পরিশ্রমের মাঝে যা পাওয়া যায় তার দাম যেমন অনেক, তার গৌরবও অনেক। যে-কোনো উন্নতির মূলে রয়েছে শ্রমবৃষ্টি, শ্রমসাধনা। আর যা কবুগার দান, ভিক্ষার দান, তা গ্রহণ করায় রয়েছে লজ্জা। এর ভেতর কোনো গৌরব নেই।

০৬ সারমর্ম : আশাই মানুষের জীবন-সংগ্রামের প্রণোদনা। আশাহীন জীবন হয়ে পড়ে স্থবির ও নিশ্চল। আশার জাদুতেই মানুষ জীবনে নানা সংকট ও প্রতিকূলতা মোকাবিলা করে; মজল ও সমৃদ্ধির আশায় কাজ করে যায় সারা জীবন।

০৭ সারমর্ম : প্রাকৃতিক সৌন্দর্য পৃথিবীকে অপূরণ করেছে। প্রকৃতি মানুষের মনকে পুলকিত করে; আবার প্রকৃতির প্রেমে মানুষের মন বাঁধা পড়ে। এই মায়া ত্যাগ করে কেউই পৃথিবী থেকে চিরবিদায় নিতে চায় না।

০৮ সারমর্ম : ধৈর্য ও সাহস নিয়ে মানুষকে জীবনের ঘাত-প্রতিঘাতময় পথ অতিক্রম করতে হয়। দুঃখ-দৈন্যের সঙ্গে লড়াই না করে এবং বিপদকে মোকাবিলা না করে জীবনে সাফল্য অর্জিত হয় না।

৫. ভাব-সম্প্রসারণ

০১ মূলভাব : অন্যায় করা যেমন পাপ, অন্যায় সহ্য করে প্রশ্রয় দেওয়ার মাধ্যমে তার বিস্তার ঘটানোর কাজে সাহায্য করাও পাপ। উভয়ে সমান ঘণার পাত্র।

সম্প্রসারিত ভাব : আইনের দৃষ্টিতে অন্যায়কারীকে অপরাধী মনে করা হয়। তাই তার জন্য শাস্তির বিধান থাকে। আবার অনেক মানুষ আছে তারা সরাসরি অন্যায় করে না, কিন্তু পেছনে থেকে অন্যায়কারীকে সহায়তা করে বা অন্যায় করতে উৎসাহিত করে। আইনের আওতায় এরাও কখনো কখনো অপরাধী হিসেবে গণ্য হয়। আবার, এমনও লোক থাকে- যারা প্রত্যক্ষ বা পরোক্ষভাবে অন্যায় করে না, অন্যায় ঘটার সময়ে শুধু নীরব দর্শকের ভূমিকা পালন করে। আইনের চোখে তাদের অপরাধী বলা যায় না। কিন্তু আইনের চোখে অপরাধী না হলেও এই নীরব দর্শকেরাও এক অর্থে অন্যায় ঘটাতে সহযোগিতা করে। কেননা, অন্যায় সংঘটিত হওয়ার সময়ে ওইসব দর্শক যদি সরব

প্রতিবাদী ভূমিকা পালন করতো, তাহলে অন্যায় ঘটত না। আইনের চোখে এরা হয়তো অপরাধী নয়, কিন্তু বিবেকের দায় থেকে তাদের মুক্তি দেওয়া যায় না। সমাজ থেকে অন্যায়কে দূর করতে আইনের শাসন প্রতিষ্ঠার পাশাপাশি বিবেকের দায়সম্পন্ন সচেতন মানুষের উপস্থিতিও জরুরি, যারা অন্যায়ের প্রতিবাদে সব সময় সোচ্চার হবে, সরব হবে। অপরাধী যাতে অপরাধ করার সুযোগ না পায়, সবাইকে সেই পরিবেশ সৃষ্টি করতে হবে।

অন্যায়কারীকে যথাযথভাবে শাস্তি দিলে অন্যায় প্রশ্রয় পায় না। আবার অন্যায় করতে না দিলে অন্যায়ের ঘটনাও ঘটে না। তাতে সমাজ থেকে অন্যায় চিরতরে দূর হয়। তাই অন্যায়কারী এবং অন্যায় সহকারী উভয়ই সমাজে নিন্দনীয়। রাসুল (স) বলেছেন, কেউ অন্যায় কাজ দেখলে তা হাত দিয়ে প্রতিরোধ করবে। তাতে সমর্থ না হলে মুখ দিয়ে এবং তাতেও সমর্থ না হলে অন্তর দিয়ে ঘৃণা করবে।

মন্তব্য : অন্যায়কে প্রশ্রয় দেওয়া বা অন্যায়ের প্রতি উদাসীন হওয়া অনুচিত। যার প্রতি অন্যায় করা হয়, সে যদি তা প্রতিরোধে সচেতন না হয়, সেও সমাজে ঘৃণিত ও অবহেলিত হবে।

০২ মূলভাব : ব্যক্তির জীবনাচরণের মধ্যে যা নেই, তা অন্যকে উপদেশ আকারে দেওয়া যায় না। অন্যকে উপদেশ দেওয়ার আগে নিজেকে তা পালন করে দেখাতে হয়। এর ফলে যাকে উপদেশ দেওয়া হয়, সে তা পালন করতে আন্তরিকভাবে উদ্বুদ্ধ হয়।

সম্প্রসারিত ভাব : কাউকে উপদেশ দেওয়া যত সহজ, উপদেশ পালন করা তার চেয়ে অনেক কঠিন। যে উপদেশ দেয়, সে যদি নিজে তা পালন না করে, তাহলে উপদেশ-গ্রহণকারীর কাছে এর গুরুত্ব থাকে না। অন্যদিকে উপদেশ দানকারী যদি সেই উপদেশের পালনীয় দিক নিজ জীবনে পালন করে দেখান, তাহলে উপদেশ গ্রহণকারী উপদেশ পালনের দৃষ্টান্ত পেয়ে যান, যা তার জীবনাচরণে সক্রিয় প্রভাব ফেলে। সাধারণত ধর্মপ্রবর্তক, ধর্মপ্রচারক, জ্ঞানী ব্যক্তি বা জীবনে প্রতিষ্ঠাপ্রাপ্তদের তরফ থেকে উপদেশ-বাণী বর্ষিত হয়ে থাকে। এঁদের দেওয়া উপদেশ মানুষ পালন করতে দ্বিধা করে না। তবে উপদেশ হিসেবে বর্ষিত কথাটুকু তাঁরা নিজেদের জীবনেও অনুসরণ করেন কি না- এ বিষয়ে তাঁদেরকে সতর্ক থাকতে হয়। সমাজে অনেক মানুষ থাকে, যারা উপদেশ দিতে খুব পটু, কিন্তু ওইসব উপদেশ তারা নিজেরাই পালন করতে অভ্যস্ত নয়। তখন উপদেশগুলো উপদেশ-গ্রহণকারীর কাছে সেইভাবে গ্রহণযোগ্য হয়ে ওঠে না এবং তা হাস্যকর উপদেশে পরিণত হয়। তাই কোনো একটা ভালো কাজ করতে অন্যকে উদ্বুদ্ধ করার আগে উপদেশদাতাকেই ভালো কাজটি করতে অভ্যস্ত হতে হবে। তাতে উপদেশ-গ্রহণকারী উপদেশের পাশাপাশি উপদেশ পালনের নজিরও গ্রহণ করতে পারে।

মন্তব্য : কাউকে উপদেশ দেওয়ার মধ্য দিয়ে ভালো মানুষ সাজার ভান করা খুব সহজ, কিন্তু উপদেশ পালন করা খুব কঠিন কাজ। তবে সেই উপদেশদাতাই সর্বোত্তম, যিনি নিজে যা পালন করেন, অন্যকেও তা পালন করতে বলেন।

০৩ মূলভাব : যে ক্ষুধার্ত, তার কাছে পৃথিবীর সবকিছু তুচ্ছ। সকল সৌন্দর্য, ভালোবাসা, অনুভূতি কোনোকিছুর মূল্য নেই তার কাছে।

সম্প্রসারিত ভাব : মানুষ স্বভাবতই সৌন্দর্যপিপাসু। বিশেষত যারা কবি-সাহিত্যিক তারা সুন্দরের পাগল, কল্পনাবিলাসী। তাদের কাব্য

সৃষ্টির মূল প্রেরণা আসে সৌন্দর্য ও কল্পনার জগৎকে কেন্দ্র করে। প্রকৃতিতে বিরাজমান শ্যামল শ্রী, বন-বনানী, নদ-নদী, পাহাড়-পর্বত, ঝরনা, সমুদ্র, চন্দ্র-সূর্য প্রভৃতি তাদের মনে কাব্য সৃষ্টির প্রেরণা যোগায়। তারা ঋতুরাজ বসন্তকে পেয়ে গেয়ে ওঠেন- ‘আহা আজি এ বসন্তে, এত ফুল ফোটে এত বাঁশি বাজে।’ অথবা বলেন, ‘আজ জ্যোৎস্না রাতে, সবাই গেছে বনে।’ কিন্তু এ হচ্ছে ভাবের জগৎ, কল্পনার জগৎ। বাস্তবতার সাথে এ জগতের মিল খুব একটা নেই। বাস্তবজীবন বড়ো কঠিন, বড়ো রূঢ় ও নিষ্ঠুর। জগতের সর্বত্র স্বার্থপর মানুষের বিচরণ। সেখানে দুঃখীজনের দুঃখ দেখার কেউ নেই। সমাজে অনেক মানুষ আছে যারা আশ্রয়হীন, বস্ত্রহীন, শিক্ষা-চিকিৎসা পাচ্ছে না। এমনকি জীবনধারণের সবচেয়ে প্রয়োজনীয় মৌলিকতম উপাদান-দু’মুঠো অনুও তারা পেট পুরে খেতে পাচ্ছে না। তাদের কাছে কল্পনার জগৎ মধুর হয় না। তারা পূর্ণিমার জ্যোৎস্নায় কল্পনার সমুদ্রে সাঁতার কাটতে পারে না। তাদের মাথায় থাকে শুধু ক্ষুধার চিন্তা। তাদের কাছে তখন পূর্ণিমার চাঁদ হয়ে যায় বলসানো রুটির মতো। কারণ ক্ষুধিতের ক্ষুধার কাছে বলসানো রুটিই পরম কাঙ্ক্ষিত বস্তু। কবির মতো সৌন্দর্যচিন্তা তার কাছে তখন একেবারেই অনর্থক। পেটে ক্ষুধা থাকলে সুন্দর সুন্দর কাব্যও হয়ে ওঠে এলোমেলো গদ্যময়। জীবনের সব ছন্দ, সব সৌন্দর্য, সব ভালোলাগা-ভালোবাসা তখন হারিয়ে যায় ক্ষুধার রাজ্যে। জীবন হয়ে পড়ে বিবর্ণ, সৌন্দর্যহীন; আর সব সৌন্দর্যই হয়ে যায় ধূসর।

মন্তব্য : ক্ষুধার্ত ব্যক্তি যেদিকেই তাকাবে, তার কেবল খাদ্যের কথাই মনে পড়বে। তার কাছে সবকিছুই মূল্যহীন কেবল খাদ্য ব্যতীত। জীবনে ক্ষুধাকে যে জয় করতে পারবে, তার জীবনই হয়ে উঠবে সুন্দর এবং বাস্তবতায় পরিপূর্ণ।

০৪ মূলভাব : গ্রন্থগত বিদ্যা যা আত্মস্থ করা হয়নি এবং অন্যের ধন যা স্ত্রী করায়ত্ত হয়নি এগুলো সবই নিরর্থক। কারণ প্রয়োজনীয় মুহূর্তে এগুলো যথাযথ ব্যবহার করা সম্ভব হয় না।

সম্প্রসারিত ভাব : বিদ্যা ও ধন মানুষের অতি প্রয়োজনীয় জিনিস। বিদ্যা মানুষকে মহৎ করে আর ধন মানুষের জীবন রক্ষায় সাহায্য করে। তবে শুধু পুঁথিগত জ্ঞান মানুষকে যথাযথ জ্ঞানী করে তুলতে পারে না। বিদ্যাকে জীবন পরিচালনার ক্ষেত্রে প্রয়োগ করার মধ্যেই যথার্থ জ্ঞান নিহিত। মানুষ অত্যন্ত সাধনা দিয়ে বিদ্যার্জন করে তার অর্জিত জ্ঞানের কথা গ্রন্থে লিপিবদ্ধ করে থাকে। যুগে যুগে মানুষ আপন চিন্তার ফসল দিয়ে বিশ্বের জ্ঞানভান্ডার পূর্ণ করে তুলেছে। আর মানুষের সকল জ্ঞান লিপিবদ্ধ আছে গ্রন্থে। তা হতে আমরা জ্ঞান লাভ করি। আবহমানকাল থেকে মানুষের অর্জিত বিদ্যা আর জ্ঞান যদি গ্রন্থে সংরক্ষিত না হয়ে আসত, তাহলে প্রয়োজনে মানুষ তা লাভ করতে পারত না। তবে প্রচুর গ্রন্থ কিনে ঘরে রেখে দিলেই কেউ জ্ঞানী হয় না। প্রয়োজনে গ্রন্থে রক্ষিত বিদ্যা কাজে লাগানো যায় না। বিদ্যা আয়ত্ত করতে হয় কঠিন পরিশ্রমের ভেতর দিয়ে।

মন্তব্য : ধন মানুষের অতীব প্রয়োজনীয় জিনিস। ধন অর্জন করে কেউ যদি অপরের নিকট রেখে দেয়, তাহলে প্রয়োজনের সময় তা পাওয়া যায় না। তেমনি বিদ্যাও যদি কেবল গ্রন্থের মাঝেই সীমাবদ্ধ থাকে, তাহলে তা জীবনে কোনো কাজে লাগে না।

০৫ মূলভাব : কর্মের দ্বারাই মানুষ পৃথিবীর বুকে সম্মান ও প্রতিষ্ঠা পায়। কোনো মানুষের জন্ম যে বংশেই হোক না কেন, কাজই তার পরিচয় নির্ধারণ করে।

সম্প্রসারিত ভাব : প্রকৃতির স্বাভাবিক নিয়ম অনুযায়ী মানুষকে মৃত্যুর কোলে ঢলে পড়তে হয়। তখন পিছনে পড়ে থাকে তার ভালো-মন্দ সব ধরনের কাজ। কাজ ভালো হলে বহুকাল যাবৎ মানুষ তা মনে রাখে। আর কাজ খারাপ হলে যুগযুগ ধরে সকলে তার নিন্দা করে। বংশমর্যাদার ওপর এইসব সুনাম বা দুর্নাম নির্ভর করে না। বংশে কেউ একজন সুনাম করলে সেই বংশের মর্যাদা বাড়ে। তবে তার অর্থ এই নয় যে, এই মর্যাদা চিরস্থায়ী। কেননা একই বংশে কোনো কুলাঙ্গার জন্ম নিলে সেই মর্যাদা ভুলুপ্তি হতে পারে। আবার, অনেকে খুব সাধারণ পরিবারে জন্ম নিয়েও নিজ নিজ কৃতিত্বের জন্য পৃথিবীতে অমর হয়েছেন। উদাহরণ হিসেবে বলা যায়, রোকেয়া সাখাওয়াত হোসেন জমিদার পরিবারে জন্মগ্রহণ করেছেন, আবার কাজী নজরুল ইসলাম জন্মগ্রহণ করেছেন দরিদ্র পরিবারে। এ দুজন ব্যক্তি বংশ পরিচয়ে নয়, বরং কর্ম দ্বারা মানুষের কাছে পরিচিত হয়েছেন।

মন্তব্য : মানুষের পরিচয় কখনোই তার বংশ বা পরিবারের মর্যাদা-অমর্যাদার ওপর নির্ভর করে না- নির্ভর করে তার নিজ নিজ কর্ম ও সৃষ্টির ওপর। বিজ্ঞান, সাহিত্য, শিল্প, মানবসেবা- পছন্দসই যে-কোনো ক্ষেত্রে মানুষ নিজেকে উৎসর্গ করে অমর হতে পারে।

০৬ মূলভাব : প্রাণ থাকলেই মানুষকে প্রকৃত মানুষ বলা যায় না। মানুষ নামের যোগ্য হতে হলে তাকে হতে হবে বড়ো ও ভালো মনের অধিকারী।

সম্প্রসারিত ভাব : যে খাদ্য গ্রহণ করে, শারীরিকভাবে বাড়ে আর বংশ বৃদ্ধি করে- মোটামুটি এসব বৈশিষ্ট্য থাকলে কোনোকিছুর প্রাণ আছে বলে মনে করা হয়। মানুষেরও প্রাণ আছে, কিন্তু মানুষের থাকে এর অতিরিক্ত আর একটি সত্তা, তা হলো মন। মানুষকে বলা হয় সৃষ্টির সেরা জীব- সেরা প্রাণী। এর মূল কারণ, তার মন আছে। এই মনের মাধ্যমে মানুষ তার চারপাশের জগতের সঙ্গে নিবিড় সম্পর্ক গড়ে তোলে। তার মধ্যে ভালো-মন্দের ধারণা সৃষ্টি করে, নৈতিকতার জন্ম দেয়। এমনকি এই মন দিয়ে সে গড়ে তোলে তার নিজস্ব সংস্কৃতি। এই সাংস্কৃতিক বোধ থেকে তৈরি হয় বিভিন্ন ধরনের সাংস্কৃতিক উপাদান। মানুষ ছাড়া অন্য কোনো প্রাণীর মধ্যে এইসব উপাদান থাকে না। ইতর প্রাণীর মন থাকে না বলে তার সংস্কৃতি নেই, তার ভালো-মন্দের বোধ নেই, তার নৈতিকতার বালাই নেই। মানুষের মন এভাবে অন্যান্য প্রাণী থেকে তাকে আলাদা করে। মনকে আবার অনেক সময় ভালোকে কেন্দ্র হিসেবেও ভাবা হয়। যেমন- যখন কোনো ব্যক্তির দানশীলতার কথা বলা হয়, তখন বলা হয়, তার মন আছে। আবার কোনো লোককে যখন চরম স্বার্থপর ও কৃপণ হিসেবে চিহ্নিত করার দরকার হয়, তখন বলা হয়, লোকটার মন ছোটো। এদিক দিয়ে মন হলো মানুষের ভালো-মন্দ পরিমাপের এক ধরনের মাপকাঠি। মানুষের মন আছে বলেই সে মানবিক গুণের অধিকারী। আর যার মন নেই, অবশ্যই সে ইতর প্রাণীর সঙ্গে তুলনীয়। সেই ইতর প্রাণী হতে পারে চরমভাবে হিংস্র অথবা একান্তই গোবেচারী কোনো পশু, পাখি বা মাছ।

মন্তব্য : পৃথিবীতে নিজেকে প্রতিষ্ঠিত করার জন্য মানুষকে মহৎ গুণাবলির অধিকারী হতে হয়। শুধু প্রাণ ধারণ করেই মানুষ নামের যোগ্য হওয়া যায় না।

০৭ মূলভাব : জ্ঞান আহরণ করার আশা নিয়ে মানুষ বই কেনে। আর এই বই কেনার জন্য যে অর্থ-ব্যয় হয়, অর্জিত জ্ঞানের তুলনায় তা খুব নগণ্য।

সম্প্রসারিত ভাব : বই মানুষের জ্ঞানচক্ষু খুলে দিয়ে মনের জগৎকে প্রসারিত করে। কৃপমডুকতা থেকে বেরিয়ে আসার জন্য বই অগ্রণী ভূমিকা পালন করে। বিশ শতকের সূচনায় মুসলিম সাহিত্য সমাজের দার্শনিকগণ বলেছিলেন, ‘জ্ঞান যেখানে সীমাবদ্ধ, বুদ্ধি সেখানে আড়ষ্ট, মুক্তি সেখানে অসম্ভব।’ তাঁদের ধারণা অনুযায়ী জ্ঞানের সীমানা বাড়াতে, বুদ্ধিকে বন্ধনহীন করতে, আর মানুষের মুক্তি আনতে বই পড়ার কোনো বিকল্প নেই। সব মানুষই খাদ্য, বস্ত্র, আশ্রয়, চিকিৎসা ইত্যাদি মৌলিক প্রয়োজনে অর্থ ব্যয় করে। মৌলিক চাহিদা পূরণের পর অতিরিক্ত টাকা ব্যয় করার আরও অনেক উপায় আছে। এর মধ্যে সবচেয়ে ভালো উপায়— বই কেনা। বই কিনে কেউ নিঃশ্বাস হয় না। কারণ একটা বইয়ের অর্থমূল্য বেশি নয়। বরং একটি বই কিনতে যে অর্থের প্রয়োজন হয়, তার চেয়ে অনেক বেশি অর্থ অনেকে অন্যান্য কাজে ব্যয় করে থাকে। ব্যক্তিকে আলোকিত করতে একটি বই যেভাবে ভূমিকা রাখে, তাতে বই কেনার ব্যাপারে কার্পণ্য করা বোকামি। একটা বই অনেক সময়ে মানুষের জীবনকে পর্যন্ত বদলে দিতে পারে।

মন্তব্য : বই মানুষের প্রকৃত বন্ধু। তাই নিজেকে সমৃদ্ধ করতে বই কেনার ও তা পড়ার কোনো বিকল্প নেই।

০৮ মূলভাব : নিরক্ষর শিক্ষার সজ্ঞে সম্পর্কহীন ব্যক্তির জীবন অসার, আর জীবনের সাথে সম্পর্কবিহীন বিদ্যা অকেজো ও পঙ্গু।

সম্প্রসারিত ভাব : বিদ্যা অমূল্য ধন। যথেষ্ট কষ্ট ও ত্যাগ স্বীকার করে বিদ্যার্জন করতে হয়। বিদ্যা মানুষের জীবন থেকে অন্ধকার দূর করে আলোকোজ্জ্বল পুণ্যের পথ দেখায়। একমাত্র বিদ্যার দ্বারা মানুষ পশু স্বভাব বর্জন করে সত্যিকারের মনুষ্যত্ব অর্জন করতে পারে। সেজন্যই কথায় বলে বিদ্যাহীন ব্যক্তি পশুতুল্য। তাই বিদ্যা অর্জনের জন্য যুগে যুগে মহাপুরুষগণ বিশেষ তাগিদ দিয়েছেন।

বিদ্যা মানুষের সহজাত পাশবিক প্রবৃত্তিকে নির্মূল করে সুকুমার বৃত্তির উন্মেষ ঘটায়। বিদ্যা মানুষের অন্তরে যেমন আনন্দের অনুভব সৃষ্টি করে, তেমনটি আর কোনোকিছুর দ্বারা সম্ভব হয় না। তাই বিদ্যার সজ্ঞে জীবনের সম্পর্ক অতি নিবিড়। কিন্তু এ বিদ্যার সজ্ঞে যার সম্পর্ক নেই তার জীবন অন্ধ। অপরপক্ষে, জীবনের সাথে বিদ্যার সম্পর্ক গভীর না হলে সে বিদ্যা পঙ্গু। সেজন্য বিদ্যাকে জীবনমুখী হতে হবে। বাস্তবমুখী বিদ্যা না হলে তা মানুষের কোনো উপকারেই আসে না। একমাত্র জীবনমুখী বিদ্যাই মানুষকে সকল জ্বালা-যন্ত্রণা থেকে মুক্তি দিতে পারে। কবির ভাষায়—

‘যার বিদ্যা নাই সে না জানে ভালো-মন্দ,

শিরে দুই চক্ষু আছে, তথাপি সে অন্ধ।’

মন্তব্য : বিদ্যাহীন ব্যক্তি যেমন চোখ থেকেও অন্ধ, তেমনি জীবনের সজ্ঞে সম্পর্কহীন বিদ্যাও অসম্পূর্ণ। এ অসম্পূর্ণ বিদ্যা কখনো মানুষের উপকারে আসে না। তাই জীবনবিমুখ উদ্দেশ্যহীন বিদ্যাকে বলা হয়েছে পঙ্গু ও ব্যর্থ।

০৯ মূলভাব : সমাজে ব্যক্তি মহৎ কর্মের মাধ্যমে অমরত্ব লাভ করে; মহাকালের প্রবাহে তিনি বেঁচে থাকেন।

সম্প্রসারিত ভাব : মানুষ ‘আশরাফুল মাখলুকাত’ বা সৃষ্টির সেরা

জীব। মানুষকে একটি নির্দিষ্ট জীবনকাল পরে মৃত্যুবরণ করতে হয়। মানুষের বয়স বেশি হলেই তার বাঁচা সার্থক হয় না; বরং মানুষ তার মহৎ কার্যাবলির জন্যই অমরত্ব লাভ করে থাকে। জীবনটা বেশিদিনের কি কমদিনের, সেটা মোটেই বিবেচ্য নয়। বিবেচ্য হলো মহৎ কর্ম করে বেঁচে থাকা। মহৎ কর্মের মাধ্যমে যারা জীবনকে মহিমাযিত করে তুলতে পারেন, প্রকৃত অর্থে তাঁরাই দীর্ঘজীবী বা চিরজীবী। সাধারণ মানুষ দীর্ঘদিন বেঁচে থাকলেও তার মৃত্যুর পর সে কালের গর্ভে বিস্মৃত হয়ে যায়; কিন্তু কীর্তিমানের মৃত্যু নেই। পৃথিবীর এ ক্ষুদ্র জীবনকালের মধ্যে নয়; বরং সে বেঁচে থাকে তার কর্মের মাঝে সুদীর্ঘকাল। দৈহিকভাবে পৃথিবীতে স্বাভাবিক মৃত্যুর শত শত বছর পরও তার মহৎ কাজ ও অম্লান কীর্তির জন্য মানুষের হৃদয়ে বেঁচে থাকে। তাই এটি সত্য যে, মানুষ সত্যিকারভাবে বেঁচে থাকেন তার কাজ বা কর্মফলের দ্বারা, বয়সে নয়।

মন্তব্য : মানুষ পৃথিবীর সংক্ষিপ্ত বয়সকালের মধ্যে নয়; বরং তার সুকর্মের স্মৃতিতে যুগ যুগ ধরে বেঁচে থাকেন।

১০ মূলভাব : ত্যাগের মধ্য দিয়ে প্রকৃত মনুষ্যত্বের পরিচয় পাওয়া যায়। ভোগের মধ্য দিয়ে প্রকাশিত হয় ব্যক্তির লোভ-লালসা। তাই ভোগ নয়, ত্যাগের চর্চাই মানুষের সুন্দর গুণাবলিকে উৎকর্ষ দান করে।

সম্প্রসারিত ভাব : ভোগ ও ত্যাগ দুটি বিপরীত বিষয়। মানুষ ইন্দ্রিয় সুখের আশায় ভোগে মত্ত হয়; অন্যদিকে মানসিক তৃপ্তির আশায় ত্যাগ স্বীকার করে। ভোগ সামাজিক সুখ আনতে পারে। তবে যিনি ত্যাগে কুণ্ঠিত হন না, তিনি অনাবিল আনন্দ উপভোগ করতে পারেন। ভোগের নিমিত্ত মানুষ জড়িয়ে যায় পঙ্কিলতায়— হিংসা, ঘৃণা, স্বার্থপরতা ও স্বেচ্ছাচারিতাকে আপন করে নেয়। ভোগবাদী মানুষ তাদের সম্পদ কখনো পরার্থে ব্যয় করে না, পরের দুঃখে কাতর হয় না; বরং হীন উদ্দেশ্য চরিতার্থ করতে সুযোগের সন্ধান করে। মানবিকতা ও পরার্থপরতা তাদের কাছে অর্থহীন। তাই সমাজের মানুষের কাছেও তাদের কোনো মর্যাদা থাকে না। তারা জন্মগতভাবে মানুষ হলেও তাদের মনুষ্যত্ব আসলে বিকশিত হয়নি। আবার কিছু মানুষ ভোগের চেয়ে ত্যাগকেই বেশি গুরুত্ব দিয়ে থাকেন। মানুষের বিপদে তাঁরা ছুটে যান, নিজের সুবিধার কথা না ভেবে বৃহত্তর কল্যাণের কথা ভাবেন, দুঃখীজনের দুঃখ দূর করতে নিজের সম্পদ বিলিয়ে দিয়ে আনন্দ পান। অন্যদিকে, ভোগবাদী মানুষের ভ্রান্ত ধারণা— ভোগের মধ্যেই সকল সুখ। তাই তারা সম্পদের পাহাড় গড়ে বিলাস-ব্যসনে মগ্ন হয়। তারা ভোগের মাধ্যমে সুখী হতে চায় বটে, তবে তারা প্রকৃত সুখের সন্ধান পায় না। বরং যেসব মানুষ নির্দিষ্ট আনন্দের জন্য ত্যাগ স্বীকার করতে প্রস্তুত থাকেন, তাঁদের দ্বারা সমাজ যেমন উপকৃত হয়, তাঁরা নিজেরাও এসব কাজের মধ্য দিয়ে অনাবিল আনন্দ লাভ করেন।

মন্তব্য : ত্যাগের মহিমা অসীম। মনুষ্যত্ব বিকাশে ত্যাগের চর্চার কোনো বিকল্প নেই। ভোগ মনুষ্যত্বকে লজ্জা ও হীনতায় ডুবিয়ে রাখে।

১১ মূলভাব : গতিশীলতা প্রাণের ধর্ম। যেখানে গতি নেই, চঞ্চলতা নেই, সেখানে স্থবিরতা জেকে বসে। স্থবিরতা যাবতীয় অর্জন ধ্বংস করে দেয়। তাই কৃতিত্ব, সাফল্য ও সমৃদ্ধির জন্য গতিশীলতার কোনো বিকল্প নেই।

সম্প্রসারিত ভাব : নদীর ধর্ম বয়ে চলা। স্রোতই তার গৌরব। স্রোত না থাকলে নদী ধীরে ধীরে মরে যায়। স্রোতের টানে বিশাল জলরাশি

পাহাড় থেকে সমুদ্রের দিকে ধেয়ে চলে। এই স্রোতই নদীকে প্রাণের স্পন্দনে জাগিয়ে রাখে, দুই পাড়ে জন্ম দেয় নতুন নতুন সভ্যতার। তার গতিচাক্ষুণ্যে ফুটে ওঠে জীবনের বলিষ্ঠ প্রকাশ। সব জঞ্জাল ভাসিয়ে নিয়ে সব রকমের পঙ্কিলতা থেকে নদীকে মুক্ত রাখে স্রোত। তবে কখনো যদি এই স্রোত থেমে যায়, বৃষ্ণ হয় কোনো গড়ির সীমায়, তবে নদী তার গৌরব হারায়। নদীর বুকে জন্ম নেয় অসংখ্য জলজ উদ্ভিদ, আবর্জনায় ঢেকে যায় টলমলে জলের ধারা। গতিচাক্ষুণ্য, ছন্দময়তা আর জলকল্লোল হারিয়ে নদীটি নির্জীব হয়ে পড়ে। ব্যক্তি, সমাজ ও জাতি নদীর মতো— গতিময়তায় তার প্রাণ; গতিহীনতায় তার মৃত্যু।

আধুনিকতা, উন্নয়ন, অগ্রগতি, সমৃদ্ধি— প্রতিটি ধারণার সঙ্গে উদ্যম, গতিময়তা ও পরিবর্তনশীলতার যোগ রয়েছে। কোনো ব্যক্তি বা সমাজ যদি প্রাচীনতাকে আঁকড়ে ধরে নতুন সময়ে টিকে থাকতে চায়, তবে ওই ব্যক্তি বা সমাজ নতুন সময়ের দাবিকে উপেক্ষা করল। অযৌক্তিক বিশ্বাস, মিথ্যা ও সংকীর্ণ সংস্কার আর অচল ভাবনার নাগপাশ থেকে বেরিয়ে যে জাতি পরিবর্তনকে মেনে নিতে পারে না, তারা স্রোতহীন নদীর মতো স্থবির হয়ে পড়ে। তাতে যুক্ত হয় মিথ্যা সংস্কারের নতুন নতুন জঞ্জাল। বৃষ্ণ হয় সম্ভাবনার সকল দ্বার। আর যে জাতি একটি স্বাভাবিক চলনধর্ম মেনে নতুনকে স্বাগত জানায়, নিঃসংকোচে আলিঙ্গন করে নতুন সভ্যতাকে, সংস্কারের নাগপাশ ছিন্ন করে নতুন জ্ঞানকে গ্রহণ করে, সে জাতিকে কখনো স্থবিরতা পেয়ে বসে না।

মন্তব্য : পরিবর্তন আর অগ্রগতির প্রধান শর্ত গতিশীলতা। সবকিছু স্থবির থাকলে জ্ঞান-বিজ্ঞান ও সভ্যতার এতখানি অগ্রসরতা ঘটতো না।

১২ মূলভাব : এ সংসারে দুঃসময়ে যে ধৈর্য ধরে, ইতিবাচক মনোভাব নিয়ে সুসময়ের অপেক্ষা করে, সে কখনো পরাজিত হয় না। ধৈর্যশীলরাই জীবন-যুদ্ধে জয়ী হয়।

সম্প্রসারিত ভাব : পৃথিবীতে জীবন একদিকে যেমন পরম উপভোগ্য, অন্যদিকে পরাজয়, লাঞ্ছনা, হতাশা ও দুর্দশায় জর্জরিত। রোগ-শোক ও অভাব-অভিযোগ সংসারের নিত্যদিনের চিত্র। তাই পীড়িত মানুষ যন্ত্রণায় অসহায়বোধ করে, আঘাতে-অপমানে জর্জরিত হয়, পরাজয়ের গ্লানিতে নিমগ্ন হয়ে হতাশায় মুষড়ে পড়ে। কিন্তু ভেঙে পড়লে চলবে না। খারাপ সময়কে মোকাবিলা করতে হবে। জীবনে পরাজয় থাকে। সে পরাজয় মেনে নিয়ে পরবর্তী যুদ্ধজয়ের সংকল্পে ব্রতী হওয়াই বুদ্ধিমানের কাজ। এজন্য দরকার অটল ধৈর্য, স্থির সংকল্প এবং যথাযথ পরিকল্পনা। এমন কিছু আঘাত আছে, যার বিপরীতে প্রতিক্রিয়া না দেখিয়ে ধৈর্য ধরলেই ভালো ফল পাওয়া যায়। কারণ, সময় সবচেয়ে বড়ো চিকিৎসক। নিজের করা ভুলেও সব পরিকল্পনা ভেঙে যেতে পারে, অযোগ্যতার দায়ে ভোগ করতে হতে পারে কঠিন দণ্ড। তখন ভেঙে না পড়ে ভুল থেকে শিক্ষা নিতে হবে। নতুন প্রতিশ্রুতি নিয়ে সবকিছু শুরু করতে হবে। তাহলেই মোচন করা সম্ভব হবে পূর্বের গ্লানি। বিপদে অসহায়ত্বকে বরণ করে হাত-পা গুটিয়ে থাকার মধ্যে নয়, তাকে মোকাবিলা করার মধ্যেই মানুষের সংগ্রামশীলতার পরিচয়।

মন্তব্য : জীবনে যত প্রতিকূলতাই আসুক না কেন, তাকে ধৈর্যের সঙ্গে ইতিবাচক দৃষ্টি দিয়ে মোকাবিলা করতে হয়। কারণ জীবনে দুঃসময় না এলে লড়াই করা শেখা যায় না।

৬. প্রবন্ধ রচনা

০১ বাংলাদেশের উৎসব

উপস্থাপনা : উৎসব সংস্কৃতির একটি গুরুত্বপূর্ণ উপাদান। এর মধ্যে নিহিত থাকে একটি জনপদের ইতিহাস-ঐতিহ্য, কিংবদন্তি এবং সংশ্লিষ্ট অঞ্চলের মানুষের বিশ্বাস ও ভালো-মন্দ লাগার উপাদান। কোনো দেশ বা সমাজের উৎসব সম্পর্কে জানা থাকলে সেই দেশ বা সমাজের মানুষকেও অনেকখানি জানা হয়ে যায়। উৎসব হতে পারে কোনো জনগোষ্ঠীকেন্দ্রিক, আবার হতে পারে জনপদ বা ভূখণ্ডকেন্দ্রিক। বাংলাদেশে বিভিন্ন ধরনের উৎসবের প্রচলন রয়েছে। তবে অধিকাংশ উৎসবই কোনো না কোনো ঋতু বা মাসকে কেন্দ্র করে আর্বর্তিত হয়। এসব উৎসব মানুষের মনে কেবল আনন্দেরই সঞ্চার করে না; বরং এর মধ্য দিয়ে দেশের ঐতিহ্য ও সংস্কৃতির সামগ্রিক চিত্রটিও ফুটে ওঠে।

নিচে বাংলাদেশের প্রধান কয়েকটি উৎসব সম্পর্কে আলোচনা করা হলো : **বাংলা বর্ষবরণ :** বাংলাদেশের সবচেয়ে বড়ো সর্বজনীন উৎসব বাংলা বর্ষবরণ। পুরোনো দিনের দুগ্ধ, বাখা, ক্লান্তি, গ্লানি ভুলে নতুনকে বরণ করে নেওয়ার উৎসব এটি। এই উৎসব বাংলাদেশের সর্বত্র পালিত হয়। ধর্ম-বর্ণ-গোত্র নির্বিশেষে বাংলাদেশের সকল শ্রেণি-পেশা-বয়সের মানুষ এই উৎসব পালন করে। এ উপলক্ষ্যে মেলা ও শোভাযাত্রার আয়োজন করা হয়। ব্যবসায়ীরা এই দিনে হালখাতা নামে হিসাবের নতুন খাতা খোলেন এবং বকেয়া আদায় উপলক্ষ্যে গ্রাহকদের নিমন্ত্রণ করে মিষ্টিমুখ করান। বৈশাখের প্রথম দিনটিতে প্রায় প্রতিটি বাড়িতে মজাদার খাবারের আয়োজন করা হয়। বাংলাদেশের রাজধানী ঢাকায় ব্যাপক আড়ম্বরে উদ্‌যাপন করা হয় বাংলা নববর্ষ। নতুন বছরের সূর্যোদয়ের মুহূর্তে রমনার বটমূলে সাংস্কৃতিক অনুষ্ঠানের আয়োজন করা হয়।

বৈসাবি : বাংলাদেশে তিনটি ক্ষুদ্র জাতিসত্তার বর্ষবরণ উৎসব 'বৈসাবি'। শব্দটি বৈসু, সাংগ্রাই, বিজু— এই তিন নামের আদ্যক্ষর নিয়ে গঠিত। বৈসু, সাংগ্রাই ও বিজু যথাক্রমে ত্রিপুরা, মারমা ও চাকমাদের বর্ষবরণ উৎসব। সাধারণত বছরের শেষ দুই দিন এবং নতুন বছরের প্রথম দিন বান্দরবান, রাঙামাটি ও খাগড়াছড়ি পার্বত্য জেলায় বৈসাবি উদ্‌যাপিত হয়।

নবান্ন : নবান্ন হলো নতুন ধানের উৎসব। হেমন্ত কালে ঘরে ঘরে নতুন ধান ওঠে। এ সময়ে গ্রামবাংলার ঘরে ঘরে পিঠা তৈরির ধুম পড়ে যায়। আত্মীয়-পরিজন ও প্রতিবেশীদের উপস্থিতিতে ঘরে ঘরে উৎসবের আমেজ ছড়িয়ে পড়ে।

একুশে ফেব্রুয়ারি : একুশে ফেব্রুয়ারি বাংলাদেশের শহিদ দিবস ও আন্তর্জাতিক মাতৃভাষা দিবস। এর সঙ্গে জড়িয়ে আছে বাঙালির দীর্ঘদিনের সাংস্কৃতিক লড়াইয়ের ইতিহাস। ১৯৫২ সালের এই দিনে বাংলা ভাষাকে রাষ্ট্রভাষা করার দাবিতে মিছিলকারীরা ১৪৪ ধারা ভঙ্গ করে। সরকারি নির্দেশে পুলিশ তাদের ওপর গুলি চালায়। এতে রফিক, সালাম, বরকত, জব্বারসহ অনেকে শহিদ হন। এই আত্মত্যাগ এবং দীর্ঘ সংগ্রামের ফলস্বরূপ ১৯৫৪ সালে বাংলা পায় রাষ্ট্রভাষার স্বীকৃতি। শহিদদের স্মৃতিকে স্মরণ করতে ও শ্রদ্ধা জানাতে পরের বছর থেকে দিনটি উদ্‌যাপিত হয়ে আসছে। খালি পায়ে প্রভাতফেরিতে অংশগ্রহণ, শহিদ মিনারে শ্রদ্ধার্ঘ্য নিবেদন, আলোচনা সভা ও বিভিন্ন সাংস্কৃতিক অনুষ্ঠান আয়োজনের মধ্য দিয়ে সারাদেশে দিবসটি পালিত হয়। শহিদদের আত্মদান ও পৃথিবীর সকল মাতৃভাষার প্রতি শ্রদ্ধা জানিয়ে ১৯৯৯ সালে ইউনেস্কো একুশে ফেব্রুয়ারিকে 'আন্তর্জাতিক মাতৃভাষা দিবস' হিসেবে ঘোষণা দেয়। পরের বছর অর্থাৎ ২০০০ সাল থেকে বাংলাদেশসহ জাতিসংঘের সদস্য দেশসমূহে একুশে ফেব্রুয়ারি

দিনটি ‘আন্তর্জাতিক মাতৃভাষা দিবস’ হিসেবে পালিত হয়ে আসছে। দিবসটির এই আন্তর্জাতিক মর্যাদা লাভ করতে কানাডা প্রবাসী রফিকুল ইসলাম ও আবদুস সালাম উদ্যোগ গ্রহণ করেছিলেন।

স্বাধীনতা ও জাতীয় দিবস : ১৯৭১ সালের ২৬শে মার্চ জাতির পিতা বঙ্গবন্ধু শেখ মুজিবুর রহমান বাংলাদেশের স্বাধীনতা ঘোষণা করেন। পৃথিবীর মানচিত্রে স্বাধীন সার্বভৌম বাংলাদেশের আবির্ভাব ঘটে। বাংলাদেশের স্বাধীনতা ও জাতীয় দিবস হিসেবে দিনটি পালিত হয়। সরকারি ও বেসরকারি নানা উদ্যোগের মধ্য দিয়ে দিনটি পালিত হয়ে থাকে। অফিসে, বাড়িতে, সড়কে, যানবাহনে সর্বত্র বাংলাদেশের জাতীয় পতাকা শোভা পায়। এদিন জাতীয় স্মৃতিসৌধসহ সারাদেশের স্মৃতিসৌধগুলোতে পুষ্পস্তবক অর্পণ করা হয়। একই সঙ্গে শিশু-কিশোরসহ বিভিন্ন বাহিনীর কুচকাওয়াজ, আলোচনা ও সাংস্কৃতিক অনুষ্ঠানের মধ্য দিয়ে দিনটি উদ্‌যাপিত হয়।

বিজয় দিবস : ১৬ই ডিসেম্বর বাংলাদেশের বিজয় দিবস। স্বাধীনতা ঘোষিত হওয়ার পর থেকে পাকিস্তানি দখলদারদের বিরুদ্ধে দীর্ঘ নয় মাস রক্তক্ষয়ী যুদ্ধের শেষে ১৯৭১ সালের এই দিনে মুক্তিযোদ্ধারা বিজয় অর্জন করে। দিনটি বাংলাদেশের জন্য অত্যন্ত আনন্দের ও গৌরবের। তাই ডিসেম্বর এলেই সমগ্র দেশ লাল-সবুজে সেজে ওঠে। ১৬ই ডিসেম্বর জাতির শ্রেষ্ঠ সন্তানদের প্রতি শ্রদ্ধা জানাতে জাতীয় স্মৃতিসৌধসহ সারা দেশের স্মৃতিসৌধগুলোতে পুষ্পস্তবক অর্পণ করা হয়। বিজয় দিবস উপলক্ষ্যে বাংলাদেশের প্রায় সব অঞ্চলে বিভিন্ন ধরনের সাংস্কৃতিক উৎসব ও ক্রীড়া অনুষ্ঠানের আয়োজন করা হয়।

বইমেলা : বইমেলা বাংলাদেশের আরেকটি প্রধান সাংস্কৃতিক উৎসবে পরিণত হয়েছে। বিভিন্ন সময়ে বাংলাদেশের বিভিন্ন স্থানে বইমেলায় আয়োজন করা হয়। কিন্তু সবচেয়ে উল্লেখযোগ্য বইমেলা— ফেব্রুয়ারি মাস জুড়ে ঢাকার বাংলা একাডেমি প্রাঙ্গণে আয়োজিত অমর একুশে গ্রন্থমেলা। এই বইমেলা পরিণত হয় পাঠক ও লেখকের মিলনমেলায়। বইমেলায় অনেক লেখক তাঁদের নতুন বই যেমন প্রকাশ করেন, তেমনি পূর্বে প্রকাশিত বইও মেলায় পাওয়া যায়। বইমেলা এখন আর কেবল বই কেনাবেচার মেলা নয়, এটি পরিণত হয়েছে প্রগতিশীল সাংস্কৃতিক উৎসবে।

ঈদ : ঈদ মুসলমানদের সবচেয়ে বড়ো ধর্মীয় উৎসব। ঈদ মানে আনন্দ, খুশি। ঈদ আসে আনন্দ আর মিলনের বার্তা নিয়ে। এই দিনে ধনী-নিরন ভেদাভেদ ভুলে ঈদের আনন্দ ভাগ করে নেয়। বাংলাদেশসহ বিভিন্ন দেশে সাড়ম্বরে ঈদ উৎসব পালিত হয়। বছরে দুটি ঈদ। প্রথমে আসে ঈদুল ফিতর এবং পরে ঈদুল আজহা। রমজান মাসের শেষে হিজরি শাওয়াল মাসের চাঁদ দেখা গেলে ঈদুল ফিতর উদ্‌যাপিত হয়। জিলহজ মাসের দশম দিনে পালিত হয় ঈদুল আজহা। ঈদুল আজহায় পশু কোরবানি করা হয়। একে বলা হয় আত্মত্যাগের ঈদ। দুটি ঈদেই মুসলমানরা নতুন পোশাক পরে, ধনীরা গরিবদের দান করে। ঈদগাহে ঈদের নামাজের আয়োজন করা হয়। নামাজের পর একে অন্যের সঙ্গে কোলাকুলি করে। বাড়িতে ভালো খাবারের আয়োজন করা হয়। নিজে খেয়ে এবং অন্যকে খাইয়ে ঈদের আনন্দ ভাগাভাগি করে নেওয়া হয়।

দুর্গাপূজা : হিন্দু সম্প্রদায়ের সবচেয়ে বড়ো ধর্মীয় উৎসব দুর্গাপূজা। শরৎকালে এ পূজা অনুষ্ঠিত হয়। সপ্তমী, অষ্টমী, নবমী এই তিনদিন দুর্গাপূজা অনুষ্ঠিত হয়। তবে সপ্তমীর আগের দিন ষষ্ঠী তিথিতে দেবীর বোধন অনুষ্ঠান হয়। নবমীর পরদিন দশমীর উৎসবকে বলা হয় বিজয়া দশমী। বোধন থেকে বিসর্জনের দিনগুলো বাঙালি হিন্দু সম্প্রদায়ের মানুষের জীবনকে আন্দোলিত করে। পাড়ায় পাড়ায় তৈরি হয় পূজা মণ্ডপ, থাকে প্রসাদের আয়োজন। বিভিন্ন স্থানে অনুষ্ঠিত হয় মেলা। অষ্টমীর দিন আনন্দ আর জাঁকজমক থাকে বেশি। রাতে হয় আরতি।

দশমীর দিন দেবী-বিসর্জনের মধ্য দিয়ে শেষ হয় দুর্গাপূজার আনুষ্ঠানিকতা।

বুধ পূর্ণিমা : বুধ পূর্ণিমা বৌদ্ধদের প্রধান ধর্মীয় উৎসব। বৈশাখ মাসের পূর্ণিমা তিথিতে উদ্‌যাপিত হয় বলে এর অন্য নাম বৈশাখী পূর্ণিমা। এই দিনের সঙ্গে গৌতম বুদ্ধের জন্ম, তিরোধান ও বোধিলাভের স্মৃতি জড়িত। প্রার্থনা ও দান-দক্ষিণার মাধ্যমে এবং ফানুশ উড়িয়ে এই উৎসব পালন করা হয়।

বড়ো দিন : বাংলাদেশের খ্রিষ্ট ধর্মাবলম্বীরা পালন করে বড়ো দিন। যিশু খ্রিষ্টের জন্মদিন উপলক্ষ্যে তারা এ উৎসব পালন করে। প্রতিবছর ২৫শে ডিসেম্বর বড়ো দিনের উৎসব পালিত হয়। গির্জায় প্রার্থনা করে, কেক কেটে, চকলেট বিতরণ করে, গান গেয়ে এই উৎসব পালন করা হয়।

অন্যান্য উৎসব : সারা বছরই বাংলাদেশে কোনো না কোনো উৎসব পালিত হয়। যেমন— রবীন্দ্র জয়ন্তী, নজরুল জয়ন্তী, লালন-উৎসব, মধুমেলা, মহররম, ঈদে মিলাদুন নবি, সরস্বতী পূজা, লক্ষ্মী পূজা, প্রবারণা পূর্ণিমা, ইস্টার সানডে ইত্যাদি।

উপসংহার : মানুষের জীবনে উৎসবের তাৎপর্য অত্যন্ত গভীর। উৎসব মানুষের মধ্যে সাম্য ও মৈত্রী গড়ে তোলে। আনন্দমুখর উৎসব-প্রাঙ্গণে ঘুচে যায় মানুষে মানুষে ভেদাভেদ। উৎসব ছাড়া সকল শ্রেণির মানুষের মিলনমেলার চিত্র কল্পনাই করা যায় না। জাতীয় উৎসবগুলো মানুষের মধ্যে দেশপ্রেমকে জাগ্রত করে। উৎসবের মধ্যে যে মূল্যবোধের বীজ আছে তা জাগ্রত করতে পারলে নিজস্ব সংস্কৃতি যেমন রক্ষা পাবে, তেমনি মানুষের মধ্যে গড়ে উঠবে প্রীতি ও সৌহার্দ।

০২ লঞ্চ ভ্রমণের অভিজ্ঞতা

উপস্থাপনা : ধান, নদী ও খালের জন্য বিখ্যাত বরিশাল। সেই বরিশালে যাওয়ার একটি সুযোগ পেয়ে গেলাম। তাও আবার লঞ্চে। ছোটো খালার শুরবাড়ি বরিশালে। গত মাসে যখন তাঁরা সপরিবার সেখানে যাচ্ছিলেন, আমাকেও সাথে যাওয়ার জন্য প্রস্তাব করলেন। আমি রাজি হয়ে গেলাম। কারণ, বাসে, ট্রেনে, এমনকি নৌকায় ভ্রমণের অভিজ্ঞতা আমার রয়েছে; কিন্তু লঞ্চে ভ্রমণের সুযোগ হয়নি। খালাতো ভাই রাজীবের মুখে লঞ্চে ভ্রমণের মজার মজার অনেক কথা শুনছি। তাই আমি রাজি হতে মোটেও দেরি করিনি।

বর্ণনা : সন্ধ্যা সাড়ে ছয়টায় আমরা সদরঘাটে পৌছলাম। ঘাটের টিকিট কিনে প্রবেশ করলাম জেটিতে। দেখলাম প্রকাণ্ড সব লঞ্চে জেটির সঙ্গে বাঁধা। প্রত্যেক লঞ্চের লঞ্চে আলাদা আলাদা করে রাখা। কর্মচারীরা নিজ নিজ লঞ্চে ওঠার জন্য যাত্রীদের জোর গলায় ডেকে চলেছে। জেটিতে প্রচুর মানুষ। নানা গন্তব্যের যাত্রীরা নিজেদের লঞ্চে খুঁজে নিচ্ছে। কেউ একা, কারো সঙ্গে পরিবারের সদস্যরা। হকাররা তাদের পণ্য সাজিয়ে যাত্রীদের মনোযোগ আকর্ষণের চেষ্টা করছে। হকাররা শুধু জেটিতেই নয়, নৌকায় করেও বিক্রি করছে তাদের জিনিসপত্র। নদীর ওপার থেকে ছোটো ছোটো নৌকায় যাত্রীরা এপারে আসছে।

প্রত্যেকটি লঞ্চেই উজ্জ্বল আলোয় সজ্জিত। আমরা বড়ো একটি লঞ্চে উঠে পড়লাম। সিঁড়ি দিয়ে দোতলায় উঠে নির্ধারিত স্থানে ব্যাগ ও অন্যান্য জিনিস রাখলাম। লঞ্চে ৪ তলাবিশিষ্ট। জিজ্ঞেস করে জানতে পারলাম এর দৈর্ঘ্য প্রায় ৯০ মিটার। বেশ কৌতূহল নিয়ে লঞ্চে ঘুরে ঘুরে দেখলাম। দোতলা ও তিনতলায় বিলাসবহুল কক্ষ। নিচতলার পুরোটাই ডেক। নিচতলার ডেকের মেঝেতে যাত্রীরা চাদর বিছিয়ে নিজের শোয়ার ব্যবস্থা করছে। লঞ্চের পেছন দিকে ইঞ্জিনরুম, রেস্টোরাঁ ও একটি চায়ের দোকান। জানা গেল, জরুরি চিকিৎসা সেবার ব্যবস্থাও রাখা হয়েছে। আর নিরাপত্তা নিশ্চিত করতে টহল দিচ্ছে আনসার সদস্যরা।

রাত ৯টার দিকে লঞ্চ বরিশালের উদ্দেশ্যে যাত্রা করল। যদিও লঞ্চ ছাড়ার সময় ছিল সাড়ে আটটা। ধীরে ধীরে জেটির মানুষগুলো ছোটো হতে হতে বাপসা হয়ে গেল। আমরা ঘাট থেকে অনেক দূরে চলে এলাম। লঞ্চের সারেং একটু পরপর সাইরেন বাজাচ্ছেন আর সার্চলাইট ফেলে পথটা দেখে নিচ্ছেন। অনেকক্ষণ চলার পর একটি বড়ো নদী দেখতে পেলাম। তীর দেখা যায় না। নদীটির নাম শুনলাম মেঘনা। এটি বাংলাদেশের গভীরতম ও প্রশস্ততম নদী। রেলিং ধরে দাঁড়ালে যতদূর দৃষ্টি যায় ছড়িয়ে ছিটিয়ে থাকা ছোটো ছোটো আলোকবিন্দু চোখে পড়ে। খালা জানানেন ওগুলো মাছধরা নৌকা। নৌকাগুলো দেখে ‘পদ্মানদীর মাঝি’ উপন্যাসের কথা মনে পড়ে গেল।

কিছুক্ষণ পরপর একটি দুটি ইঞ্জিনচালিত নৌকা ভটভট আওয়াজ তুলে উন্টো দিকে যাচ্ছে কিংবা আমাদের লঞ্চ সেগুলোকে পেছনে ফেলে এগিয়ে যাচ্ছে। আকাশের তারকারাজি আর নদীতে ভেসে থাকা আলোকবিন্দুগুলো অপরূপ দৃশ্য তৈরি করেছে। একসময় রাতের খাওয়ার সময় হয়ে গেল। লঞ্চে রান্না করে ইলিশ মাছ ভাজা আর ডাল দিয়ে রাতের খাওয়া সারলাম। খাওয়ানোর পরে বসলাম কেবিনের সামনের চেয়ারে। সবাই মিলে রাতের নীরব সৌন্দর্য উপভোগ করছি আর গল্প করছি। ঘড়িতে তখন রাত এগারোটো। যাত্রীদের কেউ কেউ শূয়ে পড়েছে আবার কেউ কেউ আড্ডা দিচ্ছে। ডেকে হকার তেমন দেখা যাচ্ছিল না। খালামণি বরিশালের বিখ্যাত ব্যক্তিদের গল্প শোনান। রাজনীতিবিদ ও সমাজসেবী অশ্বিনীকুমার দত্ত, অবিভক্ত বাংলার মুখ্যমন্ত্রী শেরে বাংলা আবুল কাশেম ফজলুল হক, বীরশ্রেষ্ঠ মহিউদ্দীন জাহাঙ্গীর, দার্শনিক আরজ আলী মাতুব্বর, ‘মনসামজল’ কাব্যের রচয়িতা বিজয় গুপ্ত, কুসুমকুমারী দাশ ও তাঁর পুত্র জীবনানন্দ দাশ, সুফিয়া কামাল, কামিনী রায়, আবু জাফর ওবায়দুল্লাহ, ‘আমার ভাইয়ের রক্তে রাঙানো’ গানের রচয়িতা আবদুল গাফফার চৌধুরী এবং গানটির সুরকার আলতাফ মাহমুদসহ আরও অনেকের কথা জানলাম যারা এই বরিশালেরই কৃতি সন্তান। প্রিয় কবি জীবনানন্দ দাশের শহরে যাচ্ছি ভেবে রোমাঞ্চে অনুভব করলাম। হঠাৎ নৌপুলিশের একটি স্পিডবোট গতি কমিয়ে পাশ দিয়ে চলে গেল। যাত্রীদের নিরাপত্তা নিশ্চিতকরণ ও অবৈধ মালামাল পরিবহণ রোধে এই অশ্বকার রাতের তারা টহল দিচ্ছে। দূরে আরও কয়েকটি লঞ্চ দেখা যাচ্ছে। সারেং মাঝে মাঝে সাইরেন বাজাচ্ছে। একটু পরপরই সার্চলাইট ফেলে পথ দেখে নিচ্ছে। সারেং-এর কক্ষে গিয়ে দেখলাম কত রকমের প্রযুক্তি তারা ব্যবহার করছে— রাডার, কম্পাস, জিপিএস ইত্যাদি।

উপসংহার : হয়তো প্রথমবার লঞ্চে চড়েছি বলে উত্তেজনা ঘুম আসছিল না। তবুও খালামণির কথায় শূয়ে পড়লাম। ভোর পাঁচটার দিকে খালামণি ডেকে তুললেন— ‘এই তোরা ওঠ, আমরা বরিশালে পৌঁছে গিয়েছি।’ হুড়মুড় করে উঠে পড়লাম। দেখলাম ঘাটে আরও কয়েকটি লঞ্চ বাঁধা। যাত্রীরা নেমে যাচ্ছে। ভিড় কমলে আমরাও ব্যাগগুলো নিয়ে নেমে পড়লাম। গত রাতটি আমার জীবনের স্মরণীয় একটি রাত হয়ে থাকবে। অসাধারণ একটি ভ্রমণের ভালোলাগা নিয়ে আমরা পা ফেললাম জীবনানন্দের শহরে।

০৩ একটি ঝড়ের রাত

উপস্থাপনা : প্রকৃতি যেমনভাবে মানুষকে আনন্দ ও সুখ-শান্তি দিয়ে থাকে, তেমনভাবে প্রাকৃতিক দুর্যোগের মাধ্যমে তাদের কপালে দুঃখ-দুর্দশা ও হতাশার চিহ্নও এঁকে দেয়। এ দেশের প্রাকৃতিক দুর্যোগগুলোর মধ্যে ঝড় অন্যতম। প্রায় প্রতিবছরই ঝড় এ দেশের মানুষের ওপর বিভীষিকাময় অক্রমণ চালায়। এমনি শত-সহস্র ঝড়ের মধ্যে আমার জীবনেও বিচিত্র এক ঝড়ের অভিজ্ঞতা রয়েছে। নিচে এর বিস্তারিত আলোচনা উপস্থাপন করা হলো :

ভৌগোলিক প্রভাব : ভৌগোলিক অবস্থান এবং ভূ-প্রাকৃতিক কারণে

বাংলাদেশে ঝড়-বৃষ্টি, জলোচ্ছ্বাসসহ নানা প্রাকৃতিক দুর্যোগ ভয়াবহরূপ ধারণ করে। প্রায় প্রতিবছরই এ কারণে ব্যাপক ধ্বংসলীলা ও প্রাণহানি ঘটে থাকে। প্রাকৃতিক দুর্যোগের এ দেশে নানা প্রতিকূল অবস্থার সাথে সংগ্রাম করে আমাদেরকে টিকে থাকতে হয়। ঝড়-তুফান কত দম্পতির সাজানো সংসার তছনছ করে দেয়, কত প্রিয়জনকে কেড়ে নেয়, তার কোনো হিসাব নেই।

ঘটনার বিবরণ : তামিরুল মিল্লাত মাদরাসার কামিলের ছাত্র ছিলাম তখন। কয়েকজন বন্ধু মিলে বজোপাসাগরের কোল ঘেঁষে জেগে ওঠা কুতুবদিয়া দ্বীপে বেড়াতে গেলাম। একটি বাড়িতে আমাদের থাকার জায়গা হলো। যেখান থেকে সমুদ্রবক্ষের তরঙ্গায়িত জলরাশি এবং অন্তহীন সমুদ্রের দিকচক্রবাল অবলোকন করে আনন্দে যেমন সময় কাটছিল, তেমনি এক রাতের ঝড় আমাদের সব আনন্দ ম্লান করে দিয়ে স্মৃতিপটে এক দুঃসহ দৃশ্য এঁকে দিয়েছিল।

ঝড়ের পূর্বাভাস : তখন ছিল কার্তিক মাস। সকাল থেকেই আকাশটা মেঘাচ্ছন্ন। মাঝে মাঝে দু-এক পশলা বৃষ্টি হচ্ছে। সমগ্র প্রকৃতির মুখে কেমন একটি বিষণ্ণ গাম্ভীর্য। সূর্য মেঘের আড়ালে চলে গেল, চারদিকে এলোমেলো বাতাস বইছে। প্রকৃতি কেমন যেন বিরূপ আকার ধারণ করল। সন্ধ্যা ঘনিয়ে আসছে। রেডিওতে বিপদ সংকেত ঘোষণা করা হচ্ছে।

ঝড়ের আগমন : সন্ধ্যার কিছুক্ষণ পরেই প্রকৃতিলোকে অভাবনীয় পরিবর্তন দেখা গেল। বাতাসের তীব্র গতিবেগসহ ঘনকৃষ্ণ পুঞ্জ পুঞ্জ মেঘ আকাশের এক প্রান্ত থেকে অন্য প্রান্তে দ্রুতগতিতে ছুটে আসতে লাগল। সজ্ঞা সজ্ঞা শুনতে পেলাম ঝড়ো হাওয়ার একটানা শৌ শৌ শব্দ ও ক্ষুব্ধ ঝটিকার উত্তাল গর্জন। প্রচণ্ড বর্ষণ শুরু হয়ে গেল। মুহূমুহু বিদ্যুৎবহি বলসিত হয়ে গোটা আকাশটাকে বিদীর্ণ করে দিতে চাইল। চারদিকে জমাটবাঁধা নিশ্চিদ অশ্বকার। শুধু ভেসে আসছিল আতঙ্কিত মানুষের চিৎকার।

ঝড়ের ভয়াবহতা : ঝড়ের প্রচণ্ড প্রকোপে আমরা ঘরে আশ্রয় নিলাম। ঝড়ের তীব্র ঝাপটায় জানালা-দরজা কেঁপে উঠতে লাগল। দুর্বীর শক্তিতে এক বিপুলাকার দানব যেন বাড়িটার ঝুঁটি ধরে নাড়া দিচ্ছে। বাড়ির আশপাশের গাছগুলো শিকল বাঁধা আহত অতিকায় পাখির মতো ছটফট করছে। আকাশ, সমুদ্র, পৃথিবী অশ্বকারে মিলেমিশে একাকার হয়ে গিয়ে প্রকাণ্ড মূর্তি ধারণ করেছে। প্রচণ্ড ঝড়ের তাড়বে আমাদের ঘরের জানালার কপাট খুলে পড়ল। আচমকা ধাক্কা মাথার ওপর থেকে কয়েকটি টিন মুহূর্তে অশ্বকারে হারিয়ে গেল। আমরা সবাই মৃত্যুর প্রহর গুণতে লাগলাম। হঠাৎ করে বাড়িটার ভূতোর ডাকে সম্মিত ফিরে পেলাম। তার ডাকে কোনোরকমে একজন আরেকজনকে ধরে ঘর থেকে বের হয়ে এলাম।

বজ্র, বিদ্যুৎ, বৃষ্টিধারা সবকিছু উপেক্ষা করে একটি আশ্রয় কেন্দ্রের বারান্দায় এসে উঠলাম। মুহূর্তেই দূরের বাড়িঘরের রক্তবর্ণ একটি অস্মৃত বাতি জ্বলে উঠল। ভয়াবহ বিপদ অনুভব করলাম। আমার হৃদয়ের ভেতরে আরেকটি ঝড় উঠল, সমুদ্রের মহা প্রলয়ংকরী দৃশ্য দেখার সাহস, ধৈর্য সব হারিয়ে চোখ বুজলাম।

ঝড়-পরবর্তী অবস্থা : ঝড়ের প্রচণ্ড তাড়বে জ্ঞান হারিয়ে আশ্রয় কেন্দ্রের বারান্দায় হিম হয়ে পড়েছিলাম। ভূতোর ডাকে চোখ খুলে দেখলাম, ঝড় থেমে গেছে, তবে সমুদ্রের বিক্ষুব্ধ গোঙানি এখনো থামেনি। আকাশে সূর্য, হেঁড়া হেঁড়া মেঘ উঁকি দিচ্ছে। বাইরে বের হয়ে এলাম। বাইরে অবর্ণনীয় বীভৎস দৃশ্য। মাঠেঘাটে শত শত গরু, মেঘ, ছাগলের মৃতদেহ পড়ে রয়েছে। তীর ঘেঁষে কতগুলো ভাঙা নৌকা ও জেলেদের লাশ ভেসে যাচ্ছে। চরের অসংখ্য মানুষ তাদের আপনজনদের সন্ধান না পেয়ে অসহায় দৃষ্টিতে সর্বগ্রাসী সমুদ্রের পানে চেয়ে আছে। কী অসহায় তাদের দৃষ্টি, কী মর্মভেদী তাদের বুকফাটা

ক্রন্দন। স্বজনহারাদের আর্তচিৎকারে সেদিন কুতুবদিয়ার আকাশ-বাতাস প্রকম্পিত হয়ে উঠেছিল।

ঝড়ের রাত্রির অভিজ্ঞতা : প্রকৃতি কতখানি নির্ভুর, কতখানি ভয়ংকর হতে পারে আগে তা জানতে পারিনি। সেই ভয়াল রাতে ঝড়ের সর্ববিধংসী রূপ প্রত্যক্ষ করলাম, উপলব্ধি করলাম ঝড়ের তাড়ব কত মারাত্মক।

উপসংহার : বিভিন্ন সময়ে বিভিন্ন মাধ্যমে ঝড়ের তাড়বলীলার কথা শুনছি। কিন্তু কুতুবদিয়ায় গিয়ে ঝড়ের প্রচণ্ড তাড়বলীলা প্রত্যক্ষ করেছি। ঝড় থেমে গেছে, সমুদ্র শান্ত হয়েছে। রোদের মুখে প্রকৃতি আবার হেসে উঠেছে; কিন্তু সেই বিভীষিকাময় ঝড়ের রাতটির কথা আমার স্মৃতি থেকে এখনো মুছে যায়নি।

০৪ কৃষি উদ্যোক্তা

উপস্থাপনা : অর্থ বিনিয়োগের মাধ্যমে এবং জনবল কাজে লাগিয়ে কোনো ব্যক্তি বা ব্যক্তিবর্গ উপার্জনের প্রত্যাশায় যখন কোনো কাজ করার পরিকল্পনা করে, তখন তাকে উদ্যোগ বলে। যারা এই উদ্যোগ গ্রহণ করে তাদের বলে উদ্যোক্তা। প্রতিটি পেশাকে কেন্দ্র করে উদ্যোক্তা হওয়া সম্ভব। একজন উদ্যোক্তা আত্মনির্ভরশীল হন এবং নতুন কর্মসংস্থান সৃষ্টি করেন। কৃষিকে উদ্যোগ হিসেবে গ্রহণ করার বিষয়টি বাংলাদেশে নতুন। বিপুল জনসংখ্যা, কৃষিজমির পরিমাণ হ্রাস, বেকারত্ব— এসবকিছুর ভেতরে একদল তরুণ কৃষিকে প্রধান অবলম্বন হিসেবে গ্রহণ করছেন। শিক্ষিত তরুণদের কৃষিক্ষেত্রে পরিকল্পিত উদ্যোগ ব্যক্তিগত, পারিবারিক ও জাতীয় উন্নয়নে গুরুত্বপূর্ণ ভূমিকা পালন করছে।

কৃষক ও কৃষি উদ্যোক্তা : কৃষক ও কৃষি উদ্যোক্তার মধ্যে পার্থক্য আছে। একজন কৃষক তাঁর পণ্য বাজারে বিক্রির চেয়ে পরিবারের চাহিদা মেটানোকে বেশি গুরুত্ব দেন অথবা কিছুটা বিক্রির জন্য এবং কিছুটা পরিবারের চাহিদা মেটাতে ব্যয় করেন। অন্যদিকে, একজন কৃষি উদ্যোক্তার মূল লক্ষ্য বাজারজাতকরণ ও মুনাফা তৈরি। তাই একজন কৃষি উদ্যোক্তাকে ব্যবসায়িক মনোবৃত্তির হতে হয় এবং তার কাজে প্রচুর ঝুঁকি থাকে।

কৃষি উদ্যোগের ক্ষেত্রসমূহ : শস্য, প্রাণিসম্পদসহ কৃষি ও কৃষিসংশ্লিষ্ট যে-কোনো বিষয়কে কৃষি উদ্যোগের আওতায় আনা সম্ভব। তবে এক্ষেত্রে উদ্যোক্তাকে অবশ্যই মূলধন, জমির পরিমাণ, মাটির গুণাগুণ, অবকাঠামো, বালাই ব্যবস্থাপনা, লোকবল, পরিবহণ ব্যবস্থা, বাজার ও চাহিদা, উৎপাদিত পণ্যের সংরক্ষণ ব্যবস্থা প্রভৃতি বিষয় বিবেচনা করতে হয়। ধান, গম, ডাল, আখ, পাট, ঘাস, শাকসবজি, ফুল, ফল, মসলা, মধু, মাশরুম, রেশম, মাছ প্রভৃতির চাষ ও উৎপাদন; গরু-ছাগল, হাঁস-মুরগি প্রভৃতি প্রাণিসম্পদের লালন-পালন; গাছের চারা, জৈব সার, বায়োগ্যাস, দুধ ও দুধজাত পণ্যের উৎপাদন ও বিপণন ইত্যাদি কৃষি উদ্যোগের আওতাভুক্ত।

কৃষি উদ্যোক্তার করণীয় : একজন কৃষি উদ্যোক্তাকে নিম্নোক্ত করণীয় সম্বন্ধে অবগত থাকা উচিত :

- উদ্যোক্তাকে প্রথমেই তার পণ্যের বাজার সম্বন্ধে ভালো ধারণা রাখতে হবে।
- প্রয়োজনীয় অবকাঠামো ও প্রযুক্তির ব্যবহার নিশ্চিত করে অপচয় ও ব্যয়হ্রাসের ব্যবস্থা করতে হবে।
- একজন কৃষি উদ্যোক্তাকে উদ্ভাবনী ক্ষমতাসম্পন্ন হতে হয়। কারণ, তাঁর এই উদ্ভাবনী বুদ্ধি প্রতিযোগিতামূলক বাজারে টিকে থাকতে সাহায্য করবে।

ঘ. কৃষিখাতে উদ্যোক্তাকে অনেক রকমের ঝুঁকি নিতে হয়। এসব ক্ষেত্রে লাভ-ক্ষতি বিবেচনা করে প্রয়োজনীয় ঝুঁকি নিতে হবে এবং ক্ষতি কাটিয়ে ওঠার সম্ভাব্য প্রস্তুতি রাখতে হবে।

ঙ. উদ্যোক্তা যে ক্ষেত্র নিয়ে কাজ করবেন, সে বিষয়ে যাবতীয় তথ্যের নিয়মিত খোঁজ-খবর রাখা জরুরি। উপযুক্ত খাবার, সার, কীটনাশক, আধুনিক যন্ত্রপাতিসহ প্রযুক্তি সম্বন্ধে ধারণা থাকা দরকার। সম্প্রতি স্মার্টফোন ও ইন্টারনেটের ব্যবহার উদ্যোক্তাদের সাফল্যে ভূমিকা রাখছে।

চ. একটি নির্দিষ্ট লক্ষ্যে কয়েকজন উদ্যোক্তা একসঙ্গে কাজ করতে পারেন। এতে বড়ো ধরনের কাজে হাত দেওয়া সম্ভব হয় এবং ঝুঁকি হ্রাস পায়। তবে অবশ্যই সতর্কতার সঙ্গে অংশীদার নির্বাচন করা উচিত।

ছ. পরিবর্তনশীল প্রাকৃতিক ও রাজনৈতিক পরিবেশ, শ্রমিক ও পণ্য পরিবহণ, বাজার পরিস্থিতি ও প্রতিযোগীদের কথা চিন্তা করে কাজে অগ্রসর হলে ক্ষতিগ্রস্ত হওয়ার সম্ভাবনা কম থাকে।

কৃষি উদ্যোক্তাদের জন্য বাংলাদেশ সরকারের কয়েকটি উদ্যোগ : কৃষির উন্নয়নে বাংলাদেশ সরকার বেশকিছু গুরুত্বপূর্ণ পদক্ষেপ গ্রহণ করেছে। যেমন—

- সরকারি ও বেসরকারি ব্যাংকগুলো কৃষির ধরন অনুযায়ী স্বল্প সুদে বিভিন্ন অঙ্কের ঋণ প্রদান করছে।
- কৃষি সম্প্রসারণ অধিদপ্তর, প্রাণিসম্পদ অধিদপ্তর ও মৎস্য সম্পদ অধিদপ্তর উদ্যোক্তাদের যে-কোনো প্রয়োজনে পরামর্শ দিয়ে থাকে।
- বছরব্যাপী চাষ করার জন্য কৃষি সম্প্রসারণ অধিদপ্তরের ওয়েবসাইটে ‘ডিজিটাল শস্য ক্যালেন্ডার’ ও ‘বালাইনাশক নির্দেশিকা’ দেওয়া আছে, যা ঠিক সময়ে ঠিক ফসল ফলাতে সাহায্য করে। ১৬১২৩ নম্বরে ফোন করে কৃষিসংক্রান্ত তথ্য পাওয়া যায়। বাংলাদেশ কৃষি গবেষণা ইনস্টিটিউট কৃষি প্রযুক্তি সম্বন্ধে জানাতে ‘কৃষি প্রযুক্তি ভান্ডার’ নামে একটি মোবাইল অ্যাপ তৈরি করেছে। কৃষি বিপণন অধিদপ্তর কৃষি দ্রব্যাদির বাজারদর, কৃষকপ্রাপ্ত বাজারদর, সাপ্তাহিক ও পাক্ষিক ভিত্তিতে প্রেরণ করে।

উপসংহার : একজন কৃষি উদ্যোক্তা সফল হলে একদিকে যেমন দারিদ্র্য দূরীভূত হয়, অন্যদিকে জাতীয় অর্থনীতি শক্ত ভিত্তির ওপর প্রতিষ্ঠা পায়। তবে কৃষি উদ্যোক্তাকে অবশ্যই সততার সঙ্গে কাজ করা উচিত। কারণ তাঁর পণ্য চূড়ান্ত বিচারে খাবারের চাহিদা মেটাতে।

০৫ বাংলাদেশের মুক্তিযুদ্ধ

অথবা, বাংলাদেশের স্বাধীনতা সংগ্রাম

অথবা, জাতীয় জীবনে মুক্তিযুদ্ধের চেতনা

উপস্থাপনা : বাঙালির আবহমান কালের ইতিহাসে এক মাইলফলক ১৯৭১ সাল। এক মহিমাঘিত ইতিহাস রচিত হয়েছে এই ১৯৭১ সালে। রক্ত, অশ্রু আর অপরিসীম আত্মত্যাগের ভেতর দিয়ে একান্তরে আমরা অর্জন করেছি স্বাধীনতা। আর বীরত্বপূর্ণ সশস্ত্র মুক্তিযুদ্ধের ভেতর দিয়ে অভ্যুদয় হয়েছে স্বাধীন সার্বভৌম বাংলাদেশের। মুক্তিযুদ্ধ তাই আমাদের জাতীয় জীবনে এক অহংকার, গৌরবের এক মহান বিজয়গাথা।

মুক্তিযুদ্ধের সূচনা : গণআন্দোলনের মুখে জেনারেল আয়ুব খানের পদত্যাগের পর জেনারেল ইয়াহিয়া খান ১৯৬৯ সালে পুনরায় সামরিক শাসন জারি করেন। তিনি ক্ষমতা গ্রহণ করেই ঘোষণা করলেন, শীঘ্রই সাধারণ নির্বাচনের মাধ্যমে গণতান্ত্রিক শাসন প্রতিষ্ঠার লক্ষ্যে নির্বাচিত জনপ্রতিনিধিদের হাতে ক্ষমতা হস্তান্তর করে সামরিক বাহিনী ব্যারাকে ফিরে যাবে। ১৯৭০ সালের নির্বাচনে আওয়ামী লীগ নিরঙ্কুশ

সংখ্যাগরিষ্ঠতা অর্জন করে। কিন্তু নির্বাচনের সংখ্যাগরিষ্ঠ দল আওয়ামী লীগের কাছে ক্ষমতা হস্তান্তরে ইয়াহিয়া খান গড়িমসি শুরু করেন। প্রেসিডেন্ট ইয়াহিয়া খান ভুট্টোর পরামর্শে ১৯৭১ সালের তেসরা মার্চ জাতীয় পরিষদের প্রথম অধিবেশনের তারিখ ঘোষণা করেন। ইতবসরে জুলফিকার আলী ভুট্টো এসে শেখ মুজিবের সাথে আলাপ-আলোচনা করে পশ্চিম পাকিস্তানে ফিরে যান। কিন্তু ইয়াহিয়া খান হঠাৎ পয়লা মার্চ জাতীয় পরিষদের অধিবেশন অনির্দিষ্টকালের জন্য স্থগিত ঘোষণা করেন।

অপারেশন সার্চলাইট : ইতিহাসের ঘণিত গণহত্যা ১৯৭১ সালের মার্চের 'অপারেশন সার্চলাইট'। ওইদিন পাকিস্তানি সেনাবাহিনী ঢাকা বিশ্ববিদ্যালয় এলাকা, পিলখানা, রাজারবাগ পুলিশ লাইনসহ ঢাকার বিভিন্ন এলাকায় এবং ঢাকার বাইরে দেশের বিভিন্ন স্থানে হামলা চালিয়ে হত্যা করে অসংখ্য নিরস্ত্র বাঙালিকে। পরদিন থেকেই শুরু হয় প্রতিরোধ-সংগ্রাম।

মুজিবনগর সরকার গঠন : বাংলাদেশের মুক্তিযুদ্ধ পরিচালনার জন্য ১৯৭১ সালের ১০ই এপ্রিল মুজিবনগর সরকার গঠন করা হয়। এইদিন স্বাধীনতার ঘোষণাপত্রও গৃহীত হয়। শেখ মুজিবুর রহমানকে রাষ্ট্রপতি ও তাজউদ্দীন আহমদকে প্রধানমন্ত্রী করে গঠিত সরকার ১৭ই এপ্রিল মেহেরপুর জেলার বৈদ্যনাথতলা গ্রামের আশ্রয়নে শপথ গ্রহণ করে। শেখ মুজিবের অনুপস্থিতিতে সৈয়দ নজরুল ইসলাম মুজিবনগর সরকারের অস্থায়ী রাষ্ট্রপতি হিসেবে শপথ নেন। তখন থেকেই এই জায়গার নতুন নাম হয় মুজিবনগর। পরবর্তীকালে স্বাধীনতার ঘোষণাপত্র অনুযায়ী দেশ চলতে থাকে। বাংলাদেশ প্রতিষ্ঠার সংগ্রামে সবচেয়ে বেশি কার্যকর ও সুদূরপ্রসারী সাংবিধানিক পদক্ষেপ ছিল মুজিবনগর সরকার গঠন। এই সরকারের নেতৃত্বে নয় মাসের মহান মুক্তিযুদ্ধ পরিচালিত হয়। বিশ্বব্যাপী জনসমর্থন আদায়ে এই সরকার গুরুত্বপূর্ণ ভূমিকা রাখে।

সশস্ত্র মুক্তিযুদ্ধ ও জনযুদ্ধ : ১৯৭১ সালের ২৫শে মার্চ নিরস্ত্র জনগণের ওপর পাকিস্তানি সেনাবাহিনী আক্রমণ চালালে বাঙালি ছাত্র, জনতা, পুলিশ, ইপিআর ও বেজাল রেজিমেন্টের সেনা সদস্যরা সাহসিকতার সাথে তাদের বিরুদ্ধে বুখে দাঁড়ায়। বিনা প্রতিরোধে পাকিস্তানি সেনাবাহিনীকে বাঙালিরা ছাড় দেয়নি। দেশের জন্য যুদ্ধ করতে গিয়ে বহু মুক্তিযোদ্ধা বিভিন্ন রণাঙ্গানে শহিদ হন। মুক্তিযোদ্ধাদের এ ঋণ কোনোদিন শোধ হওয়ার নয়। জাতি চিরকাল মুক্তিযোদ্ধাদের শ্রেষ্ঠ সন্তান হিসেবে মনে রাখবে।

বাংলাদেশের মুক্তিযুদ্ধে সর্বস্তরের বাঙালি অংশগ্রহণ করে। বাংলাদেশের বিভিন্ন নৃগোষ্ঠীর মানুষও মুক্তিযুদ্ধের পক্ষে সক্রিয়ভাবে অংশ নেয়। তাই এ যুদ্ধকে বলা হয় গণযুদ্ধ বা জনযুদ্ধ। বাংলাদেশের মুক্তিযুদ্ধের মূল নিয়ামক শক্তি ছিল জনগণ। তাই মুক্তিযুদ্ধ শুরু হলে বিভিন্ন রাজনৈতিক দলের কর্মী, ছাত্র, পেশাজীবী, নারী, সাংস্কৃতিক কর্মীসহ সর্বস্তরের জনসাধারণ নিজ নিজ অবস্থান থেকে যুদ্ধে ঝাঁপিয়ে পড়ে। জীবনের মায়া ত্যাগ করে দেশকে শত্রুমুক্ত করে স্বাধীন সার্বভৌম বাংলাদেশ প্রতিষ্ঠা করে। কর্নেল আতাউল গনি ওসমানীকে প্রধান সেনাপতি করে মুক্তিবাহিনী গঠন করা হয়েছিল।

মুক্তিযুদ্ধ পরিচালনার জন্য পুরো দেশকে ১১টি সেক্টরে ভাগ করা হয়। ৩রা ডিসেম্বর থেকে মুক্তিবাহিনীর সঙ্গে ভারতীয় মিত্রবাহিনী যুক্ত হয়ে যৌথভাবে যুদ্ধ পরিচালনা করে। যুদ্ধে পর্যুদস্ত হয়ে ১৬ই ডিসেম্বর রেসকোর্স ময়দানে ৯৩ হাজার পাকিস্তানি সৈন্য নিয়ে জেনারেল নিয়াজী আত্মসমর্পণ করে। দীর্ঘ ৯ মাস যুদ্ধের পর মুক্তিযোদ্ধাদের বিজয় হয়।

মুক্তিযুদ্ধের চেতনা ও প্রাপ্তি : পাকিস্তানি শোষকদের শোষণ-বঞ্ছনা ও ভেদ-বৈষম্যের অবসান, অর্থনৈতিক মুক্তি, সর্বোপরি স্বাধীন সার্বভৌম

বাংলাদেশ প্রতিষ্ঠাই ছিল মুক্তিযুদ্ধের মূল চেতনা। কিন্তু দুঃখজনক হলেও বাস্তবতা হলো, এখনো মুক্তিযুদ্ধের এ চেতনা প্রতিষ্ঠিত হয়নি। এখনো এদেশের মানুষ পথের ধারে ঘুমায়, মানুষ মরে অনাহারে, মানবাধিকার লঙ্ঘিত হয়, গণতান্ত্রিক অধিকার থেকে মানুষ হয় বঞ্চিত। সন্ত্রাস, দুর্নীতি ও দুঃশাসনের কবলে পড়ে দেশবাসী বড়ো অসহায়। আর এসবই মুক্তিযুদ্ধের চেতনার পরিপন্থি।

উপসংহার : মুক্তিযুদ্ধ বাঙালির ইতিহাসে এক সোনালি অধ্যায়। এ অধ্যায় বড়ো উজ্জ্বল, অত্যন্ত বেদনা ও আনন্দের। মুক্তিযুদ্ধ থেকেই বাঙালির সভ্যতায় অন্যায়ের বিরুদ্ধে আন্দোলনের চেতনা জন্ম নেয়। তবে স্বাধীনতার এতোদিন পরেও সার্বভৌমত্ব রক্ষা, অর্থনৈতিক মুক্তি ও সাংস্কৃতিক আযাদির জন্য সংগ্রাম করতে হচ্ছে। তাই ক্ষুধা-দারিদ্র্যমুক্ত সুখী-সমৃদ্ধ বাংলাদেশ গড়ার মাধ্যমে মুক্তিযুদ্ধের চেতনা বাস্তবায়নের জন্য দল-মত-জাতি-ধর্ম নির্বিশেষে সকলকে নতুন করে শপথ নিতে হবে।

০৬ ক্রিকেটে বাংলাদেশ

উপস্থাপনা : ইংল্যান্ডের সীমা পেরিয়ে ক্রিকেট বহু আগেই বিশ্বের একটি জনপ্রিয় খেলায় পরিণত হয়েছে। বাংলাদেশেও ক্রিকেট নিয়ে উন্মাদনার শেষ নেই। দেশের সর্বত্রই ক্রিকেট এখন জনপ্রিয় খেলা। বাংলাদেশ ক্রিকেট দল ইতোমধ্যে আন্তর্জাতিক অঙ্গনে একটি মর্যাদাপূর্ণ জায়গা করে নিয়েছে।

বাংলাদেশে ক্রিকেট : উপমহাদেশে ক্রিকেটের আগমন হয় ইংরেজদের মাধ্যমে ঔপনিবেশিক কালে। তখন ক্রিকেট ছিল মূলত কলকাতাকেন্দ্রিক। ১৯৪৭-এর পর থেকে ঢাকা অঞ্চলেও ক্রিকেট খেলা জনপ্রিয়তা পেতে শুরু করে। ১৯৭১ সালে বাংলাদেশ স্বাধীন হওয়ার পর নতুনভাবে বাংলাদেশ ক্রিকেট যাত্রা শুরু করে। বাংলাদেশ ক্রিকেট দলের নিয়ন্ত্রণকারী প্রতিষ্ঠানের নাম রাখা হয় 'বাংলাদেশ ক্রিকেট কন্ট্রোল বোর্ড' (বিসিসিবি), বর্তমানে যা 'বাংলাদেশ ক্রিকেট বোর্ড' (বিসিবি) নামে পরিচিত।

খেলার প্রস্তুতি : দু'দলেই দু'জন ক্যাপ্টেন বা অধিনায়ক থাকে। তাদের সহযোগিতার জন্য দু'জন সহঅধিনায়কও থাকে। ক্যাপ্টেনদ্বয় ইনিংস শুরু করার আগে 'টস' বা লটারি করে। 'টসে' জয়লাভকারী দল নির্ধারণ করবে কারা আগে ব্যাট অথবা ফিল্ডিং করবে। ক্যাপ্টেন টসের আগেই তার দলের খেলোয়াড় নির্বাচন করে থাকে। খেলা পরিচালনার জন্য দু'জন আম্পায়ার থাকে।

খেলার উপকরণ ও পদ্ধতি : ক্রিকেট খেলার জন্য আবশ্যকীয় উপকরণের মধ্যে কাঠ বা বেত নির্মিত বিশেষ ধরনের ব্যাট ও প্রায় মুষ্টির ন্যায় আয়তনবিশিষ্ট একটি কাঠ, সুতা ও চামড়ানির্মিত শক্ত বলই প্রধান। এ ছাড়া তিনটি কাঠখন্ডের প্রয়োজন হয়। ক্রিকেটের ভাষায় একে 'উইকেট' (Wicket) বলা হয়। উইকেটের মধ্যের ব্যবধান সমান রাখার জন্য নির্দিষ্ট মাপের এক টুকরা কাঠখন্ড উইকেটের মাথায় স্থাপন করা হয়। একে 'বেল' বলে। বেলের সামান্য আঘাত পেলেই এটি ভূপতিত হয়। এতে খেলার মীমাংসা সহজ হয়। এতদ্ব্যতীত যে খেলোয়াড় বল পেটায়, যে উইকেটের পশ্চাতে থেকে বলটি ধরে এবং উইকেটের প্রতি লক্ষ রাখে, তারা তুলার তৈরি একপ্রকার পুরু প্যাড পায়ের পাতা থেকে উরুদেশ পর্যন্ত আবৃত করে পরিধান করে। তাছাড়া অন্যান্য খেলোয়াড়ের হাতে পুরু দস্তানা থাকে। সুতরাং এটি খুব ব্যয়বহুল খেলা।

খেলার নিয়মকানুন : ক্রিকেট খেলা দু'দলের মধ্যে অনুষ্ঠিত হয়। প্রত্যেক দলে অনধিক ১১ জন খেলোয়াড় থাকে। এর জন্য একটি নির্দিষ্ট আয়তনবিশিষ্ট সমতল মাঠের প্রয়োজন। এ মাঠের মধ্যস্থলে পরস্পরের সম্পূর্ণ বিপরীত দিকে ২২ গজ দূরে তিন তিনটি উইকেট পোতা হয়।

খেলার শুরুতে এক পক্ষের ব্যাটধারী দু'দিকের উইকেটের কাছে পরস্পরে মুখোমুখি দাঁড়ায়। একদল প্রথমে ব্যাট পেটাবার জন্য প্রস্তুত থাকে। প্রতিপক্ষ খেলোয়াড়ের একজন বল নিক্ষেপ করে। তাকে 'নিক্ষেপকারী' বা 'বোলার' বলা হয়। এক পক্ষের ১০ জন খেলোয়াড় আউট হয়ে গেলে অথবা নির্ধারিত ওভার শেষ হয়ে গেলে অপরপক্ষ বল পেটাবার অধিকার লাভ করে।

ক্রিকেটের প্রকার : ক্রিকেট খেলা প্রধানত তিন প্রকার। টি-টুয়েন্টি, ওয়ান-ডে এবং টেস্ট। টি-টুয়েন্টি ক্রিকেট নির্ধারিত বিশ ওভার করার মাধ্যমে অনুষ্ঠিত হয়। এতে একজন বোলার সর্বোচ্চ চার ওভার পর্যন্ত বল করতে পারবে। ওয়ান-ডে ক্রিকেট নির্ধারিত পঞ্চাশ ওভার অর্থাৎ তিনশত বল করার মাধ্যমে অনুষ্ঠিত হয়। এতে একজন বোলার সর্বোচ্চ দশ ওভার তথা ষাটটি পর্যন্ত বল করার অধিকার রাখে। আর টেস্ট ক্রিকেট পাঁচ দিনব্যাপী অনুষ্ঠিত হয়। এতে প্রত্যেক দিন নব্বই ওভার বল করার সুযোগ থাকে। এ প্রকার খেলায় বোলারের জন্য ওভারের সংখ্যা নির্ধারিত নেই।

আয়োজক দেশ হিসেবে বাংলাদেশ : একাধিক ক্রিকেট টুর্নামেন্টের আয়োজন করে সুনাম অর্জন করেছে বাংলাদেশ। বাংলাদেশ টেস্ট খেলার যোগ্যতা অর্জনের আগেই আইসিসি নকআউট বিশ্বকাপ ১৯৯৮ আয়োজনের দায়িত্ব পায়। ২০১১ সালে বিশ্বকাপের দশম আসরের অন্যতম আয়োজকের দায়িত্ব পালন করে বাংলাদেশ। এরই ধারাবাহিকতায় ২০১৪ সালে টোয়েন্টি টোয়েন্টি বিশ্বকাপ আয়োজনের ভার পড়ে বাংলাদেশের ওপর। বাংলাদেশের সরকার, জনগণ ও সংশ্লিষ্টদের নিষ্ঠা ও আন্তরিকতা ক্রিকেট-বিশ্বে ব্যাপক প্রশংসিত হয়।

বিশ্ব ক্রিকেটে বাংলাদেশ : ওয়ানডে স্ট্যাটাস পাওয়ার পর থেকে ২০১০ সাল পর্যন্ত বাংলাদেশে ক্রিকেট দলের প্রাপ্তির থেকে অপ্রাপ্তির পাল্লাটাই ভারী ছিল বেশি। মাঝেমাঝে বড়ো দলের বিপক্ষে জয় পেলেও ধারাবাহিকতা ছিল না বললেই চলে। ২০১০ সালের পর থেকে ক্রমান্বয়ে বাংলাদেশ ক্রিকেট দল উন্নতির দিকে অগ্রসর হতে থাকে। ২০১০ সালে দেশের মাটিতে প্রভাবশালী নিউজিল্যান্ডকে ৪-০ ব্যবধানে পরাজিত করে। ২০১২ সালের এশিয়া কাপে ভারত ও শ্রীলঙ্কাকে পরাজিত করে ফাইনাল খেলার যোগ্যতা অর্জন করে এবং প্রবল প্রতিদ্বন্দ্বিতা করে ফাইনালে পাকিস্তানের সাথে ১ রানে পরাজিত হয়। একই বছরে শ্রীলঙ্কার মাটিতে ১-১ এ সিরিজ ড্র করে। ২০১৩ সালে আবারো দেশের মাটিতে নিউজিল্যান্ডকে ৩-০ ব্যবধানে 'বাংলা ওয়াশ' করে নিজেদের সামর্থ্যের প্রমাণ দেয়। বাংলাদেশের এই ধারাবাহিক সাফল্য ক্রিকেট বিশ্বে নতুন শক্তির উত্থানের জানান দিচ্ছে। এছাড়া ২০১৫ সালের বিশ্বকাপে বাংলাদেশের উল্লেখযোগ্য দিক ছিল ওয়ান-ডেতে পাকিস্তানকে ৩-০ ব্যবধানে হোয়াইটওয়াশ এবং দক্ষিণ আফ্রিকা ও ভারতের বিরুদ্ধে ২-১ ব্যবধানে সিরিজ জয়। ২০১৯ সালে অনুষ্ঠিত বিশ্বকাপ ক্রিকেটে বাংলাদেশ দক্ষিণ আফ্রিকাকে ২১ রানে, ওয়েস্টইন্ডিজকে ৭ উইকেটে এবং আফগানিস্তানকে ৬২ রানে পরাজিত করতে সক্ষম হয়। ২০২০ সালে ভারতকে হারিয়ে প্রথমবারের মতো আইসিসি অনূর্ধ্ব ১৯ বিশ্বকাপ জয় করে বাংলাদেশের যুবারা বিশ্বকে অবাক করে দেয়। ২০২৬ সালেও বাংলাদেশ ক্রিকেট দল বিভিন্ন দেশের সাথে খেলে জয়ের ধারা অব্যাহত রেখেছে।

উপকারিতা : ক্রিকেট একটি স্বাস্থ্যপ্রদ ও আনন্দদায়ক খেলা। ক্রিকেট খেলা একাধারে খেলোয়াড়দের শৃঙ্খলাবোধ, পারস্পরিক সমঝোতা, ধৈর্য, সহিষ্ণুতা, দায়িত্বজ্ঞান ও সতর্কতা শিক্ষা দেয়। তাছাড়া খেলোয়াড়রা দেশ-বিদেশে ভ্রমণ করে বৈদেশিক অর্থ ও বিচিত্র অভিজ্ঞতা অর্জন করার সুযোগ পায়। ফলে বিশ্বের এক দেশের সাথে অন্য দেশের সম্পর্কোন্নয়নে ক্রিকেট সেতুবন্ধনের ভূমিকা পালন করে। দর্শকরা এ খেলা দেখে নির্মল আনন্দ লাভ করে।

অপকারিতা : ক্রিকেট অত্যন্ত ঝুঁকিপূর্ণ খেলা। বোলার কর্তৃক নিক্ষিপ্ত বল যে-কোনো খেলোয়াড়কে মারাত্মকভাবে আহত করতে পারে, যা পরিণামে মৃত্যুর কারণও হতে পারে। ক্রিকেট অত্যন্ত ব্যয়বহুল ও সময়সাপেক্ষ খেলা। যা অনেক কাজের ব্যাঘাত ঘটায়, আবার দর্শকদেরও ঝৈর্যহানি ঘটায়। এছাড়া খেলার শাসনবান্ধব মূল্যে দর্শকদের হৃদরোগের ঝুঁকি বহন করে।

উপসংহার : বাংলাদেশের মানুষ ক্রিকেট খেলা পছন্দ করে। ক্রিকেটের সঙ্গে এ দেশের কোটি কোটি মানুষের আবেগ জড়িত। তাই বাংলাদেশের বিজয়ে গোটা দেশ যেমন বাঁধাভাঙা উল্লাসে ফেটে পড়ে, আবার পরাজয়ে মুষড়ে পড়ে। তবে কোনো পরাজয়েই দেশবাসী খেলোয়াড়দের প্রতি আস্থা হারায় না। তাদের সমর্থন ও উৎসাহ দিয়ে যায়, যাতে পরবর্তী খেলায় খেলোয়াড়রা সক্ষমতার পরিচয় দিতে পারে। ক্রিকেটের উন্নয়নে সংশ্লিষ্টদের উচিত নতুন খেলোয়াড় তৈরিতে ভূমিকা রাখা, উন্নত প্রশিক্ষণের ব্যবস্থা করা, ঘরোয়া ক্রিকেটের প্রতি আরও যত্নবান হওয়া এবং ক্রিকেটবান্ধব পরিবেশ নিশ্চিত করা।

০৭ কৃষিকাজে বিজ্ঞান

উপস্থাপনা : বর্তমান যুগ বিজ্ঞানের যুগ। বিজ্ঞানের নতুন নতুন উদ্ভাবন মানুষের জীবনে নিয়ে এসেছে বৈপ্লবিক পরিবর্তন। বিজ্ঞানের প্রায়োগিক দিকের নাম প্রযুক্তি। এই প্রযুক্তি মানুষের জীবনযাত্রাকে করে তুলেছে আরামদায়ক। কৃষিক্ষেত্রেও বিজ্ঞানের জয়যাত্রা লক্ষণীয়। অসংখ্য কৃষি প্রযুক্তি কৃষিকাজকে করে তুলেছে সহজসাধ্য। অজস্র উচ্চ ফলনশীল জাতের ফসল আবিষ্কারের মধ্য দিয়ে কৃষিপণ্যও হয়েছে সহজলভ্য।

কৃষির অতীত-কথা : কৃষি হলো মানবসভ্যতার আদিম পেশা। জীবন ধারণের তাগিদে আদিম মানুষ প্রাকৃতিকভাবে উৎপন্ন ফলমূল গুহায় নিয়ে আসতো এবং বনজজালের পশু-পাখি শিকার করতো। প্রকৃতির ওপর পূর্ণ নির্ভরশীলতার কারণে প্রায়ই তাদের খাদ্য-সংকটে পড়তে হতো। বছরের কিছু সময়ে তাদের কোনো খাবার জুটত না। ফলে খাদ্যের সন্ধানে তাদের একস্থান থেকে অন্য স্থানে ঘুরে বেড়াতে হতো। এই অবস্থা থেকে মুক্তি পেতে আদিম মানুষ এক পর্যায়ে পশুপালন ও বীজ বপন করতে শেখে। এর ফলে খাদ্যদ্রব্য সুলভ হয় এবং জীবনযাত্রা হয়ে ওঠে অপেক্ষাকৃত সহজ ও নিশ্চিত। তবে বিজ্ঞান ও প্রযুক্তির বৈপ্লবিক পরিবর্তনের আগে পর্যন্ত কৃষিকাজ ছিল অত্যন্ত শ্রমসাপেক্ষ এবং প্রকৃতির ওপর নির্ভরশীল।

কৃষি ও বিজ্ঞান : বিজ্ঞানের অবদানে ধীরে ধীরে কৃষিক্ষেত্রে নতুন প্রযুক্তির আবির্ভাব ঘটেছে। কৃষিকাজকে সহজ ও কম শ্রমসাধ্য করতে কৃষি-বিজ্ঞানীরা নিরন্তর গবেষণা করছেন। ফলে একদিকে যেমন চাষপদ্ধতিতে পরিবর্তন আসছে, ফসল নির্বাচন ও নতুন নতুন ফসল তৈরির কাজেও তেমনি অগ্রগতি হচ্ছে। কৃষি-বিজ্ঞানের এসব গবেষণা পৃথিবীকে আজ শস্যে ও ফসলে সমৃদ্ধ করে তুলেছে। পৃথিবীর মানুষের জন্য এখন যতটা ফসল দরকার, তার চেয়ে অনেক বেশি ফসল পৃথিবীতে ফলছে। জমিকে উর্বর করতে আবিষ্কৃত হয়েছে বিভিন্ন ধরনের সার। পুরোনো প্রযুক্তির লাঙল, মই প্রভৃতির পরিবর্তে ব্যবহৃত হচ্ছে ট্রাক্টর। উদ্ভাবিত হয়েছে উন্নত জাতের বীজ ও উচ্চ ফলনশীল ফসলের জাত। এতে অল্প সময়ে ও অল্প পরিশ্রমে অধিক ফসল উৎপাদন করা সম্ভব হচ্ছে। ফসল এবং বীজ উৎপাদন এবং তা সংরক্ষণেও বিজ্ঞান সহযোগিতা করেছে। সেচ ব্যবস্থায় এসেছে পরিবর্তন। পশু-পাখি ও মাছের রোগজনিত মৃত্যুর হারও হ্রাস পেয়েছে কৃষি-চিকিৎসার অগ্রগতির কারণে। এভাবে কৃষি-বিজ্ঞান ও প্রযুক্তি কৃষিকাজের জন্য আশীর্বাদ হয়ে উঠেছে।

বিজ্ঞানের জয়যাত্রা : একসময় যে মানুষ দূরের জিনিসের কথা ভাবেনি, আজ তারাই মজলগ্রহে নভোযান পাঠিয়েছে। আর এটা ঘটেছে বিজ্ঞানের পরম উন্নতির ফলে। আমাদের দৈনন্দিন জীবনে বিশেষ করে কৃষিকাজে বিজ্ঞান এক অতি গুরুত্বপূর্ণ বিষয়। কেননা প্রকৃতিতে রয়েছে আমাদের দৈনন্দিন জীবনের প্রয়োজনীয় সকল সম্পদ। যেদিন থেকে মানুষ আগুন জ্বালাতে শেখে, যেদিন সে পাথরের অস্ত্র নিয়ে বন্যপশুর সঙ্গে যুদ্ধ আরম্ভ করেছে, যেদিন সে চাকা গড়তে পেরেছে, সেদিন থেকেই বিজ্ঞানের জয়যাত্রা শুরু হয়েছে। সেদিন মানুষ আবিষ্কার করল অন্যান্য প্রাণীর তুলনায় তার ক্ষুদ্র অবয়বে সূক্ষ্ম অথচ প্রবল বুদ্ধিমত্তাসম্পন্ন মস্তিষ্ক। সে প্রকৃতির রহস্য ভেদ করার জন্য নব নব তত্ত্ব আবিষ্কার করল। প্রকৃতিকে আবিষ্কার করার নেশায় অস্থির হয়ে উঠল। কিছুতেই তার তৃপ্তি নেই। তাই প্রকৃতির দেওয়া শস্য সম্পদে সে সন্তুষ্ট থাকতে পারেনি। আধুনিক কৃষিবিদ্যা রপ্ত করে নিজের রুচির পরিতৃপ্তি ও পরিপুষ্টি সাধন করেছে।

কৃষিকাজে বিজ্ঞান : মানুষ খাদ্যের জন্য কৃষির ওপর নির্ভরশীল। আজ বিজ্ঞানের প্রভাবে কৃষিকাজ আদিম স্তর কাটিয়ে আধুনিক স্তরে পৌঁছেছে। পানি সেচের ব্যবস্থা, উন্নত ধরনের বীজ, ভূমি সংরক্ষণ ইত্যাদির প্রভূত উন্নতি কৃষি বিজ্ঞানেরই অবদান। পৃথিবীতে আজ জনসংখ্যা দ্রুত বৃদ্ধি পাচ্ছে, কিন্তু ফসলি জমির পরিমাণ সীমিত। এ সীমিত কর্তব্যযোগ্য জমিতে বিজ্ঞানের সহায়তায় মানুষ ক্ষুধার্তের অনু সংগ্রহের প্রয়াস চালাচ্ছে।

বিভিন্ন দেশে কৃষিকাজে বিজ্ঞান : উন্নত দেশসমূহে আজ কৃষিকাজ সম্পূর্ণভাবে বিজ্ঞানের ওপর নির্ভরশীল। জমি কর্ষণ, বীজ বপন, সেচকার্য, ফসল কাটা, মাড়াই, বাছাই ইত্যাদি সব কাজ আজ যন্ত্রের সাহায্যে সম্পাদন করা হয়। ট্রাক্টরের সাহায্যে জমি চাষ করে মেশিন দিয়ে জমিতে বীজ বপন করা হয়। বপনের জন্য সংরক্ষিত বীজবাছাই কাজও যন্ত্রের সাহায্যে করা হয়। জমিতে প্রয়োজনমতো সার দেওয়া কিংবা ফসলে পোকা লাগলে পোকা দমনের জন্য ওষুধ ছিটানোর কাজও যন্ত্রের সাহায্যে করা হয়। আজকের যুগে ফসলের জমিতে সেচের জন্য মানুষ আকাশের দিকে তাকিয়ে থাকে না। অনাবৃষ্টি বা অতিবৃষ্টি শস্য জন্মানোর অন্তরায় হয় না। আজ মানুষ গভীর নলকূপ এবং পাম্পের সাহায্যে জমিতে সেচ দেয়। ফসল-কাটা যন্ত্রের সাহায্যে একদিকে ফসল কাটছে, অন্যদিকে মাড়াই হয়ে শস্য ও খড় আলাদা হয়ে যাচ্ছে। উন্নত দেশের লোকেরা কৃষিকাজকে যান্ত্রিক করে ফেলেছে। শীতপ্রধান দেশে ‘শীত নিয়ন্ত্রণ’ ঘর বানিয়ে শাকসবজি এবং ফলমূল সংরক্ষণ করছে। বিজ্ঞানের সাহায্যে বর্তমানে শূষ্ক মরুভূমির মতো জায়গাতে সেচ, সার ও অন্যান্য বৈজ্ঞানিক প্রক্রিয়ায় চাষাবাদ করে সোনার ফসল ফলাচ্ছে। এভাবে বিজ্ঞান কৃষিকাজে এক যুগান্তকারী বিপ্লব সৃষ্টি করেছে।

বাংলাদেশে কৃষিকাজে বিজ্ঞান : আমাদের দেশেও এখন কৃষিকাজে বৈজ্ঞানিক প্রযুক্তির ব্যবহার হচ্ছে। খড়বিখড়তার কারণে জমি কর্ষণে অবশ্য ব্যাপকভাবে ট্রাক্টর ব্যবহার করা যাচ্ছে না। মানুষ এখন আর চাতকের ন্যায় বৃষ্টিধারার জন্য আকাশের দিকে তাকিয়ে থাকে না। এখন সেচের জন্য ব্যবহার করা হয় গভীর নলকূপ এবং মেশিনচালিত পাম্প। বপনের জন্য ব্যবহার করা হয় উন্নত ধরনের বীজ। বীজ সংরক্ষণে সাহায্য নেওয়া হয় বৈজ্ঞানিক প্রযুক্তির। রাসায়নিক সার ব্যবহার করে ফসল উৎপাদনের মাত্রা বাড়ানো হচ্ছে। আগে যে জমিতে একধরনের ফসল হতো, বিজ্ঞানের সাহায্যে এখন সেখানে তিন ধরনের ফসল হয়। তবে আমাদের দেশের কৃষিকাজ এখনও সম্পূর্ণ যান্ত্রিক করা সম্ভব হয়নি। চাষাবাদে বিজ্ঞানকে আরও ব্যাপকভাবে কাজে লাগাতে পারলে আমাদের খাদ্য সমস্যা সমাধান করা যাবে, এটা নিশ্চিত বলা যায়।

উপসংহার : আমাদের মতো উন্নয়নশীল দেশে কৃষিকাজে বিজ্ঞানের ব্যবহার একান্ত জরুরি। এ ছাড়া বিকল্প কোনো পথ নেই। বর্তমানে সরকারি-বেসরকারিভাবে ব্যাপকভিত্তিতে কৃষির উন্নতির জন্য আধুনিক প্রযুক্তি ব্যবহারের মাধ্যমে বিভিন্ন পদক্ষেপ নেওয়া হয়েছে এবং কার্যক্রম চালিয়ে যাওয়া হচ্ছে। এটা আমাদের জন্য অবশ্যই আশার কথা। কৃষির উন্নতির ওপরই আমাদের সার্বিক উন্নতি নির্ভরশীল।

০৮ মাদকাসক্তি ও এর প্রতিকার

অথবা, মাদকদ্রব্যের কুফল

উপস্থাপনা : আধুনিক অগ্রসর সমাজের রক্ষে রক্ষে বিষবাক্ষের মতো ছড়িয়ে পড়েছে জীবনবিনাশী নীল নেশা মাদকদ্রব্য। মাদকদ্রব্যের অপব্যবহার ও অবৈধ বিস্তারে বিশ্ববাসী আজ শঙ্কিত। মাদকদ্রব্য সেবনে মানুষ কীভাবে যে ধ্বংসের অন্ধকারে এগিয়ে যায় তা সে নিজেও বুঝতে পারে না। এর ফলে আসক্ত ব্যক্তি নিজে যেমন ক্ষতিগ্রস্ত হচ্ছে তেমনি জাতীয় জীবনকেও এক ভয়াবহ পরিণামের দিকে ঠেলে দিচ্ছে। এর কুপ্রভাবে সমাজ বিশেষত তরুণ সমাজ আজ বিপথগামী হতে চলেছে।

মাদকদ্রব্য : মাদকদ্রব্য হচ্ছে সেসব বস্তু যা গ্রহণের ফলে স্নায়বিক বৈকল্যসহ নেশার সৃষ্টি হয়। বিশ্বের বিভিন্ন দেশে যেসব মাদকদ্রব্যের প্রচলন রয়েছে সেগুলোর মধ্যে গাঁজা, আফিম, ভাং, চরস, মরফিন, মারিজুয়ানা, মদ, কোকেন, প্যাথেড্রিন, হেরোইন, তামাক, ফেনসিডিল, বিয়ার, তাড়ি, অ্যালকোহল, বোডেন, এল এস ডি, হাশিশ, পপি, ইয়াবা, ক্যানাবিস ইত্যাদি প্রধান। তবে আমাদের দেশে বর্তমানে গাঁজা, হেরোইন, ইয়াবা, ফেনসিডিল, বিয়ার ইত্যাদি প্রাধান্য বিস্তার করে আছে। মাদকদ্রব্যের মধ্যে সবচেয়ে প্রাচীন হলো আফিম। আফিম থেকেই বিশেষ প্রক্রিয়ায় হেরোইন তৈরি হয়।

মাদকাসক্তি : বিভিন্ন ধরনের মাদকদ্রব্য সেবন করে নেশাগ্রস্ত হওয়াকেই মাদকাসক্তি বলা হয়। বিশ্ব স্বাস্থ্য সংস্থা (WHO)-এর মতে, মাদকাসক্তি হচ্ছে চিকিৎসায় গ্রহণযোগ্য নয় এমন দ্রব্য অতিরিক্ত পরিমাণে ক্রমাগত বিক্ষিপ্তভাবে গ্রহণ করা এবং এসব দ্রব্যের ওপর নির্ভরশীল হয়ে পড়া।

মাদকদ্রব্যের কুফল : মাদকদ্রব্যের নানাবিধ কুফল রয়েছে। যথা—

- ১. নৈতিক অবক্ষয়** : মাদকদ্রব্য গ্রহণের ফলে বহুলোকের বিশেষত তরুণ সমাজের ধ্বংস নেমে আসছে, শুরু হয়েছে এক ভয়াবহ নৈতিক অবক্ষয়ের। এর ফলে তরুণ সমাজ অধঃপতনের নিম্নসীমায় পৌঁছে যাচ্ছে।
- ২. সামাজিক কুফল** : মাদকদ্রব্য গ্রহণের ফলে ব্যক্তিজীবন; পারিবারিক জীবন ও সামাজিক জীবন বিপর্যস্ত হয়ে পড়ে। মাদকাসক্তির প্রভাবে যুবক শ্রেণি চুরি, ডাকাতি, ছিনতাই, চাঁদাবাজি, উচ্ছৃঙ্খলতা এবং নানারূপ অত্যাচার-অনাচারের আশ্রয় নেয়। মাদকদ্রব্য ব্যক্তিকে নেশাগ্রস্ত করে তার ব্যক্তিত্বকে নষ্ট করে, সদৃগুণ ও শুভ চৈতন্যকে নষ্ট করে দেয়। জীবনের প্রতি বিতৃষ্ণা এবং বেঁচে থাকার অনীহা সৃষ্টি করে। ফলে তারা যা ইচ্ছা তাই করে।
- ৩. দৈহিক ক্ষতি** : মাদকদ্রব্য দেহের নানারকম ক্ষতি সাধন করে। মাদকদ্রব্য সেবনের ফলে মানুষ ক্রমান্বয়ে অসুস্থ হয়ে পড়ে; রোগ-প্রতিরোধ ক্ষমতা নষ্ট হয়। প্রজনন ক্ষমতা হ্রাস পায়। যকৃত ও ফুসফুসের ক্ষতি, যক্ষ্মা, ক্যান্সার ও জন্ডিসের মতো প্রাণঘাতী রোগে আক্রান্ত হয়ে পড়ে। কিডনি ধীরে ধীরে অকেজো হয়ে পড়ে, রক্তস্ফলিত দেখা দেয়। দৃষ্টিশক্তি নষ্ট হয়, হৃদরোগ হয়। এছাড়া চামড়া খসখসে, চুলকানি, ঘা, ফোঁড়া ইত্যাদি হয়ে অনেক সময় শরীরে পচন ধরে।

৪. **মানসিক কুফল** : মাদকদ্রব্য গ্রহণের ফলে মানসিক ভারসাম্যহীনতার পাশাপাশি দেহের মাংসপেশির কম্পন সৃষ্টি হয়। এভাবে একসময় তারা মানসিকভাবে জড়তাগ্রস্ত হয়ে পড়ে, তাদের অনুভূতিগুলো ভোঁতা হয়ে যায়। ফলে ভালোমন্দ জ্ঞানহীন হয়ে নৈতিকতাবিরোধী কাজে কোনো দ্বিধাবোধ তাদের থাকে না।

৫. **মেধার অপচয়** : মাদকদ্রব্য গ্রহণের ফলে ব্যক্তির মেধা বিনষ্ট হয়, স্মরণশক্তি কমে যায়। নেশাগ্রস্ত লোকের ব্যক্তিত্বের অবলুপ্তি ঘটে এবং স্বাভাবিক জীবনে বেঁচে থাকার সামর্থ্য থাকে না। এদের পক্ষে কোনো গুরুদায়িত্ব পালন করা সম্ভব হয় না।

৬. **অর্থনৈতিক ক্ষতি** : মাদকদ্রব্য ক্রয় করতে টাকার দরকার হয়। কোনো কোনো মাদকদ্রব্য অনেক মূল্য দিয়ে কিনতে হয়। এজন্য বিপুল অর্থের অপচয় হয়।

৭. **অন্যান্য কুফল** : মাদকদ্রব্য ব্যবহারের ফলে যুবসমাজের মাঝে অপরাধপ্রবণতা বৃদ্ধি পায়। সামাজিকভাবে তারা হয়ে প্রতিপন্ন হয় ও অপমানজনক জীবনযাপন করে। মাদকদ্রব্য গ্রহণ করে গাড়ি চালকরা গাড়ি চালালে নানা দুর্ঘটনা ঘটে থাকে। মাদকদ্রব্যের সহজলভ্যতার জন্য অবৈধ জমজমাট ব্যবসায় গড়ে ওঠে।

মাদক প্রতিরোধের উপায় : মাদকাসক্তি বর্তমানে সামাজিক ব্যাধিতে পরিণত হয়েছে। সুতরাং একে প্রতিরোধ করতে হলে সামাজিক প্রতিরোধ গড়ে তুলতে হবে। সমাজের শিক্ষিত, বিবেকবান, চিন্তাশীল লোকদের স্বেচ্ছাসেবী হয়ে এগিয়ে এসে আমাদের যুবসমাজকে মাদকের হাত থেকে বাঁচাতে হবে। ধর্মীয় ও নৈতিক শিক্ষার ব্যাপক প্রসার ঘটাতে হবে। যুবসমাজকে মাদকের ভয়াবহতা সম্পর্কে সচেতন করতে হবে। আকাশ-সংস্কৃতির কুপ্রভাব যাতে তাদের গ্রাস করতে না পারে সেজন্য আমাদের ঐতিহ্য ও সংস্কৃতিবিরোধী কোনো কিছুর প্রদর্শন বন্ধ করতে হবে। মাদকাসক্তদেরকে ঘৃণা নয়; বরং ভালোবেসে তাদেরকে গ্রহণ করে বোঝাতে হবে যে, তারা যা করছে তা ভালো নয়। তাদেরকে অপরাধী হিসেবে দোষী সাব্যস্ত না করে বরং বোঝাতে হবে এটা ভুল। ছাত্রসমাজ যাতে হতাশাগ্রস্ত না হয় সেজন্য শিক্ষাশেষে তাদের যথাযথ কর্মসংস্থানের ব্যবস্থা করতে হবে।

শিক্ষাজ্ঞান থেকে অপরাজনীতি ও সেশন জট দূর করতে হবে। শিক্ষকদের সচেতন ভূমিকা পালন করতে হবে। মাদক রোধে পরিবারের রয়েছে বিরাট ভূমিকা। তাই মা-বাবাকে সর্বদা সচেতন থাকতে হবে। তাদের সন্তানদের দৈনন্দিন কাজের ব্যাপারে, তাদের আচরণে কোনো বৈসাদৃশ্য দেখলেই তার কারণ খুঁজে বের করতে হবে। সরকারের রয়েছে নানা রকম দায়িত্ব। মাদক-চালান রোধ করে বিক্রয়ের ওপর নিষেধাজ্ঞা জারি করতে হবে। মাদক ব্যবহারকারী ও বিক্রেতা উভয়কে কঠোর শাস্তির আওতায় আনতে হবে। সরকারি ও বেসরকারি প্রচার মাধ্যমে গণসচেতনতামূলক অনুষ্ঠান প্রচার করে মাদকের ক্ষতিকর প্রভাব তুলে ধরতে হবে, বর্তমানে যা খুবই অপ্রতুল বলে মনে হয়।

উপসংহার : আমাদের যুবসমাজকে ধ্বংসের হাত থেকে রক্ষা করা এবং আজকের ও আগামী দিনের সুস্থ, সুন্দর ও সুখের সমাজের জন্য মাদকদ্রব্যের ক্ষতিকর দিক সম্পর্কে সবাইকে সচেতন করতে হবে। আর এর জন্য দরকার পারিবারিক, সামাজিক ও আন্তর্জাতিক পদক্ষেপ। সবাইকে মুক্ত কণ্ঠে বলতে হবে—‘মাদক নয়, সুস্থ জীবন চাই, শিশুদের জন্য সুস্থ সুন্দর ভবিষ্যৎ চাই।’

০৯ বাংলাদেশের প্রাকৃতিক দুর্যোগ

উপস্থাপনা : প্রকৃতির রূপ বড়োই বিচিত্র। প্রকৃতি মানুষের জন্য সুন্দর পরিবেশ সৃষ্টি করে। আবার এ প্রকৃতিই মানুষের জীবনে দুর্যোগ বয়ে নিয়ে আসে। বন্যা, ঘূর্ণিঝড়, সামুদ্রিক জলোচ্ছ্বাস, ভূমিকম্প, খরা,

মহামারি ইত্যাদি প্রাকৃতিক দুর্যোগের কারণে জনজীবন বিপর্যস্ত হয়, অগণিত মানুষের প্রাণহানি ঘটে এবং সম্পদ বিনষ্ট হয়। মানুষ এসব প্রাকৃতিক দুর্যোগ মোকাবিলা করতে সক্ষম নয়। তবে পূর্ব থেকে সতর্কতা অবলম্বন করলে ক্ষয়ক্ষতির পরিমাণ অনেকাংশেই কমিয়ে আনতে পারে। নানা কারণে বাংলাদেশে বন্যাসহ অন্যান্য প্রাকৃতিক দুর্যোগের সৃষ্টি হয়।

প্রাকৃতিক দুর্যোগ : দুর্যোগ বলতে আমরা বুঝি, যা মানুষের স্বাভাবিক জীবনকে মারাত্মকভাবে বিঘ্নিত করে এবং জানমালের ব্যাপক ক্ষতিসাধন করে। আর প্রাকৃতিক দুর্যোগ বলতে বোঝায় প্রকৃতি ও প্রাকৃতিক উপাদানের চরম অস্বাভাবিক অবস্থা, যাতে মানবসমাজ বিপর্যস্ত ও দুর্দশাগ্রস্ত হয়ে পড়ে। প্রাকৃতিক দুর্যোগ তাই প্রকৃতির অস্বাভাবিক আচরণ বা অবস্থা।

বাংলাদেশে প্রাকৃতিক দুর্যোগ : ভৌগোলিক অবস্থান ও অন্যান্য কারণে বাংলাদেশে যেসব প্রাকৃতিক দুর্যোগ সংঘটিত হয় সেগুলো হলো—

বন্যা : বর্ষাকালে অতিবৃষ্টি ও পাহাড়ি ঢলের কারণে নদীর পানি বৃদ্ধি পায়। এর ফলে বাংলাদেশের বিভিন্ন অঞ্চলে বন্যা দেখা দেয়। বন্যাকবলিত অঞ্চলগুলোতে মানুষের স্বাভাবিক জীবনযাত্রা ব্যাহত হয় এবং ফসলের ক্ষতি হয়। বন্যার ফলে জনপদের ঘরবাড়ি ও রাস্তাঘাট নষ্ট হয়। বহু গৃহপালিত পশু প্রাণ হারায়। ১৯৫৫ ও ১৯৬৪ সালের বন্যায় বাংলাদেশের প্রায় সব অঞ্চল মারাত্মকভাবে ক্ষতিগ্রস্ত হয়েছিল। ১৯৭০ ও ১৯৭৪ সালের বন্যার বিতীর্ষিকাও মানুষের মনে দাগ কেটে আছে। ১৯৮৮ সালের বন্যা রাজধানী ঢাকাসহ পুরো দেশের মানুষকে বন্দি করে দেয় এবং ১৯৯৮ সালের বন্যাও দীর্ঘস্থায়ী ছিল। এ সময়ে অপরিবর্তিত অবস্থায় পাঁচ মাস পানিবন্দি জীবনযাপন করেছে লাখ লাখ দুর্গত মানুষ। ২০০১, ২০০২ ও ২০০৭ সালের বন্যাতেও মানুষ, গবাদিপশু ও ফসলের মারাত্মক ক্ষতি হয়।

ঘূর্ণিঝড় ও জলোচ্ছ্বাস : বছরের এপ্রিল-মে ও অক্টোবর-নভেম্বর মাসের দিকে বাংলাদেশে ছোটো-বড়ো নানা ধরনের ঘূর্ণিঝড় আঘাত হানে। ঘূর্ণিঝড়ে বাতাসের তীব্রতা থাকে খুব বেশি। এর ফলে কখনো কখনো সমুদ্রে জলোচ্ছ্বাসের সৃষ্টি হয়। এ ধরনের দুর্যোগ প্রায় প্রতিবছরই চট্টগ্রাম, কক্সবাজার, নোয়াখালী, বরিশাল, খুলনা প্রভৃতি উপকূলবর্তী এলাকায় ও দ্বীপসমূহে আঘাত হানে। এর নিষ্ঠুর আঘাতে হাজার হাজার মানুষের প্রাণহানি ঘটে। আশ্রয়হীন হয় লাখ লাখ মানুষ। বিপন্ন হয় মানুষ, নিসর্গ ও জীববৈচিত্র্য; বিপর্যস্ত হয় লোকালয়। মানুষ পতিত হয় অবর্ণনীয় দুঃখ-দুর্দশায়। লবণাক্ততার জন্য প্লাবিত এলাকার ভূমি চাষের অযোগ্য হয়ে পড়ে। ফসলের ক্ষয়ক্ষতির কারণে কৃষি-উৎপাদন মারাত্মকভাবে ব্যাহত হয়। ১৯৭০ সালে মেঘনা নদীর মোহনায় প্রবল ঘূর্ণিঝড় ও জলোচ্ছ্বাসে প্রায় তিন লাখ মানুষ প্রাণ হারিয়েছিল। ১৯৯১ সালে বাংলাদেশের উপকূলীয় অঞ্চল দিয়ে বয়ে যাওয়া প্রচণ্ড ঘূর্ণিঝড় ও জলোচ্ছ্বাসে দেড় লাখ মানুষের মৃত্যু হয়। ২০০৭ সালে দেশের দক্ষিণ-পশ্চিমাঞ্চলে আঘাত হানে ঘূর্ণিঝড় ‘সিডর’। ২০০৯ সালের ঘূর্ণিঝড় ‘আইলা’ ব্যাপক ক্ষতিসাধন করে। বিশ্বের অন্যতম প্রাকৃতিক ঐতিহ্য সুন্দরবন এই দুই ঘূর্ণিঝড়ে মারাত্মকভাবে ক্ষতিগ্রস্ত হয়। এসব ঘূর্ণিঝড়ের প্রভাবে দেশের অভ্যন্তরেও অপূরণীয় ক্ষয়ক্ষতি হয়।

নদী ভাঙন : বাংলাদেশ নদীমাতৃক দেশ। নদীর যেমন সুফল রয়েছে তেমনি নানা ধ্বংসাত্মক কার্যাবলিও হয় নদীর মাধ্যমে। জামালপুর, বগুড়া, গাইবান্ধা, সিরাজগঞ্জ, টাঙ্গাইল, পাবনা ও চাঁদপুর নদী ভাঙনের সবচেয়ে ক্ষতিগ্রস্ত এলাকা। সর্বগ্রাসী যমুনার ভাঙনে অসংখ্য জনপদ ও গাছপালা বিলীন হয়ে যায়। চাঁদপুরে মেঘনার ভাঙন কোটি কোটি টাকার ক্ষতিসাধন করে।

ভূমিকম্প : বাংলাদেশ বিশ্বের ভূমিকম্পপ্রবণ দেশসমূহের মধ্যে অন্যতম। আমাদের দেশে যে-কোনো মুহূর্তে ভূমিকম্প ঘটতে পারে। বিশেষ করে ঢাকা, সিলেট, চট্টগ্রাম ও ব্রহ্মপুত্র অববাহিকায় তীব্র ভূমিকম্প অনুভূত হতে পারে। সম্প্রতি মায়ানমার ও ব্যাংককে বড়ো ধরনের এবং আমাদের দেশে ঢাকা, নরসিংদী ও চট্টগ্রামে বারবার ভূমিকম্প অনুভূত হয়েছে। সংশ্লিষ্ট বিজ্ঞানীরা বলেছেন, বাংলাদেশে বড়ো ধরনের ভূমিকম্প হওয়ারই পূর্বাভাস এগুলো। বাংলাদেশের ভূ-প্রাকৃতিক গঠন খুবই নাজুক হওয়ার কারণে ৮ থেকে ৯ রিখটার স্কেলমাত্রার ভূমিকম্প বিস্তীর্ণ এলাকাকে মুহূর্তের মধ্যেই মৃত্যুপুরীতে পরিণত করতে পারে। বিশেষজ্ঞদের মতে, শুধু রাজধানী ঢাকায়ই বিপুল ধ্বংসসহ ৩ লাখেরও বেশি মানুষের মৃত্যু হতে পারে।

মৌসুমি ঝড় : বাংলাদেশে গ্রীষ্মকালে বারবার কালবৈশাখী ঝড় আঘাত হানে। টর্নেডো, হ্যারিকেন, কিংবা সাইক্লোনের মুহূর্তের তাড়বে বাড়িঘর সবকিছু লুপ্ত হয়ে যায়। ১৭৩৭ সালে দক্ষিণ বঙ্গের নিচু এলাকায়, ১৮৮৮ ও ১৯০২ সালে ঢাকায়, ১৯১৯ সালে পূর্ববঙ্গো, ১৯৫৬ সালে সারা দেশে, ১৯৮৯ সালে মানিকগঞ্জে, ১৯৯১ সালে খুলনায়, ২০০২ সালে ব্রাহ্মণবাড়িয়ায় ও ২০০৪ সালে নেত্রকোনা জেলায় ভয়ংকর ঝড়ে বিভীষিকাময় পরিস্থিতির সৃষ্টি হয়েছিল।

প্রাকৃতিক দুর্যোগের কারণ : নানাবিধ কারণে প্রাকৃতিক দুর্যোগ সংঘটিত হতে পারে। যেমন—

১. ভৌগোলিক অবস্থান ও ভূ-তাত্ত্বিক গঠন : বাংলাদেশের ভৌগোলিক অবস্থান ও ভূ-তাত্ত্বিক গঠনই এখানকার বন্যার প্রধান কারণ। এদেশ গঙ্গা, যমুনা ও মেঘনা—এ প্রধান তিনটি নদীর মিলনস্থলে অবস্থিত বৃহত্তম ব-দ্বীপ, যা পৃষ্ঠদেশ থেকে মাত্র ৬-৭ মিটার উঁচু। নেপাল, ভুটান ও তিব্বত হলো উল্লিখিত তিনটি নদীর পানির উৎস। বর্ষাকালে উক্ত তিনটি নদীতে পানি বাড়লে বাংলাদেশে বন্যা শুরু হয়ে যায়।

২. মৌসুমি বায়ুর প্রভাব : বর্ষাকালে মৌসুমি বায়ুর প্রভাবে বাতাস দক্ষিণ-পূর্ব দিক থেকে উত্তর-পশ্চিম দিকে প্রবাহিত হয়। ফলে

নদীর জলস্রোতের দক্ষিণমুখী নিঃসরণ বাধাপ্রাপ্ত হয়। তখন প্রবল ব্যতির ফলে বজ্রোপসাগরের পানি সমতল থেকে ৩/৪ ফুট বেড়ে যায় এবং অতিরিক্ত পানি নদীপথে দেশের অভ্যন্তরভাগে প্রবেশ করে। ফলে বন্যার সূত্রপাত হয়।

৩. হিমালয়ের বরফগলা পানি : পৃথিবীর সর্ববৃহৎ পর্বতমালা হিমালয় আমাদের এ অঞ্চলে অবস্থিত। গ্রীষ্মকালে তাপে বরফ গলে কোটি কোটি কিউসেক পানি গঙ্গা, যমুনা, মেঘনা দিয়ে প্রবাহিত হয়। অন্যদিকে নেপাল, ভারত, ভুটান ও তিব্বত উক্ত তিনটি নদীর পানির উৎস। তাই বিশেষজ্ঞদের মতে, দেশের বাইরের নদীগুলোর পানি প্রবাহের তীব্রতায় হ্রাস-বৃদ্ধি বন্যার অন্যতম কারণ।

৪. ফারাক্কা বাঁধ : ফারাক্কা বাঁধ নির্মাণের আগে ভাগীরথী নদীতে বর্ষাকালে যেখানে প্রতি সেকেন্ডে প্রায় ১,৩০,০০০ ঘনফুট পানি প্রবাহিত হতো, তা বাঁধ নির্মাণের পরে দাঁড়ায় ৮০,০০০ ঘনফুটে। হ্রাসপ্রাপ্ত ৫০,০০০ ঘনফুট পানিপ্রবাহ অতিরিক্ত প্রবাহ বাড়িয়ে তুলেছে। তাছাড়া ভারত প্রতি শূন্যে মৌসুমে ফারাক্কার পানি আটকে রাখে এবং বর্ষা মৌসুমে সবকিছু গেট একসাথে খুলে দিয়ে বাংলাদেশকে পানিতে ডুবিয়ে দেয়। তাতে ক্ষতিগ্রস্ত হয় বাংলাদেশের আবাদি জমির ফসল ও মানুষের জান-মাল, বসতবাড়ি এবং অর্থনীতি।

প্রাকৃতিক দুর্যোগ ও তার প্রতিকার : প্রাকৃতিক দুর্যোগ প্রতিরোধ করার শক্তি মানুষের হাতে নেই। তবে পূর্বপ্রস্তুতি ও সতর্কতামূলক ব্যবস্থা গ্রহণ করলে অনেক ক্ষতি থেকে রক্ষা পাওয়া সম্ভব। এজন্য গণসচেতনতা দরকার, দরকার ঝড়-জলোচ্ছ্বাস ও বন্যা থেকে রক্ষা পাওয়ার মতো অবকাঠামো নির্মাণ, উঁচু বাঁধ তৈরি ও ব্যাপক প্রচার-প্রচারণা চালানো। রাষ্ট্রীয় সুপারিকল্পনার মাধ্যমে জনস্বার্থে প্রয়োজনীয় আশ্রয়কেন্দ্র, সবুজ বেঞ্চনী ইত্যাদি তৈরি করা যেতে পারে।

উপসংহার : আমাদের দেশ ভৌগোলিক দিক থেকে অধিক দুর্যোগপ্রবণ। তাই প্রাকৃতিক দুর্যোগ থেকে জান-মাল রক্ষা করার জন্য রাষ্ট্রীয় পরিকল্পনা যেমন থাকা দরকার তেমনি জনসচেতনতারও প্রয়োজন। প্রাকৃতিক দুর্যোগ থেকে বাঁচতে অবকাঠামোগত উন্নয়নও প্রয়োজন।